

Aõhebo **Rotÿÿ**nyre Aõhebo **Rotÿÿ**nyre **Jesu**si **Erydÿÿ**na **Mahã**du

¹ Juhuu adee ratyyritinyreu, Teòfilo, relyyre ibutumy Jesuisi aõbo riwinyré, aõmybo bedede rierynanyrémy.

² Deuxu Tyytybytyhy bedede erydÿÿnamy taerydÿÿna woludu mahãdu rierynanyre. Tahe taerydÿÿna mahãdu-ò bedede ywina riwahinyre. Iribi tahe Jesuisi ròðsere biu-ò. Kia ibutumy juhUU adee relyyre.

³ Iribi itxeònihikÿ-ki rurureu, taerydÿÿna woludu mahãdu-ò rexitÿnynyre hãbu irudilemy. Tamyreny rexideòsinyre sõwetxu-di rulemy ratximyhÿmy. Inatyhy wa warybetyhy rare, tamyreny rarybere. Rexitÿnynyreu, tamyreny rierynanyre Deuxu Iòlònamy. Txuõ txuõlemy iny inatxiwaitue txumy rierynanymyhÿre.

⁴ Tiiboho-wana riroximy raremyhÿu, Jesuisi tamyreny rarybere: —Uritere Jerusalẽ-ribi ixitarasarenyõmy. Urile Deuxu Tyytybytyhy awo-ò kanakre xiery, Jerusalẽ-ribi boibenyke. Deuxu rarybere Tatyytybytyhy kiditeònykremy. Tule juhUU Jesuisi kia rarybere.

⁵ Deuxu Tyytybytyhy aworeny-ò kanalokre. Kia ratisebenaõ wesele rare, Deuxu Tyytybytyhy ratisebena. Iwese Joaõ juhUU bero-ki iny risebenyre wese, kia rare. Kia-txu tahe, iòhòmy roire.

⁶ Tahe, juhUU ibutumy wirotYrenyreu, Jesuisi dee rÿÿraxirenyre: –Wanyrÿ, kai aõbo wiji iny Iòlòreny bediwahinyleke inywedureny wesemy ixyby ronykemy.

⁷ Tahe Jesuisi dirawyònyde: –Waha-ki ywisidÿÿnatxu doimyhÿde. Tiile rierymyhÿre. Kai aõkõhyyre.

⁸ Tahe Deuxu Tyytybytyhy aworeny-ò kanalokreu, rurunatyhy arayky-ò bitabenyke. Kia tahe warubu-ribi waixixanamy belyykre ibutumy Jerusalë hãwã mahãdu-ò, Judeia hãwã bede mahãdu-ò, Samaria hãwã bede mahãdu-ò, iribi tahe ibutumy bedekonana bede iny-ò.

⁹ Tarybe rahudi tahe Jesuisi ixihyy rexidimy raòwònyre biu-txi. Iõre biuwetyky-txi. Tiiboho rarirenyre bede-ribi idi reteherenyre.

¹⁰ Idi retehemyhÿ iòtududÿÿtyhymy. Inatxi hãbumy ityy uramy aõwesele rÿimy reamyhÿre hãbu mahãduko-txi.

¹¹ Tahe tiiboho raryberenyre: –Hãbu, Kalileia bede mahãdu, itxereõmahãbenyke. Jesuisi ka ramyramyhÿre biu-ò, Deuxu sÿ-ò. Iwese rarawesele ka ixyby kòdòòsekre.

¹² Jesuisi erydÿÿna mahãdu ratximyhÿrenyre Oliveira òwòruraty hãwãlò-ki. Tahe dòòsedenyde Jerusalë hãwã-ò. Jerusalë rehe iribi doide sohoji urihixina rehemymyõlemy.

¹³ Tahe wii rotyrenyre rorukure ixitòdedÿÿmy hetoratyawo-ki. Kahekani-di rirana rarekre tai rÿimyhÿrenyre: Pedro, Joaõ, Txiau, Andre, Filipi, Tome, Bartolomeu, Mateu, ijõ Txiau (tii Afeu riòre rare), Simaõ Zelòte, Judasi (ijõ Txiau iwitxira, kia riòre rare).

14 Ijõ iny tule tai rononymhỹ, Jesusise, hãwyy ijõ rononymhỹ, Jesuisi seriõre mahãdu tule rorukumyhyrenyre. Ibutumy rexitõdenymyhyrenyre wiweselemy rõhõtinyinymyhyrenyre.

15-16 Ijõ txubiõwamy 120 inymy wii ributunyre ixybyle. Tahe Pedro rỹire kiamy tamyreny rarybere: —Waityhydỹydu seriõre mahãdu, iwese Judasi aõhebo rotÿÿnyre wesemy Davi tyyritinamy roimyhỹre. Kiamy wahe: —Jesuisi taõluduboho-ò ròhònyreu, Judasi tiiboho riwiõhenanyre. Iwese ka tyyritina-ki roire wesele, inatyhymy ibutumy rotÿÿnyre.

17 Judasi inybohoõmy raremyhỹ. Tii nieruõ ritare Jesuisi õludu-ribi tamyreny ridyreki. Tahe kia nieru-di subutebedeõ riwyyre.

18 Tahe idi Judasi rexibõtòtaara. Idi tahe tasubute bedero-txi taratythikỹle-ribi resere. Tahe iumy ruare iwona rejuxunyre.

19 Iribi ijyy heka ibutumy Jerusalẽ mahãdu-ò tuu ijyy rỹire. Tahe kia subutebede rininirenyre hãlubu bederomy.

20 Iòlò Davi kia wese riritinyre tawiu-natyriti-ki:

—Ixinamy iheto rỹike, inyõ taisỹõmy.

Ijõ:

—Inywitziraõ teròwymy tai rarekre iaõmysỹdỹỹna rimumykyre.

21-22 Inyõ tahe teròwymy iaõmysỹdỹỹna rimumykyre. Tule rikimyyrenyke Jesuisi ixixanamy ijyyduõ inywanahyy rybe ritỹnynykyre. Inyõ Jesuisi sebedỹỹna-di itxereduõ rikimyyrenykyre, inyõ tuu robire Jesuisi nonanamy tule rikimyyrenyke.

²³ Tahe inatxi hãbumy ritarenyre: Jyje (Basaba inire) Justu iniòrysna rare, ijõ hãbu tahe Matxia rare.

²⁴ Iribi tahe rexitòenyre: —Kiamy heka Deuxu dee raryberenyre:

Kai Wanynyrÿreny, ibutumy inyrayky teeryte, Deuxu. Biteòsinyke tibo rikitarenykemy.

²⁵ Tii ritÿxinykre ixihyymy ratximyhÿre mahãdu. Judasi deròwumy rarekemy, Judasi dori iny-ribi ròhònyre taòrarunaòwydÿÿnamy rare aõhòkÿmy rotÿÿnykemy. Tahe rare tiobo rareò.

²⁶ Wyhy raheto lisina wesemy idi rehure. Kiamy heka riwinyre tibo ròtakemy. Matxia tahe iribi ròtare. Tii tahe ralore waòsohoji reurò erydÿÿnaky-txi.

2

¹ Pentecostemy ninadu lisina kia txumy txuu rÿireu, ibutumy iny rorukurenyre tarynanakile.

² Aõwesele biu-ribi wodÿÿõ nade yhynihikÿwesele ibutumy heto-ò ralore tai rorukumyhÿrenyrewo-ò.

³ Heòty helÿÿresi wesemy nade. Iny sohoji sohoji tyre resere.

⁴ Ibutumy iny tykumy heka Deuxu Tyytybytyhy ralòmy rÿire. Ta raryberenyre iwitxira rybemy. Deuxu Tyytybytyhy tamy rybe riwahinyre wese tahe raryberenyre.

⁵ Deuxu dee òbitimy hãbu mahãdu noduò rasÿnymy raremyhÿ Jerusalẽ hãwã-ki. Judeu mahãduõ ihÿre. Ibutumy bede bede hãwã hãwã-ribi nade.

⁶ Kia-ò roholareu, wii ributunyre ijohonamy. Tahe rexieryõhykyre aõmybo rõhõtinyrè tahe widi bede riòtiinyre iny sohoji sohoji tarybe tarybeòlemy roholareki.

⁷ Urile bede riòtiinytyhyrenyre. Tahe raryberenyre deysana-di:

—Betehebeny iny, kowa rybedu Kalileia bede ludu mahãdu ratxireri.

⁸ Timykibo iny ryberenymy rarybereri. Iny sohoji sohoji tarybeòle raholareri.

⁹⁻¹⁰ Kaheka inyboho bede bede ludu roire: Partia mahãdu, Media mahãdu, Elaõ mahãdu, tule ka bede ludu mahãdu: Mesopotamia, Judeia, Kapadosia, Ponto, Asia, Frigia, Panfilia, Egito, Libia Sireni-wana iòhòre, Roma hãwã luduõ tule kaki ihÿre.

¹¹ Timybo inyrybereny witxira witxira-ò iny roholarenyreri. Deuxu rybemy rarybereri ibutumy inyryberenymy. Ibutumy inyboho: Judeu, Judeuerydÿÿna ityhydÿÿdu, tule Kreta mahãdu, Arabia mahãdu, Deuxu aõmydÿÿnana wihikÿ-ò raholarenyreri.

¹² Tahe bede riòtiinyrenyre. Rieryõrenyre aõbo rare. Tahe widee rÿÿraxirenyre iny sohoji sohoji-ò aõbo raremy.

¹³ Ijõ tahe tawobinarybe rarybere:

—Tiibohe rururenyreri, itxÿtemonamy riõreri.

¹⁴ Tahe Pedro rÿire waòsohoji erydÿÿna-di, tahe tii rexidelenyre rarybekemy:

—Boholake inihe, ibutumy kaibohe, Judeia mahãdu, Jerusalẽ sÿludu-wana —kia bierybenykemy.

15 Inyõ rarybereri itxÿtemonamy riõrerimy. Tahe inatyhymy aõkõ rare. Txuu rati rariarerile heka rudiletyhyre.

16 Joel juhoo Deuxu rybeduõ rare. Tii narybede wijitxumy. Tahe iwese tii rarybere wesele, wiji ratximyhÿre. Tii rarybere:

17 –Kiamy Deuxu rarybere:

–Ikonanatxuu watyytybytyhyhykÿ aditeònykre ibutumy inydee. Ariòrereny, hãwyy hãbu-wana, warybe rierynanykre. Weryrybò tahe matuari-wana rarasinytyhykre.

18 Ibutumy wadeòdu-ò, lerÿ, hãbu, ibutuwo-ò Deuxu Tyytybytyhy kanalokre. Tuu raryberenykre, ritÿnynyrenykre.

19 Aõ tÿmyra ariteòsinykre biu-ki, bede-ki. Hãlubu, heòty, worona-wana ròhònykre.

20 Txuu heka ilybyhykÿlemy relekre. Ahãdu isòhòkÿlemy relekre. Iribi tahe Inynyrÿtxu-ò rehemynykre. Kia txu awimy roikre. Inynyrÿ kòdòhònykre.

21 Kia bedeu, inyõ Inynyrÿnimy rexitòenykeki, tii jiarÿ aritakre iòraru-ribi. Kia Deuxu rybe rare.

22 Judeu mahãdu, Israeli mahãdu, boholabenyke warybe-ò: Deuxu sòwemy aõna aõna witxira witxira-di, bedeòby-di riwahinyre. Inatyhymy Jesuisi Nazare hãwã ludu mahãduõ riteòsinyre. Inatyhymy rare. Kaiboho heka teerytenyte.

23 Kaiboho Jesuisi temyteu, Deuxu juhoo rimumy rierymyhÿre. Rexierymy ròhòtinyre kawesemy bede roimy rarekre. Kaiboho

Jesuisi terubunyenye. Kaiboho itxeò nihikÿ-ki tetamadÿÿnytenye hãbubina debòreny-di.

24 Tahe Deuxu ritare rubu-ribi riixxadÿÿnyre. Wabede Deuxu ribòhònyre. Iribi Jesuisi riòlòdÿÿnyre. Rubu heto tii rimyòtyhy.

25 Davi juhoo rarybere iwese Jesuisi rarybekremy:

—Wanyrÿ wawana ratxireri, brebu-di watxiòkre. Tii riwawiòhenanymyhÿre. Tai wawo deysana-di ritÿxinymyhÿre.

26 Wadòròtò wowydyna tamy rewahinymyhÿre. Reeryre ibutumy rubuhetowo-ki awityhymy wãhãré, iribi dori aròhònykre.

27 Kai watyytyby teriòte rubuheto-ki. Jiarÿ ariòre òbitityhy rare, tai waumyde rasunyòtyhy.

28 Kai tiwaeryte ibutumy umytÿmyra aõmydÿÿnana awana aratxikreu, deysana-di tÿximy biwasÿnykre.

[Kia ibutumy Jesuisi rarybekremy Davi rarybere.]

29 Pedro ijò rarybemyhÿre: —Tahe kiamy heka mohòtinybenyke, Waseriòreboho. Davi heka aõ iximy aõkò rarybereri. Tii tahe hãloowo-ò roire. Itityby heka kakile iny-wana ihÿre.

30 Tahe Davi Inynyrÿ deròwymy rybeduò raremyhÿ. Deuxu inatyhyna rybe-di Davi-ò narybede. Kia tahe: Iriòre riòreò bede dinodumy kodonykremy taiòlò ryna-ki. Kia iòlò Davi rieryre.

31 Davi tahe Kristu ixixanamy juhoo narybede. Kristu umy dori rubu-ki rariòhyre. Iumyde rarònyòre.

32 Jesuisi Kristu, Deuxu riixixanyre. Ibutumy inyboho tuu robirenyre.

33 Jesuisi rononymhÿre Deuxu rurunawe-ribi. Iwese rarybere wese Deuxu Tatytybytyhy tamy diteònyde. Tii adee diwyde. Kiamy tahe wiji tabitenyteri, taholatenyteri.

34 Davi raòwònyõre biu-ò. Tahe kiamy rarybere:

Deuxu rarybere Inynyrÿ-ò:

—Bodonyke katxi warurunawe-ribi.

35 Aòludu awarawo-ki arisÿnykre. Aòludu-di arehukre.

Kiamy tahe Deuxu Jesuisi-ò rarybere.

36 Boholake judeu mahãdu. Kaa inatyhy hyy rare. Itxeònihikÿ-ki Jesuisi terubunytenyete. Deuxu tahe Jesuisi ritidire ibutu-ò wedumy, ibutu-ò Kristumy, aõma, Deuxu deòdÿÿna.

37 Tahe Pedro rybe-ki urile rõhõtynyrenyre. Tai tahe Pedro-ò ijõ erydÿÿna-ò rÿÿraxirenyre:

—Waseriòreboho, aõhebo rokotÿÿnyrenykre.

38 Tahe Pedro dirawyònyde: —Bòòsebenyke aòrarureny-ribi ixbyby Deuxu-ò. Idi tahe Jesusini-di maratysebekemy aòraru ritakemy. Tai bimykre Deuxu Tyytybytyhy wahidÿÿna wesemy awo-ki rarekremy.

39 Kristu juhoo rarybere:

—Ibutumy heka Deuxu Tyytybytyhy bimybenykre, ariòre rimykre, iny hãwã wixira ludu rimyke. Ibutumy Deuxu dee wimy tahe rimykre.

40 Pedro relyymy raremyhÿ. Tamyreny rarybere tarasamy roikemy:

—Iny bina binahakÿ-ribi bexitabenykre.

41 Kia rityhynyré heka tahe ratisebedumy roiremyhÿ. Ralore kiatxuu 3000 iny iòhòmy Jesuisi tyhydÿÿdu mahãdu-ò.

42 Tahe Jesuisi erydÿÿna mahãdu riery-nanymyhÿre, wii ributunymy roiremyhÿ, paõ rioroororenyre wideereny: rexitðenymy roiremyhÿ.

43 Iny sohoji sohoji bede riðtiinymy rabrebумы hitxinymyhÿre. Jesuisi erydÿÿna mahãdu bedeoðby sõwemy riwinymyhÿre. Aõna aõna wiwihikÿmy riwinymyhÿre.

44 Ibutumy rityhynymyhÿre mahãdu, sõwemy wii riwiutyre. Ibutumy aõna aõna wimy riywinyre.

45 Taaõmydÿÿna, tasu-wana idi rohonyre. Wimy tahe ritxuatxuare. Ibutumy ityhydÿÿdu iaõkõ mahãdu dee riwahiriwahinyre. Inyõ aõna aõna rauhenykeki, tamy riwahinyre.

46 Deuxu dohodÿÿna heto-ki txuõ txuõlemy wii ributunyre. Tahe tota hetomy paõ riyreriyrenyre. Riroxirenyre ibutumy teysarenymy wii wese rõhõtinynyre.

47 Tuu reàlàrenyre Deuxumy. Ibutumy iny hãwãhãkÿ mahãdu awimy tai raharenyre. Deuxu rimyre txuõ txuõ lemy ralore mahãdu kia ritakemy.

3

1 Pedro, Joaõ-wana rare Deuxu dohodÿÿna heto-ò rexitðenykemy, inataõ òra bedeu.

2 Deuxu dohodÿÿna heto ijò inyõ rininire, ijò ruxerahakÿ. Txuõ txuõlemy hãbu tibina ridyhyhyymy iny tamy reamyhÿre. Tamy iny ralomyhÿkeõ tamy nierumy rexitðenykemy. Tii tuu hyy uladumy reareu ihyy itibinare.

3 Pedroboho rirònyrenyreu, hãbu tibina tuureny robire. Nierumy tahe tamynyre rexitðenyre.

⁴ Pedro juhu tamy retehere idi rarybere:

—Bedeteheke wadireny.

⁵ Tai hãbu retehemy ronyre, nieruõ iribi riwykemy rõhõtinyre.

⁶ Pedro rarybere:

—Aõ ijõkõre, womati tÿrÿrÿhÿkÿ ijõkõ, pratakõ. Tahe aõbo idi watxirerile ta adee ariwahinykre. Jesuisi Nazare hãwãludunimy adee ararybekremy idi mariakremy. Kia deytana adee ariwahinykre.

⁷ Pedro, hãbu debò rimymy ritamadÿÿnyre. Aõwesele iruru iti-ò ralore.

⁸ Hãbu rexiwatxinymy tahe, ririradÿÿnyre. Ihyy ralore dohodÿÿna heto-ò. Deuxu dee deysamy rexiwatxinymy ralore.

⁹ Ibutumy iny idi retehere rariarerimy, Deuxumy reàlârerimy.

¹⁰ Inyõ rarybere: —Tii ijò ruxerahakÿ-ki nierumy rexitòenymyhÿremy, inyboho tii reeryreny. Tai tahe idi bede riòtiinyreri timykibo aõna aõnamy rotÿÿnyramy.

¹¹ Hãbu ta Pedro, Joaõboho werora-ki xiery. Idi tahe ibutumy ributumy Salomaõ heto ijò ahanawo-ò.

¹² Pedro kia robireu tahe, tamy rarybere: —Judeu mahãdu, wadireny itxereõmy, bedetiidÿÿõmy. Jiarÿboho inyruru-di aõkõ ka hãbu reteytenyreny, Deuxu rurudile wahe.

¹³ Abraõ, Ijai, Ijaõ kiaboho Deuxu heka hãbu riteytenyra. Tybyreny Deuxu kia heka riwinyra. Deuxu, Kristunimy riwowydnyre, rubu-ribi riixixanyraki. Kaiboho tahe Jesuisi Kristu tedyteny

Pilato-ò. Pilato tii riteònykemy ratxireriu, kaiboho tamy rarybere: –Aõkõre, tii deòdÿÿõmy. Ijõ biteònyke. Tai tahe rubudÿÿduõ riteònyre.

14 Jesuisi òraru widÿÿdu aõkõ rarehyymy raremyhÿ, ityhydÿÿdu ihÿre, òbiti widÿÿdu ihÿre. Kaiboho tii tetxiõnytenyete, tewahinytenyete.

15 Umytuedeõna wahidÿÿdu tii rare. Kaiboho tahe terubunyte. Deuxu tahe tii riixixanyre rubu-ribi. Inyboho ierydu, iitxeredu ratximyhÿrenyre.

16 Rityhynyrekile hãbu tibina reytemyhÿre. Kia hãbu teerytenyete. Jesuisini tyhyna kia riwinyre. Hãbu ibuturu-ò reytera, tai òbitimy raramy ratximyhÿre.

17 Jiarÿ reeryre kaiboho teeryõte aõbo tewinytemy. Tule adinodu rierykõlemy kia riwinyre.

18 Tahe Deuxu tarybe riwahinyre ihetxiu rybedu mahãdu-ò kia wahe tii rarybere Jesuisi rurukremy. Idi tahe irybe uludumy Jesuisi rurure. Iwese Deuxu rarybere wesemy heka irybe uludumy ròhònyre.

19 Kaiboho ixi-txi õhõti reakemy Deuxu-ò biòòsekemy. Tai tahe aòraru aribi tii ritakre. Inynyrÿ adeereny kiditeònyke aõwihikÿmy Deuxu-ribi, biu-ribi.

20 Jesuisi Kristu wijityhyle kanaõkre. Aõna aõna juhu rÿimy rareke rexihudi, tahe kanakre.

21 Tii biukile rarekre wiji. Ijõ bede tÿmyra wihikÿkre iòhõmy rahudi tahe kanakre. Kia bededÿÿnanau tahe rarybere ihetxiu rybedu mahãdu.

22 Tahe Moisesi ijõmy rarybere: –Deuxu

rybeduõ kedelekre asÿ, aijoi-ribi tii rarekre. Iwese Deuxu riwatare wese rybeduõmy ararekremy, iwesele tii Inynyrÿ kiditakre. Tamy boholabenykre irybe aõmybo kanarybekremy.

²³ Kia, Deuxu rybedu rybe-ò inyõ roholakõkre-wana, Deuxu tii kanahukre. Kia Moisesi rybe rare, Pedro rarybere.

²⁴ Deuxu rybedu sõwemy kia bededÿÿnanamy rarybere. Samueli juhoo rarybere. Idi sõwemy ijõ kiamy rarybere. Ihyymy ta wiji kabededÿÿnana roimyhÿre.

²⁵ Kaiboho Deuxu ihetxiu rybedu roire atx-imahãtenyteri Deuxu juhoo rarybere Abraõ-ò. Ariòre-ribi iny sõwemy ruaruakre. Kia ibutumy ariòre hãwã hãwã-ki rasÿnykre. Kia iny-ribi inyõ ròhònykre ibutumy iny wiòhedÿÿdumy rarekre.

²⁶ Deuxu tariòre Jesusi adeereny riteònyre aòraru-ribi arahitxinykemy, arawiòhenanykemy. Kia tahe Pedro tamyreny rarybere.

4

¹ Pedroboho tamyreny rarybereu, tamyreny rehemynyre Deuxu heto dohodÿÿna mahãduõ, ijõ tahe kia heto itxeredu dinoduõ, ijõ, saduseu mahãduõ. Inataõ ijoi tamy rehemynyre.

² Pedro, Joaõ-wana iny-ò relyymy raremyhÿ: —Inyõ Jesusimy rityhynykeki, tii tule rubu-ribi riixixanykre. Jesusi dori riixixanyre. Tahe Jesusi ixixanamy tiiboho relyymyhÿreki, kia hãbu mahãdu riykaranyreny.

³ Taita rimyre, Pedro, Joaõ-wana. Ròtena-ò ridyre. Wijile tahe tamy ixidee roholaõreny,

txiorotyhyreki. Biurasou tahe roholakremy riòlòdÿÿnykre.

⁴ Iny sówemy Deuxu rybe-ò kia txuu roholare. 5000 hābumy, ijō iny tule. Tiiboho Pedroboho-ò roholare. Tahe sówemy rityhynyrenyre.

⁵ Itxu biòwamy tahe Jerusalē-ò rehemynyre dinodu mahādu, matuari mahādu, judeu bedē ywina erydÿÿna mahādu. Kia ijoi mahādu ibutumy rehemynyre.

⁶ Anasi tule rehemynyre. Deuxu-ò xiwena wahidÿÿdu mahādu wedu tii ratximyhÿre. Tule Kaifa ijō, Joaō ijō, Alexÿdre ijōre. Anasi sÿ mahādu tule ijōre.

⁷ Tahe dinodu mahāduō Pedroboho ritamadÿÿnyre ibutu kia mahādu koò. Tahe ritÿÿraxinyre: —Aōrurudibo iny teteytedÿÿnymahāte. Monidibo kia tewinytenyte.

⁸ Ta Pedro tykymy heka Deuxu Tyytybytyhy ralore. Idi tamyreny rarybere: —Iny dinodu mahādu, matuari mahādu, adeereny ararybekre.

⁹ Hābu tibina aōmydÿÿnanamy tiwatÿÿraxinyte-wana, adeereny kiamy arirawyònykre.

¹⁰ Jesuisi Kristu Nazare hāwā luduni-di kia rybe ruru-di rewinyrenyre. Kia tahe bierybenyke. Kaiboho dorikÿhe Jesuisi itxeò nihikÿ-ò teukotenyte. Deuxu tahe riixixanyre rubu-ribi. Tai tahe ka hābu reytemy rÿimyhÿre.

¹¹ Jesuisi manaō wesemy ratxireri. Kia-di rehure heto widÿÿduō. Wiji tahe heto idile rÿimyhÿre. Kaiboho Jesuisi-di tehute heto widÿÿdu mana-di rehure wese. Wiji tahe Jesuisi Deuxu heto dinodu rarekre.

12 Tamy inyõ rityhynyõkeki, òraru-ribi ritaõtyhy. Ijõni aõkõ iny rityhynyke, Jesuisi nile iny rityhynymy rÿikrele, òraru-ribi ritamy rÿirakre.

13 Pedro, Joaõ-wana brebuõ-di kia rybe ritÿnynyre. Tai iny bede riòtiinyrenyre, tiiboho dori tyyriti erydu aõkõ roire. Urile Jesuisi-wana roiremyhÿ, kiale iny rieryrenyre.

14 Hãbumy inyboho robirenyra juhoo itibinamy. Tai tahe inyõ aõbinamy tamyreny rybedu aõkõ rare, hãbu tibina riteytenyrenyraki.

15 Tahe ibutumy iny dohodÿÿna heto wo-ribi riteònyre. Tahe wimy rarybere:

16 —Aõhebo rokotÿÿnyrenykre kia hãbu-di. Inatyhymy tiiboho aõwihikÿ riwinyrenyre. Kia rik-itxiõnyrenyõtyhy. Ibutumy Jerusalẽ hãwã mahãdu kia rieryre.

17 Tai kiamy rokotÿÿnykre. Tamy rakarybekre tiu Jesusimy ixyby rybeõmykremy. Tai Jesusimy rybe-di rikiixãwãdidÿÿnykemy. Inyõ-ò kiamy rarybeõtyhy. Kiawese raryberenyre rybe ywidÿÿdu mahãdu.

18 Idi tahe rarariòwre Pedro Joaõ-wana tamyreny rarybere: —Jesuisi nimy rybeõmy, bibedeerynyõtyhy irybemy.

19 Tahe Pedro, Joaõ-wana tamyreny dirawyònyde: —Aõbo awityhyre. Inyboho arybe arityhynykre aõbo ada Deuxu rybe aõbo arityhynykre.

20 Aõbo jiarÿboho rabirenyré, raholarenyré, kialemy araryberenykre. Inyõ riwarybebi-nanyõtyhy.

21 Idi ta ixityre tamyreny raryberenyre, rybedÿÿõkemy. Tahe riteònyrenyre. Tamy

aõwidÿÿõmy rÿimyhÿ hãwã mahãdu dee ruberurenreki. Hãwã mahãdu dori Deuxu reàlàmyhÿre hãbu riteytenyraki.

²² Kia hãbu dori 40 beòra ratyremy tabeòra-di ratximyhÿre riteytenyrau.

²³ Pedroboho rexitamy roirenyreu, ityhydÿÿdu seriòre òrysymy roirenyre. Tahe tiibohe tamyreny relyyrenyre iwese dohodÿÿna heto wedu matuari mahãdu-wana tamy rarybere wesemy.

²⁴ Tahe wiwese wesele rõhõtinyreri wese, Deuxu-ò rexitòenyrenyre: –Kai, Waha, inyIòlòreny atximahãte.

²⁵ Kai, ibutuwidÿÿdu tarybete: Davi, inytybyreny-di tarybete Atytybytyhy tamy ritÿnynyre, iwese tii rarybekemy. Davi eòdumy raremyhÿ. Irybe tyyriti-ki roimyhÿre kiamy:

–Judeukõdu mahãdu raykarananyreri. Kia awimy aõkõ ihÿre. Waijoi aõ òbitinadibo aõkõ rõhõtinyreri.

²⁶ Dinodu mahãdu wiributunyre Deuxuòludumy rÿikremy. Tule Kristu, kia Deuxu deòdÿÿna òludumy rÿikremy.

²⁷ Arybe-ki, Waha, kia ritidÿÿna roire. Tule Waha, inatyhy rare. Ka hãwã-ki, Herodi, Poncio Pilato, Judeu mahãdu, Judeukõdu mahãdu, kia ibutumy ributunyre ariòre Jesuisi òludu rÿirakremy.

²⁸ Tiibohe riwinyre iwese kai tarybete wese, Waha, kia aõmydÿÿnanamy rÿirakremy.

²⁹ Kai, Waha, teeryte iwese tiibohe raryberemy, aõma, rybeõmykemy. Tahe eòdu biwiòhenanykre arybe-di ihãrele rarybekemy brebuõ-di.

³⁰ Biwiòhenanykre, Waha, eòdu mahãdu, webinadu mahãdu riteytenykemy. Tule aõna aõna wiwi-

hikÿ riwinykremy, Jesuisi, Ariòreni òraru-ki kia riwinykremy.

³¹ Tahe ixitòedÿÿna rexihureu, heto ramytatamy. Deuxu Tyytybytyhy ibutumy iny tykymy ralore. Tai tahe Deuxu rybe rarybemyhÿre. Brebumy aõkõ tiiboho relyymyhÿrenyre.

³² Ityhydÿÿdu mahãdu iaõna aõna-di wii ri-wiòhenanyre. Inyõ rarybeõhyra: –Kaa wahõrõ sohojile rare. Ibutu aõna aõna ibutu hõrõmy rÿimy raremyhÿ.

³³ Deuxu Jesuisi erydÿÿna mahãdu riwiòhenanytyhyre irybemy relyyrenyreu, kia Jesuisi rubu-ribi ixixana rybemy. Deuxu teysana tamy riwahinyre tule iny sõwemy iluurenyre.

³⁴⁻³⁵ Tai tahe ityhydÿÿdu mahãdu aõna aõnamy rasiranyõhyra. Ityhydÿÿduõ ityhymy rÿirakeki, taheto, tasubede rohonyre tahe nieru Jesuisi erydÿÿna mahãdu-ò diwyde. Idi tahe tii ritxuatxuumy riwahinyre ibutu-ò timybo iny sohoji sohoji tuu rurumy rÿiramy.

³⁶⁻³⁷ Jyje tule kiawesele riwinyre. Tasubedeõ-di rohonyre, idi iòwy nieru diwyde Jesuisi erydÿÿna mahãdu-ò. Jesuisi erydÿÿna mahãdu Jyje rininire, Banabemy. Kiani inyrybe-ò riwiurònanyre, rybe-di wiòhedÿÿdu kiani rare. Tii Levi mahãduõ rare, Xibri bedebutesÿdu tii raremyhÿ.

5

¹ Idi tahe tule ijõ hãbu, Anania ninadu, tahãwyy Safira-wana tasubederenyõ-di rohonyrenyre.

² Iòwy tahe txuralemymy diwyde Jesuisi erydÿÿna mahãdu-ò tasubede òwyreny ibutumy risÿnyrenyleri.

³ Tahe Pedro tamy rarybere: –Aõherekibo Satanasi-ò taholamy araykywo-ki atxiteri Deuxu Tyytybytyhy-ò taruiteri. Aõherekibo iòwyjura-di atxiteri.

⁴ Juhuu asubede tahonyõteu, ahõrõ rare. Aõhe, inatyhy? Inyõ adee rarybeõre idi bohonykemy. Idi tahonyteu, tahe, nieru ahõrõ rare, aõhe inatyhy. Aõherekibo aõbinahãkỹmy tahõtinyteri. Hãbu-ò aõkõ heka taruiteri Deuxu dee.

⁵ Kia-ò Anania roholareu, rurulemy resere. Tai ibutumy iny ruberutyhyre.

⁶ Weryrybò tahe iumy rihetynyre. Tahe rita-madÏÏnymy riwyre rihãloonykremy.

⁷ Inataõ òra bededÏÏnanamy reare tahe Safira, Anania hãwyy rehemynyre. Aõ heka rieryõhyre tahãbu rubuna rieryõhyre.

⁸ Pedro tamy rÏÏraxire: –Tiwesemybo asu teòwynyta –ahãbu rarybere wesele aõbo. Tahe tii dirawyònyde: –Kohe, iwesele rakòwònyre.

⁹ Ixityre Pedro rarybere: –Aõherekibo ahãbu-wana kai taruiteri. Tii teurihite aõbo riwinykeò. Beteheke, weryrybò ahãbu loodÏÏ-ribi rehemynyteri. Tule tii aradykre rubumy.

¹⁰ Tule tii aõwesele rurulemy resere. Weryrybò mahãdu ralore. Tai riwyre ritoonykre tahãbu biremy roikremy.

¹¹ Tai tahe ibutumy ityhydÏÏdu mahãdu ruberure. Ibutumy kia-ò roholareu, tule ruberumyhÏre.

¹² Jesuisi erydÏÏna mahãdu sòwemy wowydyna aõmydÏÏnana riwinyrenyre. Tule deytanawiwihikÏÏtyhy sòwemy riwinyrenyre. ItyhydÏÏdu

mahãdu wii ributunymyhÿre Deuxu dohodÿÿna heto ube-ò. Salomaõ ubetyhy inire.

¹³ Kaa hãwã mahãdu dori sõwemy ruberumyhÿre Jesuisi erydÿÿna mahãdu-ò wiutàdà lau. Tamy rabutuõhyyre ijohonamy. Ihãrele tahe ijõ rityhynymyhÿre, ityhydÿÿdu mahãdumy ralokemy. Aõbinatyhymy heka inyõ ityhydÿÿdu mahãdu dee raryberenyõhyyre.

¹⁴ Ityhydÿÿdu mahãdu rasõwerenymyhÿre. Hãbu, hãwyy tule ralòmymhÿre Inynyrÿtyhy-ò.

¹⁵ Webinadu mahãdu iny ridymyhÿre ryò, hãwã hãwã-ribi. Tai Pedro nonana-ki riraòmym roimyhÿ byretyre-ki, herina tyre-ki. Pedro ubòrò webinadu-txi reakemy tai riteytenykemy rexinohõtinyre.

¹⁶ Ibutumy Jerusalẽ-ribi iòhòmym rÿira mahãdu nade webinadu-di, tule iny tyytybybina-di didyde. Tai tahe ibutumy reytere.

¹⁷ Xiwenawidÿÿdu wedu mahãdu, Jesuisi erydÿÿna mahãdu-ò rexinaanymyhÿre. Tule kiawedu eryna mahãdu riwiòhenanyre. Saduseu imahãdu ni rare.

¹⁸⁻²⁰ Tai tahe xiwe wedu mahãdu, Jesuisi erydÿÿna mahãdu rimyrenyre idi rehurenyre hãwã ròtenawo-ki. Rumy tahe Inynyrÿ ÿjuõ riraynyre ijò, tahe ridyre ahana-ò. Tamyreny rarybere: — Boibenyke Deuxu àlàna heto-ò. Bexideòsinybenyke iny sõwehekÿ-ò. Tamyreny bitÿnynybenyke timybo Jesuisi umytÿmyra inydee riwahinymyhÿre.

²¹ Iwese ÿju rarybere wese, txuu ratÿnyreu, dohodÿÿna heto-ò ralomymhÿre. Tai rierynarenymyhÿre. Tahe xiwena mahãdu wedu dehemynde, tii-wana ratximyhÿ-wana.

Israeli nohõti juradÿÿdu mahãdu ributudÿÿnyre. Ibutumy judeu mahãdu, matuari mahãdu bedeerÿtyhy mahãduõ rare. Tahe soldado itxeredu-ò riteõnyre ròtena-ò iòrysyrenemy.

²²⁻²³ Tahe roirenyre. Ròtena-ki tai rahaõre. Ròòsere tamy relyyre: –Ròtena-ò rehemynyra. Txiòtòbòhòkÿlemy rÿire. Tahe reraynyreu, aõho aõkõ rare.

²⁴ Dohodÿÿna wedu xiwena wedu-wana kia roholareu, tiiboho rexieryrenyõhyyre aõbo riwinyrenykemy, aõhebo rotÿÿnyrenykremy.

²⁵ Iwesemy rõhõtinyrerikõnalemy, inyõ dehemynyde. Tai rarybere: –Ròtena-ki tetidite mahãduõ, dohodÿÿna heto-ki ratxireri. Iny kowa ritohonyreri.

²⁶ Tai tahe soldado dinodu, soldado itxeredu-wana riòryre ta didydenyde ywilemy. Tamy heka aõhe risÿnyõhyyre mana hunadi tamyreny kedehukemy heka soldado rõhõtinyre.

²⁷⁻²⁸ Tahe dehemynyde ritamadÿÿnyre inysõwe weduko-txi. Tahe wedutyhy rybe ritelenyre: – Jiarÿboho heka juhu adeereny rarybere uritere Jesuisi nimy bede erydÿÿrenykõmykremy. Ihãrele tahe tuu tebedeerÿnytenyta ibutumy Jerusalẽ hãwã iny-ò. Ibutu-ò aeryna-di tariate. Wamy tarybetenyteri jiarÿboho Jesuisi rerubunyrenyramy.

²⁹ Tahe Pedro tajoi-wana rarybere: – Iwese Deuxu wadeereny rarybere wese, arityhynyrenykre. Hãbuõ iwitxiramy wadeereny rarybekeki, tiu arityhynyõtyhy.

³⁰ Kaiboho inatyhymy Jesuisi terubunytenyte. Òwòru nihikÿ itxeò-ò tetamadÿÿnytenyte. Inytyby Deuxu tahe rubu-ribi riixixadÿÿnyre.

31 Deuxu tarurunawe-ribi debò-di biu-ò rita-madÿÿnyre ibutu iòlòmý rarekemy, ibutu tarasad-umý rarekemy. Tai ibutu Israeli ijoi mahãdu-ò òraru bedewona ixãwina riwahinykemy.

32 Inyboho heka kia aõmydÿÿnamý robimyhÿrenyrene, tai heka reerymahãrenyrene inatyhy raremy. Inyõ Deuxu rityhykeki, tii Tatyytybytyhy tamy kidiwahinyke. Tii tule kia aõmydÿÿnamý rarybemyhÿre.

33 Xiwena wahidÿÿdu mahãdu wedu tamy roholarenyreu, rakyarananyrenyre, irubudÿÿmy idi ratximyhÿ.

34 Tahe fariseu mahãduõ lamamy rÿire. Õnosõna erydÿÿduõ tii ihÿre. Ibutumý iny tii riijemyhÿre rityhynymyhÿreki. Kamalie heka inire. Tahe tii rarybere: —Jesuisi erydÿÿna mahãdu-di biòlònyke urihimýò ahana-ò.

35 Idi tahe tajoi-ò rarybere: —Hãbu, Israeli mahãdu, bexiijebynyke kia hãbu-ò, aõhebo botÿÿnybenykre.

36 Kaiboho dori õhõtireny beabenyke Teudani-txi. Juhuu dori dinoduõmy tii raremyhÿ. Tii ixìòlòdÿÿnihikÿmy iximý rarybere. Sõwemy heka iny tii-wana raremyhÿ tahe 400 hãbumý ihemy rare. Inyõ tahe rirubunyrene rityhynymyhÿre mahãdu tahe iribi raubÿtÿre. Tahe aõ heka rimyõhyre, ibutumý iõre.

37 Iwixirau ijõ-txi õhõtireny rearenyke. Judasi inire. Tii Kalileia mahãduõ rare. Iu bede dinodu iny-di rariareu tahe, tii rexiòlòdÿÿnyrene. Sõwemy iny riheludunyrene. Tii tule rurure. Taityhydÿÿdu mahãdu tule raubÿtÿre.

38 Tule wahe kahãbu mahãdu rare ixinamý

biteònyke. Hãbu kia aõmydÿÿnana dinodukeki, aõmy aõkõ relekre.

³⁹ Deuxu tahe idinodukeki, tiu heka idi behuõtyhy. Deuxu òludu wesemy heka kai tesumahãte. Tai tahe Kamalie rybe-ò ibutumy rityhynyrenyre.

⁴⁰ Didyde he Jesuisi erydÿÿna. Rihetenyre. Idi tamyreny rarybere: –Rybeõmyke Jesuisi nimy. Tahe ixinamy riteònyre.

⁴¹ Tiiboho iribi rexitarenyre, reysatyhymy ratximyhÿ, Jesuisini òraru-ki dorikÿhe tiiboho aõhõkÿmy rotÿÿnyrenyraki.

⁴² Txuõ txuõlemy Rybewihikÿ ritÿnynymyhÿrenyre dohodÿÿna hetomy dori, heto hetomy tiiboho rarybehymy rÿimyhÿre: –Jesuisi inatyhymy Kristu rare, Deuxu deòdÿÿnamy nade.

6

¹ Tahe ityhydÿÿdu rasõwetyhynymy rÿiramyhÿ. Iu ityhydÿÿdu wytese mahãdu-ò rÿsÿna riwahinymyhÿreu, grego rybedu rexinaanymyhÿre rÿsÿna wahidÿÿdu mahãdu dee. Judeu mahãdu wytese sõwemy rÿsÿna ritamyhÿrenyre waratyrereny. Kia wesemy heka judeukõdu mahãdu rarybere.

² Jesuisi erydÿÿna waò inatxi reurò mahãdu, ibutumy ityhydÿÿdu didydenyde kia aõmydÿÿnana-ò roholakemy. Tahe raryberenyre: –Deuxu rybe erydÿÿ rikiixãwidinyrenykeki, wytese rÿsÿna ariwahinyrenykemy, kia heka òbiti aõkõ rare.

³ Tai tahe kaiboho hãbu mahãduõ bitabenyke ayreny-ribi debò inatxi reurò hãbumy bitabenyke. Hãbu tyhydÿÿnale, Deuxu Tyytybytyhy-di tÿximy

rÿiralemy, iny bedeeryhykÿle, kiaweselemy hãbu bitake. Tiiboho dori aõna aõna ywisidÿÿdumy roirekre, kiawesemy iaõmysÿdÿÿnarenykre.

⁴ Tai jiarÿboho arexitõenywãhãrenykemy watxiwãhãrenyre. Deuxu rybemy ariery-nanymahãrenyke. Kiawese Jesuisi erydÿÿna mahãdu rarybere.

⁵ Ibutumy heka tuu raryberé, tamyreny awire. Tai tahe hãbu mahãdu ritarenyre. Estevaõ ijõre, tii Deuxu Tyytybytyhy-di tÿximy rÿira, tatyhyna-ki tÿximy rÿira. Filipi ijõre, Prokoro ijõre, Nikanu ijõre, Timaõ ijõre, Parmena ijõre, Niolau ijõre, Niolau tahe Atxiòkia mahãdu juhoo rare. Judeu bede erydÿÿna tyhydÿÿdu juhoo tii rare.

⁶ Ityhydÿÿdu mahãdu tiiboho didydenyde Jesuisi erydÿÿna mahãdu-ò. Deuxu-ò rexitõenyrenyre tahe Jesuisi erydÿÿna ityre tebò ritidirenyre.

⁷ Deuxu rybe heka ibutu ijohonanamy rÿire. Ityhydÿÿdu mahãdu-ò sõwetyhymy tamy ralõmyhÿre Jerusalë hãwã-ki. Xiwena widÿÿdu tule sõwemy Jesuisi rityhynyre.

⁸ Estevaõ heka Deuxu luuna sõwemy ratximyhÿre. Sõwemy Deuxu ruru-di ratximyhÿre. Deuxu urihixina nihikÿmy inyko-ò riwinymy raremyhÿ. Aõdeytenawiwihikÿ wesemy tule riwinyre.

⁹ Kowa hãwã-ki tahe judeu dohodÿÿna heto iwitxira rÿimyhÿre. Libertu mahãdumy rexininire tajoi. Imahãduõ Sireneu ludu rare, ijõ Alexÿdria hãwã luduõ rare. Tiiboho doidenyde Estevaõ-wana rybe ritxiõnykemy. Silisia bede luduõ-ribi, Afia bede luduõ-ribi tii-wana doidenyde.

¹⁰ Estevaõ rarybere bedeerynihikÿ-di. Kia mahãdu tahe irybe weseõre. Estevaõ dori, Deuxu Tyytybytyhy-di ihÿre.

¹¹ Tai tahe hãbuõ-ò raryberenyre: –Kaiboho heka Estevaõ dee maruibenykre. Jiarÿboho dori araòwynyrenykre. Kawesemy maruibenykre, my: –Jiarÿboho Estevaõ rybe-ò raholamy rãiwãhãrenyre. Tii Deuxumy aõbinahakÿlemy rarybemyhÿre, Moisesimy tule.

¹² Kia-ki heka Estevaõ dee iny raykarananyre, judeu matuari mahãdu tule tamy raykarananyre. Ibutumy Estevaõ òrysymy roirenyre tahe rimonyre, ridyrenyrybe ywisidÿÿna-ò.

¹³⁻¹⁴ Tahe ruidu mahãdu didydenyde. Tahe ti-iboho raryberenyre, my: –Ka hãbu heka Deuxu dohodÿÿna hetomy ibinamy narybede. Tii rarybere Jesuisi Nazare ludu iny dohodÿÿna heto kidibòhònykre. Jesuisi iny aõmydÿÿnana kidi-witxiranykre, ibutumy Moisesi inydeereny rierynanyre.

¹⁵ Ibutumy iny ywisidÿÿna mahãdu Estevaõ-ò retere. Iòsana, ÿju òsÿnÿwesehekÿlemy tamy ròhòtinynyre.

7

¹ Tahe xiwe wedu Estevaõ-ò rÿÿraxire: –Kia aõbohe inatyhy rare.

² Estevaõ tahe dirawyònyde. Wanyrÿboho, Wahaboho, Ijyymy adeereny arelyykre. Warybe-ò boholabenyke. Mesopotamia bede-ki Deuxu biu-ribi rexitÿnynyre Abraõ-ò, inytybyreny-ò, Harã hãwã-ki rasÿnyõreu.

³ Tamy Deuxu rarybere: –Abede-ribi boibenykre. Alahi riòkòre mahãduy-ribi makre. Manakre ijõ bede-ò adee dori asÿbede ariurihikre.

⁴ Iribi tahe Abraõ Kadeu mahãdu bede-ribi roirenyre Harã hãwã-ò tai rasÿnykemy. Iribi tahe tyby rurureu, Deuxu kaò didyde ka bede-ò titxibo kaiboho wiji tasÿnymahãtemy.

⁵ Abraõ-ò sÿõ riwahinyõre timy urihimyòõhyy. Tahe idi tamy riwahinykemy, iriõre-ò riwahinykemy Deuxu tamy rarybere. Abraõ iriõreõre, ihãrele Deuxu tusÿmy tamy rarybere.

⁶ Tule Deuxu tamy rarybere: –Ariòkòre ijõ bede-ki rasÿnykre 400 beòramy. Kowa ariòkòre heka deòdu wesemy raaõmysÿdÿÿkre. Iwedu mahãdu heka ibinamy idi rarekre.

⁷ Jiarÿ tahe iny ariòwynykre, Deuxu rarybere, ibinamy widi rÿira mahãdu. Iribi ka bede-ò kòdòhònykre wamy kaki reàlàmyhÿkemy.

⁸ Idi urihixinaõ Abraõ-ò Deuxu riwahinyre, tõhòti itxi reakemy. Uladu notyyresyna aõmydÿÿnana tamy riwahinyre. Idi tahe Ijai reareu, Abraõ Ijai notyy riorore debò inataõ reurò txu-di. Iribi tahe Ijai tariòre Ijaò ritõtykyorore. Iribi tahe Ijaò tariòre notyky riorore. Tiiboho waò inatximy riòrenaduõ roire. Inatyhymy tiiboho inytybyreny rare.

⁹ Idi waòsohoji inytybyreny mahãdu Jyje dee rexiwobinanymyhyre. Idi rohonyre Egito-ò ramyhyre mahãdu-ò. Tahe Deuxu tii-wana raremyhÿ.

¹⁰ Iaõhòkÿmy dÿÿnana-ribi Deuxu ritamyhÿre. Egito iòlò, Faraòmy ninadu rare. Deuxu heka Jyje luumy Faraò risÿnyre. Faraò rue-ò heka Jyje

bedeerydÿÿna sõwemy ratximyhÿre. Faraò ibutu dinodumy Jyje risÿnyre. Tule Iòlòheto-di itxeredu tyhymy Jyje ronyre.

¹¹ Ramamy rubu nihikÿ dehemynyde ibutusu-ò, Egito-ki, Kanaã bede-ki. Sõwemy iny aõhõkÿmy rotÿÿnyre. Inytybyreny rÿsÿnaõ-ki rahaõhyre.

¹² Egito maixõmo rÿimyhÿreò, Ijaò roholare. Tahe inytybyreny riteònyre iòrysomy.

¹³ Idi tahe ixityre iòrysomy riteònyreu, Jyje tamyreny rexideòsinyre. Tai tahe Faraò Jyje sÿmahãdu rieryre.

¹⁴ Tahe tyby-ò Jyje tarybe riwahinyre tamy sÿmy kanakemy ibutu imahãdureny-wana. Tiiboho 75 inymy rimyre ibutumy.

¹⁵ Tai tahe Egito bede-ò Ijaòboho roirenyre. Iribi tahe Ijaò rurure. Idi tahe ibutumy inytybyreny rurure.

¹⁶ Tahe iumyreny diwyde ritoonyre wabede-ò, Sikenì hãwã-ò. Abraõ kia wabede juhoo riwyre nieru-di, Emo riòre-ribi.

¹⁷ Deususÿ-õ wahidÿÿna juhoo rarybere Abraõ-ò. Ibededÿÿnana iòhòre Deuxu tamy riwahinykemy. Inyboho Egito-ki rasõwemyhÿreny.

¹⁸ Ikonanau tahe iòlò iwitxiramy ròhònyre Egito bede iòlòmy. Tii Jyje rieryòre.

¹⁹ Tii iny ijoi riitxenanyhÿre. Tii heka ibinatyhyre inytybyreny-ò. Uladu-di heto-ribi rehukemy riteònyre. Tai iny riòreony ituerenyre.

²⁰⁻²¹ Iu tahe Moisesi reare. Tii uladu ruxeratyhyre. Tii tahetotyhykile raumynyre inataõ ahãdumy idi rÿire. Heto-ribi dòhònydeu, Faraò riòre rimyre itibiedÿÿmy tariòre wesemy.

22 Ibutumy Egito bedeerydÿÿnana tamy riery-nanyre. Tii heka rexiòlònyre rybedunihikÿmy aõmydÿÿna widÿÿdu nihikÿmy.

23 Moisesi iny inatxiwa itue beòra-di rÿireu, tamahãdu, Israeli mahãdu roramy nade.

24-25 Egito mahãduõ Israeli mahãduõ rihetenyre, Moisesi tuu robire. Tahe Moisesi tii rirubunyre, Israeli mahãduõ riwiòhenanykemy, Egito mahãduõ rexiòwynymy. Deuxu Moisesi debò-di iny ritakre. Kiamy tahe Moisesi mahãdu rierykremy Moisesi rõhõtinyre. Tahe aõkõre rieryõhyre.

26 Ijõ txu biòwamy tahe Israeli hãbu inatximy wiwana ròrenymyhy. Moisesi ronyre iyreny-txi riixãwididÿÿnykemy. Rarybere: —Kaiboho seriòre toite, aõherekibo wii tehetenytenyteri.

27 Kia òhòtedu Moisesi ritorunyre rarybere: —Mobo he wawedurenymy arasÿnyra, awaywisidÿÿdu renymy.

28 Kai biwarubunyekõ aõbo, iwese kau Egito mahãduõ terubunyte wesemy.

29 Kiarybe-ò roholareu, Moisesi rahenyre Midiã bedè-ò rasÿnykemy. Idi tahe inatxi Moisesi riòremy kowa reare.

30 Iny inatxiwaituemy beòra-di bededÿÿnana riwyre. Tahe Sinai hãwãlò bederahy-ki raremyhy, ÿjuõ tamy rexitÿnynyre bedè rade tòbòhòkÿy-ki tamy roomyhyre.

31 Moisesi kiamy dobideu, bedè riòtiinyre. Tamy itxeremy rehemynyre. Tahe Deuxu rybe-ò roholare.

32 Jiarÿ boreny Deuxu watxireri, Abraõ Deuxu, Ijai Deuxu, Ijàò Deuxu. Tahe Moisesi ruberuty-

hyre, timy heka tamy reteheõhyre.

³³ Tahe Deuxu tamy rarybere: —Awa bitake, suu awarawo ludu dori, brebuna rare. Jiarÿ heka Deuxu watzixeriki, biwatyhynyke.

³⁴ Wiji tahe waijoimy rabireri Egito-ki. Tiiboho aõhõkÿmy rotÿÿnyrenyre. Ibru-ò raholareri, io-hitxi-ò raholareri. Jiarÿ heka aditadenykre iribi. Manake, Egito-ò arateõnykre. Kia heka Deuxu rarybere Moisesi-ò.

³⁵ Ka Moisesi heka Israeli mahãdu juhoo teramy reare. Tamy rarybere juhoo mobo wawedurenymy arasÿnyra, waywisidÿÿdurenymy. Tiile heka Deuxu riteõnyre idinodumy rarekemy, tarasadumy rarekemy. Bederade tõbõhõkÿ ÿju, heõtywoludu, iwiõhedÿÿdure.

³⁶ Tahe Moisesi Egito-ribi iny ritamyhÿre. Egito bede-ki bedeeryna aõna aõna wiwihikÿ-wana. Iwese ahohokÿbesò-ki tule bederahy-ki iny inatxi-waitue beõramy aõmydÿÿnana wiwihikÿ riwinyre.

³⁷ Kaa Moisesi heka rarybere Israeli mahãdu-ò: —Ayreny-ribi, amahãdu-ribi rybedu nihikÿmy Deuxu kiditamadÿÿnykre iwese riwatamadÿÿnyre wese.

³⁸ Kaa Moisesi taijoi-di wii ributunyreu, bederahy-ki ihÿmyhÿ inytybyreny-wana heka ratximyhÿ. ÿju-wana tii ratximyhÿ Sinai hãwãlò-ki iu tamy rarybere. Deuxu rybe tyhy iru-di ratximyhÿ. Tahe rybe bede ywina heka Moisesi-ò Deuxu riwahinyre inydeereny kidiwahinykemy.

³⁹ Tahe inytybyreny ityhydÿÿ deramy rare. Reõbyõrenyre. Ixybyle Egito-ò ròõsekemy rõhõtinyre.

⁴⁰ Tahe iny Araõ-ò rarybere: —Ritxoo deuxuõ

inydeereny biwinyke inykorenymy rakemy. Moisesi, Egito-ribi iny ritarenyre, tahe titxibo ihÿre reeryrenyõre.

⁴¹ Kiatxu tahe broreni riõreõ riwinyre. Tahe xiwemy ritoonyrenyre iko-ò, ritxooko-ò. Rexideysanyrenyre aõbo tebò-di riwinyrenyeki.

⁴² Tai tahe Deuxu rexitare iribi, taina rityhynykemy. Iwese rybeduõ iu tyyriti-ki riritinyre wese:

—Israeli mahãdu, kaiboho xiwena tetoonytenyte, irõdu xiwena tetoonytenyta. Wadee aõkõ tahe kia tetoonytenyta 40 beõramy bederahy-ki.

⁴³ Kaiboho tewytenyta ritxoohe to riõre. Mòlòki inire, aritxoo deuxuni. Tule Renifa taina ijõ aritxoonire. Kia tewinytenyte, tetyhynytenyte wahe. Tai tahe arateõnyrenykre Babilonia weribihikÿ-ò wahe.

⁴⁴ Inytybyreny heka Deuxu rybe bede ywina tyky heto riwinymyhÿre bederahy-ki. Iwese Moisesi-ò Deuxu riteõnyre wesemy kia riwinymyhÿrenyre.

⁴⁵ Iribi tahe inytybyreny tatyby-ribi tyky heto ritare, tii-wana riwymyhÿre kabede-ò, Josue tadinodu-wana. Iu Deuxu iko-ribi riteõnyre, ibutumy tai sÿ mahãdu tii-wana riwymyhÿre, ihyy tahe Davi reare.

⁴⁶ Deuxu heka sõwemy Davi luure. Davi heka rexitõnyre Ijaõ Deuxu dee heto riwinykemy.

⁴⁷ Tahe tii aõkõ riwinyre, Salomaõ iwidÿÿdure.

⁴⁸⁻⁴⁹ Deuxu biukisÿdu tahe hãbu widÿÿna heto-ki rasÿnyõmyhÿre. Iwese Deuxu rybeduõ rarybere wese:

—Biu tahe warynana rare, bede tahe wawa elehyna rare. Timybo inyõ wadee heto riwinyke, Inynyrÿ rarybere. Iwo-ki tahe waelehyna arihynyõkre.

⁵⁰ Deuxu rarybere:

—Ibutumy aõna aõna jiarÿ rewinyre.

⁵¹ Tahe Estevaõ rakonananyre he tamyreny rybena heka rõhõnyre: —Kaiboho araykyterereny. Deuxu Tyytybytyhy rybe-ò taholaõhyymahâtenyete. Iwese iny tybyreny riwinyrenyre wesemy.

⁵² Ibutumy Deuxu rybedu mahãdu-ò ibinamy iny tybyreny riwinymyhÿreny. Tiu ihetxiu Deuxu õbiti hãbu kanakeõ, tiiboho raryberenyreu, rirubunyre irybedu. Kaiboho tahe Deuxu õbiti hãbu-di ijõ-ò tewahinytenyete, terubunytenyete.

⁵³ Deuxu bede ywina ÿju mahãduõ adeereny diwahinydenyete, kia bede ywina kaiboho tetatenyete, tahe tetyhynyõhyymahâtenyete.

⁵⁴ Tahe kiamy Estevaõ rarybereu, tiiboho heka rebure nihikÿre. Urile txyde-ki ruruamyhÿre tamy.

⁵⁵ Estevaõ tahe Deuxu Tyytybytyhy-di iwoki ratximyhÿre. Tahe biu-ò retehere: Deuxu loosõnamy robire. Jesusimy robire lamamy rÿire Deuxu rurunawe-ribi.

⁵⁶ Tahe Estevaõ rarybere: —Jiarÿ wa rabireri biu juxahakÿmy. Jesusimy rabireri Deuxu deõdÿÿna. Lamamy heka rare Deuxu rurunawe-ribi.

⁵⁷ Tahe ryrymyhÿre, tõhõti ritõbõnymyhÿreny, rajjeranyre tamy.

⁵⁸ Ridyre hãwãy-ribi, mana-di tahe tamy rehumyhÿre, rirubunyreny. Erydÿÿna ijyydu tahe

taderamy ririrenyre Saluko-txi tamy riyrubun-
ykemy.

⁵⁹ Iu mana-di rehureu, Estevaõ rexitòenyre: —
Wanyrÿ, Jesuisi, watyytyby kai bimyleke awana
ararekremy.

⁶⁰ Tahe tatiowotimy resere, ryryre: —Wanyrÿ,
kia òraruna iòwydÿÿomyke. Idi tahe rurure.

8

¹ Salu tahe kia òbitimy raremyhÿ ròhòtinyre, Es-
tevaõ rurureu.

² Iribi tahe ityhydÿÿdu mahãdu aõhòkÿmy
rotÿÿnymyhÿre. Judeia wedu mahãdu dori,
iòludumy rÿimyhÿre. Tai tahe ityhydÿÿdu sohoji
sohoji Jerusalẽ hãwã-ribi ròhònyre. Urile Jesuisi
erydÿÿna mahãdu sohojile rÿire. Judeia bede
hãwã mynamyna robÿtÿre, Samaria bede-ò tule.
Tahe hãbu ityhydÿÿduõ Estevaõ umy riwyreny
rihãloonykremy. Tahe rahinymyhÿrenyre,
rirajuamyhÿrenyre.

³ Salu tahe ityhydÿÿdu mahãdu hudumy. Wii
risÿnymyhÿre. Ihetorenywo-ò ralòmyhÿre tahe
ridymyhÿre hãwyy, hãbu, ròtenawo-ò riròtenykemy.

⁴ Iu tahe ityhydÿÿdu mahãdu ijõ bede-ò roire
mahãdu Deuxu rybemy relyymyhÿre ibutu
hãwã-ki.

⁵ Filipi ijõ raremyhÿ. Tii Samaria hãwã-ò re-
mynyre. Tahe Kristumy tamyreny relyyre.

⁶ Iny sòwemy rityhynyrenyre aõmybo Filipi
rarybemyhÿremy. Tahe deytèdÿÿna wiwihikÿmy
iny robimyhÿrenyre, tyytybybina deòdÿÿnamy tule
robirenyre.

⁷ Tahe riteònyreu, tyytybybina iny-ribi ròhònyre, rirajuamyhÿre. Tule iny webinadu raraserasemy roimyhÿre, tule inytiere-wana. Tahe ibutumy riteytenymyhÿre.

⁸ Tai tahe ka hãwã-ki deysana nihikÿ rÿire.

⁹ Samaria hãwã-ki tahe hãbuõ raremyhÿ. Simaõ inire. Tii wodohonana widÿÿdu ihÿre. Iny ri-itxenanymyhÿre. Tahe riòtiinyrenyrene. Tii iximy rarybemyhÿre moõ wiwihikÿmy raremyhÿmy.

¹⁰ Ibutumy iny tii rityhynyrenyrene, hãbu wedu mahãdu tule, hãbu aõtxile mahãdu tule. Tiiboho raryberenyrene: –Simaõ Deuxu ruruna rare. Ruruna nihikÿ inire.

¹¹ Tiu bedeu aõkõ iny riitxenanymy raremyhÿ, riòtiinyrenyrene. Tai tahe rityhynymyhÿrenyrene.

¹² Iu tahe Filipi Jesuisi Kristunimy, Deuxu òlònamy tamy relyymyhÿre. Tai tahe rityhynymyhÿre, raratysebemyhÿrenyrene.

¹³ Iribi tahe Simaõ itxenadÿÿdu tule Jesuisimy reòbyre, raratysebenyrene. Tahe Filipi-wana ihyy ròirenyrene bede òtiidÿÿna-di retehemyhÿre aõbo Filipi riwinyremy.

¹⁴ Samaria hãwã mahãdu tahe Deuxu rityhynyrene. Kia-ò Jesuisi erydÿÿna mahãdu roholare Jerusalê-ki. Tai tahe Pedro Joaõ-wana riteònyrenyrene kowa-ò.

¹⁵ Rehemynyrenyreu, Deuxu-ò rexitòenyrenyrene Deuxu Tyytybytyhy tamy kanakemy.

¹⁶ Inyõ dori Deuxu Tyytybytyhy-di rÿiõmyhÿ. Urile Jesuisi Inynyrÿni-di raratisebedÿÿmy rÿiramyhÿ.

¹⁷ Tahe Pedro Juaõ-wana tebòreny ityrereny ritidire. Tahe Deuxu Tyytybytyhy tamy nade.

18 Kiamy Simaõ robire, aõma, debòtidina-di Deuxu Tyytybytyhy nade.

19 Tai tahe tamy rexitòenyre: —Ka heka wanieru rare. Bidiwahinyke kia ruruna. Tahe inyõ tyre wadebò aritidikeki, tamy Deuxu Tyytybytyhy kanakemy.

20 Tahe Pedro tamy dirawyònyde: —Aõkõre, anieru rakemy watxireri awanale rububede-ò. Deuxu ruruna dori anieru-di biwykemy mohõtinyke.

21 Kia heka aõmysÿdÿÿnakõre wayreny-ki. Arayky, awo, òbitimy aõkõ ratximyhÿre Deuxu dee.

22 Mabedewomy atximahãke aòraruna-ki, aõbo tahõtinyte. Bexitòenyke Inynyrÿ-ò tii òsana aòraruna-ribi araixãwididÿÿnykre.

23 Kai dori texiwaritinymahãte. Aòraruna adi nararotinymyhÿde.

24 Tahe Simaõ tamy rarybere: —Wadee bexitòenybenyke Inynyrÿ-ò, kia aõkõ waki kÿnyikemy, aõmybo tarybetenyteki aõbo.

25 Iribi tahe, Pedro Juaõ-wana Inynyrÿ rybemy rarybemyhÿrenyde, relymyhÿrenyde tai. Sõwemy Samaria bedede hãwã hãwã-ki Rybewihikÿ relymyhÿre, Jerusalẽ-ò ròòserenyreu.

26 Filipi Samaria hãwã-ki raremyhÿ. Tahe Inynyrÿ ÿjuõ tamy rarybere: —Bexiywinyke, make ibòò-ò. Kasa hãwã ryhykÿ bimyyke. Jerusalẽ-ribi ryy rare, bederahy-ki rare. Tahe Filipi rare.

27-28 Tahe inyõ-wana wibymy reare. Tii Etiopia bedede luduõ rare. Etiopia bedede iòlò hãwyyõ rare. Kanasi inire. Inieru-di itxeredu kahãbu rare. Tii enuku rare. Tii ròòsereri Jerusalẽ-ribi.

Kowa Deuxu reàlàmy rare, tahe tasÿ-ò ròòsere iawarutewedile. Isaia Deuxu rybedu tyyriti-di rariamy tii rononymhÿre.

²⁹ Deuxu Tyytybytyhy Filipi-ò rarybere: —Make, awarutewe-ò, mariake ibire-di.

³⁰ Tahe Filipi tamy rajjaranyra. Roholare tyyriti-di rariareriò. Tahe Filipi rÿÿraxire: —Kai aõbo teeryte aõbo rare, aõdibo tariateri.

³¹ Tahe dirawyònyde: —Aõkõre, inyõ dori wadee ritÿnynyõre. Timybo arierykremy. Manaòwònyke wabire-ò bodonyke. Tahe Filipi raòwònyre.

³² Tii kia-di rariareri tyyriti-ki:
—Iwese iny budoeni rubudÿÿdu-ò riwyre wese, tii iwesele ridyrenyre. Budoeni-ribi iny isira riororeu, rirajuaõlere. Iwesetyhyle Tii rary-beõlere.

³³ Iehehenamy tamy raryberenyre wese hãbu ehehe wesena, òbitimy aõkõ idi riywinyrenyre. Inyõ rarybeõtyhy iriòkòremy, iumy dori bede-ribi ituera.

³⁴ Tahe tii Filipi-ò rarybere: —Wadee manarybeke momybo rybedÿÿdu rarybereri, iximy aõbo ada ijõmy aõbo.

³⁵ Tahe Filipi kia Tyyritidile rexidelenomy relyyre. Jesusimy Rybewihikÿ Tÿmyramy tamy relyyre.

³⁶ Rydi rariamyhÿre idi rehemynyrenyre beõ-ò. Tahe tii Filipi-ò rarybere: —Kowa bera rare. Biwaratisebenykekõ aõbo, adee awikeki.

³⁷⁻³⁸ Tahe Filipi dirawyònyde: —Awire wadee. Inatyhymy araky-ki tetyhynyte-wana, aratisebenykre. Tahe rarybere: —Retyhynyre, inatyhymy Jesuisi Kristu Deuxu Riòre raremy. Tahe tewe irira riixãwidinykemy riteònyre. Tahe

itewe-ribi ròhònrya, bera-ò riberenyre. Tahe riratisebenyre.

³⁹ Bera-ribi rotuoreu, Filipi aõwesele iõmy reare. Inynyrÿ Deuxu Tyytybytyhy ridyre. Hãbu ixyby Filipimy robiõhyyre. Tahe tary-di rariamy rare. Teysanatyhy-di tÿximy rare.

⁴⁰ Idi tahe Filipi rexieryreu, Asoto hãwã-ki rehemynomy raremyhÿ. Iribi tahe Rybewihikÿ-di relyyre ibutumy hãwã hãwã-ki. Ikonana tahe Sesaria hãwã-ò rehemynyre.

9

¹ Salu rarybemy raremyhÿ, Inynyrÿ Jesuisi ityhydÿÿdu mahãdu rubudÿÿmy. Tii rarybemy raremyhÿ Deuxu dohodÿÿna heto wedu-ò.

² Tamy rexitòenyre: —Arybe tyyriti ariwykremy watzireri Damasu hãwã dohodÿÿna heto wedu-ò. Tai tahe kowa-ki ityhydÿÿduõ-txi areakeki, aõtxile hãbu hãwyy aõbo, aridykemy Jerusalê hãwã-ò, ariròtenykemy.

³ Tahe iòhòmÿ Salu rare Damasu hãwã iròte iòhò-di, idi tahe loosònahakÿ Salu tyre resere.

⁴ Tahe bedè-txi resere, tahe rybeõ roholare: — Salu, Salu, aõherekibo aõna aõnamy ibinamy wadee tatÿÿnymahãte.

⁵ Tahe tamy rarybere: —Mowexe, Wanyrÿ atxiteri. Tahe rirawyònyre. —Jiarÿ Jesuisi watzireri, aõna aõnabina binamy wadee tadotÿÿnymahãte wahe.

⁶ Myike, mariamy tahe hãwãhãkÿ-ò malokre. Taita inyõ adee rarybekre aõhebo botÿÿnykremy.

⁷ Tahe Salu ijoi riòryre rybeõhyy rÿimyhÿ. Rybe-ò roholare, tahe tuu robiõhyyre.

8 Salu suribi rÿireu, iruetà wesele heka ratx-
imyhÿ. Tahe hãbu tii-wana ihÿmyhÿ heka iaxiò-ki
idi rimymy idi rare Damasu hãwã-ò.

9 Tahe hãwãhãkÿ-ki txu inataõ txu idi rÿire aõmy
robiõhyyre, riroxiõhyyre, bemy riõõhyyre.

10 Damasu hãwã-ki ityhydÿÿdu wihikÿ rasÿnyre.
Anania inire. Wanyrÿ Jesuisi tamy rarybere rasi
weselemy: —Anania. Tahe rirawyònyre: —Aõbo
rare, Wanyrÿ, kakile watxireri.

11 Tahe Jesuisi riteònymy rarybere: —Myike,
make òbitiry-ò, Judasisÿ heto-ò. Tai bitÿÿraxinyke
titxibo Salu ratxirerimy. Tarso hãwãludu tule
rininire. Tii wiji wadee rexitòenyre.

12 Tii umy robireri tarasi-ki. Kai tehemynteri
wese, irue-ò ebò bitidikemy, biteytenykemy.

13 Anania Jesuisi-ò rirawyònyra: —Wanyrÿ,
sõwemy kia hãbumy rybe-ò raholara. Aõbina
binamy ityhydÿÿdu-ò risÿnymy raremyhÿ
Jerusalẽ-ki.

14 Deuxu dohodÿÿna heto wedu tyyriti diwyde
kaki ityhydÿÿdu rutysÿny rirutekemy.

15 Tahe Inynyrÿ tamy rarybere: —Aõwaxina tamy
makre, Jiarÿ dori, kia retara wadee aõmysÿdÿÿdu
nihikÿmy rarekemy, judeukõdu mahãduko,
iòlòrenyko, tule Israeli mahãduko wanimy
rarybekre, aõma, warybetÿmyra wihikÿmy.

16 Tamy aritÿnynykre tiwesebo aõhõkÿmy
rotÿÿnykre wanimy rybeòraru-ki. Kia ibutumy
Jesuisi rarybere Anania-ò.

17 Idi ta Anania rare tamy Judasi heto-ki. Ralòm
rahudi, tahe, tebò ityre ritidira. Tahe rarybera: —
Salu, waseriòre, Inynyrÿ adee riwateònyra. Tiile,

Jesuisile heka ryro-ki adee rexitÿnynyre. Tiile heka riwateònyra arue ritxuakemy, tule Deuxu Tyyty-bytyhy atykmy ralòkemy.

¹⁸ Tahe aõwesele irue-ribi rejujura aõ yjy wesele. Tahe ixityre robira. Idi rÿimy rahudi tahe, Anania riratysebenyre.

¹⁹ Idi riroximy rahudi tahe, inatyhymy raru-ruterenyre. Tahe Damasu hãwã-ki tiwese txubo idi rÿire kia erydÿÿna mahãduy-ki.

²⁰ Idi dohodÿÿna heto-ki rybe ritÿnynyre. Rarybere: —Jesuisi heka Deuxu Riòrele rare. Kiawesele rybe-di ritynynymyhÿre.

²¹ Tahe uri ijohonadu mahãdu urile bede riòtiinymy rÿimyhÿ. Tahe inyõ rarybere: —Kia aõ heka ityhydÿÿdu rubudÿÿdule ratxireri, Jerusalẽ-ki. Kiale heka kaò nade ityhydÿÿdu ritaataamy ridykemy dohodÿÿna heto wedu-ò.

²² Salu tahe ire riixiòlòdÿÿnymyhÿhyyre. Judeu Damasu hãwã ludu rieryõhyymyhÿ aõmybo rarybemy. Tii rarybere: —Jesuisi Kristule rare, Deuxu deòdÿÿna rare.

²³ Tiwese txubo txu idi rÿidi tahe judeu mahãdu rarybere irubudÿÿmy.

²⁴ Tahe Salu rierymy rÿimyhÿ tahe inonana-ò rexiywinymy rÿimyhÿ. Rummy tahe, txummy hãwã ijò-ki rirubunykemy retehemy rÿimyhÿ.

²⁵ Tahe ijõ erydÿÿna mahãdu weriri nihikÿ riwinyre. Rummy tahe Salu riòlòdÿÿnyre òtity nihikÿ kanaweribi-ò, hãwã ahanaube-ò.

²⁶ Salu Jerusalẽ-ò rehemynyre, ityhydÿÿduky-ò ralòkemy ratxireri, tahe urile ilau ruberummy rÿimyhÿ. Erydÿÿna mahãdu rõhõtinyre: —Tii

ityhydÿÿdu inatyhy aõkõ ratximyhÿremy.

27 Banabe tahe rityhynomy ridyre Jesuisi erydÿÿna mahãdu-ò. Tahe relyyre iwese Jesuisi Salu-ò ryki rexitÿnynyremy tamy raryberemy. Tule relyyre iwese Jesusinimy Salu rybe ritÿnydÿÿnymyhÿremy, Damasu hãwã-ki.

28 Tahe taihy Salu ratximyhÿre. Tiò tiòle reamy ratximyhÿre rybe ritÿnydÿÿnyrerimy ihÿre, ruberumy aõkõ.

29 Salu rarybera grego rybe heka erydÿÿna mahãdu-ò. Widee rarybehyyemyhÿrenyre. Idi tahe kia mahãdu Salu rubudÿÿmy roromyhÿre.

30 Ityhydÿÿdu seriðre kia rieryreu, tahe Salu ridyrenyre Sesaria hãwã-ò. Iribi tahe Tarso hãwã-ò riteðnyre.

31 Idi tahe ywina reare ityhydÿÿdu mahãduy-ki. Ibutumy hãwã bedemy, Judeia, Kalileia, Samaria, ityhydÿÿdu mahãdu iruruteremy relere. Ibutumy Inynyrÿ dee òbitina-ki rariamyhÿre, rityhynomyhÿre. Deuxu Tyytybytyhy teysatyhymy tamy riwahinyre. Sõwemy tahe ralore iheki ityhydÿÿmy.

32 Ibutumy hãwã hãwãmy Pedro rariamyhÿre. Tule robehere Lida hãwã-ò ijõ ityhydÿÿdu mahãdusÿ-ò.

33 Tai Eniamy ninadu-txi Pedro reare heka rare. Iumy heka imyremyrehkÿ heka rare. Debò inataõ reurò beõramy heka herina-ki bede idi rÿire

34 Pedro rarybere tamy: —Enia, Jesuisi Kristu arateytenykre. Myike, aherina biyrubunye. Aõwesele hãbu rÿira.

35 Ibutumy Lida hãwã mahãdu Saronã hãwã mahãdu tuu robire, tai Inynyrÿ rityhynyrenyre.

36 Jõpe hãwã-ki hãwyy ityhydÿÿdu rasÿnyre. Tabita inire. Kiani riwiurõnyre, watxi wese heka rare. Kia heka aõwiihikÿ widÿÿdu heka rare. Aõna aõna sõwemy iny-ò riwahinymyhÿre.

37 Ijõt_{xu} heka webinadumy resere, ihyy ta, rurure. Risuhõmy rahudi tahe, ritidire hetowo ratyaluduwo-ò.

38 Laida hãwã iõhõmy rÿire, Jõpe hãwã-ribi, Ityhydÿÿdu roholare Pedro Lida hãwã-ki ratximyhÿreò, tahe hãbu inatxi diteõnyde Pedro òrysymy. Uritere eleõkõmy kanakemy tii-wana.

39 Pedro tahe tii-wana rare. Rehemynyrenyreu, tahe ridyre hetoratya ludu wo-ò. Ibutumy wytese mahãdu robumy rÿimyhÿre, rubuweroramy. Tahety, tatyboho ritxeredÿÿnymy tamy riwinyreò.

40 Tahe Pedro rarybere ibutumy rexitakemy. Tahe rexitõnyre taowotimy resemy. Tahe rexiòkesere rubu-ò rarybekemy: –Tabita, myike. Tahe irue raraynyre tahe Pedromy robire, tahe ronyre.

41 Pedro tebò tamy riwainyre tahe rÿire. Tahe wytese-ò, ityhydÿÿdu-ò rryre. Tamy riteòsinyre hãwyy irulemy roirerimy ihÿremy.

42 Jõpe hãwã mahãdu ibutumy kia rieryre. Sõwemy iny tahe Inynyrÿ rybe rityhynyre.,

43 Txu sõwemy Pedro Jõpe hãwã-ki ihÿmyhÿ Simaõmy ninadu heto-ki. Simaõ heka iròduty wysydÿÿdu rare.

10

¹ Italia soldado mahãdu dinodumy raremyhÿ. Oreniliu inire. Sesaria-ki rasÿnyre. Tii òbitimy nodu rare, isÿ mahãdu-wana.

² Tii uriwahidÿÿna diwahinyde tule sõwemy rex-itòenyre Deuxu-ò.

³ Aõutxu inataõ òra bedeu iòhòmÿ, rasina wesemy Deuxu ÿjummy tii robira, tamy rehemynreri. Tahe tamy ryryre:

⁴ –Oreniliu, rimasajuare-ribi riwawyònyre: –
Aõherekibo, Wanyrÿ. Tahe ÿju rarybere
Oreniliu-ò: –Aexitòedÿÿnamy Deuxu
rierymyhÿre. Tule ijõ-ò awahisina Deuxu
rierymyhÿre.

⁵ Biteònyke eòdubohoõ Jòpe hãwã-ò Simaõ Pedro òrysymy.

⁶ Tii Simaõ iròdutyky iyxidÿÿdusÿ-ki ihÿre, bera ijà iòhò-ki.

⁷ ÿju rybedu rexitareu, teòdu inatxi-ò ryryre. Tule tasoldado mahãduy-ribi inyõwihikÿ rihitxinyre.

⁸ Kia ibutu-ò relymy rahudi tahe riteònyre Jòpe hãwã-ò.

⁹ IjõtXu txutyetxuu, tiiboho hãwã-ò iòhòmÿ ròire. Kiaule Pedro raòwònymy rÿimyhÿ hetotyre-ò rex-itòenykemy.

¹⁰ Rama risamy ratximyhÿ tahe riroxikemy ixi-di ihÿmyhÿ. Rÿsÿna riraòmÿ rÿimyhÿ. Idi rasi wesemy rõhõtinyinmy rÿire.

¹¹ Tahe robire: biuwetyy ruamyhÿre wese tuu robire. Rià wesemy aõna tamy dobehede.

¹² Rià wo-ki ibutumy iròdu, nawii, hemylala, aõbo dòkõnakõnale.

13 Rybeõ-ò roholare: —Myike, Pedro, birubun-
yke, biroxike.

14 Pedro rirawyònyra: —Aõkõre, Wanyrÿ. Kia
dòkõna reròkõhywãhãre, isuisure dori. Ixityre
tamy rarybere:

15 —Aõbo Deuxu risuhore wese isuisumy ry-
beõmyke.

16 Ixityre narybede. Iu tahe aõwesele ridyre
biu-ò.

17 Tahe Pedro kia aõbo raredi heka rõhõtinyreu,
Oreniliu-ribi hãbu mahãdu rehemynyre. Simaõ
heto riijemyhÿ tahe ijòhòkÿkile rahare.

18 Tahe ryyrynyre: —Simaõ Pedro aõbo kakile
ratxireri.

19 Pedro, tatxuu rasina-di rõhõtinyreu. Deuxu
Tyytybytyhy tamy narybede:

20 —Myike tahe, bobehেকে. Inataõ hãbu dori
araijereri. Tii-wana makre adee dori aditeònyde.

21 Tai Pedro robehere. Tamy rarybere: —Jiarÿ
aòrysydu rare. Aõherekibo tòitenyte.

22 Tahe rirawyònyre: —Oreniliu hãbu òbiti rare.
Tii Deuxu dee ijohonaduõ rare. Ibutumy judeu
bede mahãdu awiremy tuu rarybemyhÿre. Ïjuõ
tamy rarybere aòrysymy kiditeònykremy, adee ro-
holakremy.

23 Tahe Pedro tamyreny rarybere: —Kakile iny-
boho ròkòrõrenykre.

Ihewoludu txu, rÿidi tahe Pedro tiiboho-wana
ròirenyra. Ijõ

ityhydÿÿdu seriòre tule roirenyra.

24 Ijõ hewo ludu txu Sesaria-ò rehemynyrenyre.
Oreniliu tii riraòmyhÿre. Taijoi mahãdu

tabiòwawoludu mahãdu-wana ributunymy rÿimyhÿre.

²⁵ Pedro rehemynymy raloreu, Oreniliu ròhònyra heto-ribi tahe tatiowotimy iko-txi resere riwowydynkemy.

²⁶ Tahe Pedro ritamadÿÿnyre. Rarybere: — Mynyike wahe. Jiarÿ hãbule watxireri.

²⁷ Tahe rarybemy ralòmyhÿ, sòwemy wii ributunyreriò itxi reare.

²⁸ Ta Pedro tamyreny rarybere: —Judeu mahãdu iny witxira mahãdu-wana wibutudÿÿòmy, iòhòmy wiribi riraòmy. Kia teerytenyte. Deuxu dori riwaerynadÿÿnyre kia wese aròhòtinykre. Iny wiwese wiwesele raremy aròhòtinykemy.

²⁹ Tahe tai waòrysomy teteònyteu, aòtaximy anademy wanohòti rÿire. Tai tahe adeereny arÿÿraxikre. Aõherekibo waòrysomy aòtaxina teteònyte.

³⁰ Ta Oreniliu rirawyònyre: —Inaubiòwa txumy txu rÿire tahe hãbu tyky tÿrÿrÿhÿkÿ-di wako-txi rexitÿnyra. Iule wesemy tahe waheto-ki rexitòenywãhãre.

³¹ Tahe wadee rarybera: —Oreniliu aexitòedÿÿna-ò Deuxu roholara, ijò-ò awahisina rieryra.

³² Bìteònyke Jòpe hãwã-ò Simaõ Pedro òrysomy. Simaõ, iròdutyky iyxidÿÿdusÿ-ki ihÿre bera ijà iòhò-ki.

³³ Aòwesele tahe, aòrysomy reteònyre. Awimy tahe tateriki rahara. Inyboho kakile ributunymy ihÿrenyre, aroholakemy ibutumy Deuxu-ribi aòmybo manarybekemy.

³⁴ Tahe Pedro rarybere: —Deuxu dee iny ibutumy

wiwese wiwesele rare. Kia reeryre.

³⁵ Ibutumy bedede hãwã ludu Deuxu rityhynykeki, aõbo tamy õbiti riwinykeki, tii Deuxu ixidee rimyke.

³⁶ Kia rybe tahe Deuxu riwahinyre judeu mahãdu-ò. Rybewihikÿywina kia diwyde inydeereny bedeerynamy. Kia Jesuisi Kristumy rarybere ibutunyrÿna kia rare.

³⁷ Joaõ ijõ ratyusebenamy rarybere, idi tahe kia rybe hãletedÿÿmy rexidelenyre Kalileia-ki. Tahe ibutu judeu mahãdu bedemy rarybere. Kia kai-boho teerytenyte.

³⁸ Iwese Deuxu Tyytybytyhy, taruru-wana Jesuisi Nazare ludu tyre-ki ditxiwide wesemy relymyhÿre. Iwese Jesuisi reamy raremyhÿ wesemy aõwihikÿ riwinymyhyremy, tule iny Diabo rurawo-ki ratxirerimy ihÿre Jesuisi iribi riteõnyre, ta reteytenymyhyre. Deuxu dori Jesuisi-wana ihÿre. Ibutumy kia teerytenyte.

³⁹ Tahe ibutumy judeu mahãdu hãwã-ki riwinymyhyre, idi itxeredumy inyboho roiremyhyre. Ihãre tahe tii Jesuisi rirubunyrenyre, õwòru itxeò nihikÿ-ki ritõhãletenymy ritamadÿÿnyrenyre.

⁴⁰ Inataõ txu-di tahe Deuxu rubu-ribi riixixanyre, tahe tii riteõsinyre inyõ-ò.

⁴¹ Tatarasanaõòle Deuxu Jesuisi ritÿnydÿÿnyre. Kia heka inyboho roire tii-wana riroxirenyreki, riõrenyreki, iixixana hewomy.

⁴² Deuxu rarybere: –Jesuisi hitxidÿÿdu iny wiribi ywisijuradÿÿdu rareke, iru mahãdu dee, rubu mahãdu dee. Kiamy heka Deuxu

iny-ò ritÿnytedÿÿmy, ta inyboho rokoirekemy diwahinyde.

⁴³ Ibutumy iny Jesuisinimy tamy rityhynykeki, iòraru-ribi iny riixãwididÿÿnyke. Kia ibutumy ihetxiu rybedu mahãdu rÿimy rarybemy raremyhÿre. Kia heka Pedro tamyreny rarybere.

⁴⁴ Pedro rarybemy raremyhÿu, Deuxu Tyytybytyhy ibutu rybe-ò ijohonadu tyre-ki resemý ralore.

⁴⁵ Pedro-wana rare mahãdu, judeu mahãdu òbiti, tahe riòtiinyre judeukõdu mahãdu-ki Deuxu Tyytybytyhy ralòmý rareki.

⁴⁶ Raholare dori rybe witxira-di raryberenyreò, tiibocho Deuxumy heka reàlàmyhÿre. Tahe Pedro tamyreny rarybere:

⁴⁷ —Inyõ rarybeõkre, iratysebedÿÿõmykemy, tii-bocho dori Deuxu Tyytybytyhy-di ratxirenyre iny-weserenyle.

⁴⁸ Tahe Jesuisi Kristu nimy iratysebenykemy riteònyre. Tahe rexitòenyrenyre Pedro idi iyreny-ki ijõ txumy ramyhÿre.

11

¹ Judeukõdu mahãdu Deuxu rybe roholamy rityhynymyhÿre. Kia-ò tahe Jesuisi erydÿÿna mahãdu roholare kiamy ityhydÿÿdu seriòre mahãdu tule roholare. Judeia bedu ludu ratximyhÿ mahãdu ibutumy kia rare.

² Pedro ixityre Jerusalẽ-ò rehemynyreu, tahe judeu ityhydÿÿdu mahãdu tuu tamy narybede.

³ Kia heka, Pedro, judeukõdu mahãdu-wana wiwo-ki atxiteri, tii-wana teroxiteri. Tai tahe ibinamy raharenyre.

4 Iribi tahe Pedro ikoreny relyyre ibutumy taaõna aõnamy. Kia wesemy Pedro rarybere:

5 –Jòpe hãwã-ki watxiwãhã. Tahe rabire rasi-nawesemy rià nihikÿ biu-ribi robehere-ò. Iwese inyõ iòhòti inaubiòwa-ki rimymyhÿre wesemy wadee robehemy roimyhÿre.

6 Tahe aõbo heka iwo-ki ratximyhÿdi, reteheni-hikÿmy rãiwãhã iròdu deborehekÿ wesemy ratximyhÿ iwo-ki. Abòròrò wesemy tai ratximyhÿ, iròdu wese, nawii wese tai ratximyhÿ, inyboho rirÿsÿõmyhÿre wesemy.

7 Iribi raholare rybeõ-ò: –Myike, Pedro, birubunyke hewa aõtxile birubunyke tibo biròkemy. Aõkõrewa Wanyrÿ, tiu heka reròõwãhãre. Judeu mahãdu bede ywina heka tiu iny kia riròõtyhy.

8-9 Tahe ixityre rybeõ tamy rarybere: – Marybeõke kia ibinamy. Aõbo Deuxu awimy rarybere, kia wiji tahe ibinamy aõkõ rare. Deuxu dee awikeki, kia awi rare.

10 Inataõ heka tuu rotÿÿnyre. Iribi tahe kia rià, ibutu-wana iõre biuribihyy heka iõre.

11 Iribi tahe hãbu inataõ dehemyntymy deade tai watxiwãhã-ò. Tii diwaòryde riwadykremy Sesaria hãwã-ò.

12 Tahe Deuxu Tyytybytyhy wadee rarybere tii-wana arakremy. Nohòtiõmy heka aõbo judeukõdu mahãdu raremy. Tii-wana makre ele elemy. Tahe kia debò sohoji reurò seriòremy wahemy rare. Tahe retehemynyrenyre waòrysymy riteònyrenyre heto-ò tahe ralòrenyre Oreniliu heto-ò.

13 Iribi tahe Oreniliu rarybere iwese ÿju

ihetowo-ki tamy rexitÿnynyremy rarybereri: — Oreniliu, inyõ biteònyke Simaõ Pedro òrÿsomy Jòpe hãwã-ki.

¹⁴ Tii rybe tÿmyraõmy adeereny kanarybekre. Tai tahe ibutumy asÿ ijoi-wana aõraru-ribi kanatakre. Kia Oreniliu inydee rarybere.

¹⁵ Iribi tahe jiarÿ Rybewihikÿmy rexidelenymy rarybere tamy. Pedro rarybere. Urile tahe roholare, tahe aõwesele Deuxu Tyytybytyhy ityreneny resere iwo-ò ralòkemy iwese watyreneny resere wesele juhuu.

¹⁶ Tahe Jesuisi rybe wanohõti itxi reare tiubo raryberemy: —Joaõ heka inatyhymy bedi iny ratischebenyre, kaiboho tahe Deuxu Tyytybytyhy-di akanasebedÿÿdenykre.

¹⁷ Judeukõdu mahãdu Inynyrÿ Jesuisi Kristu rityhynymyhÿre. Tai Deuxu tamy diwahinyde iwese wadeereny juhu riwahinyre wesetyhyle. Deuxu Tyytybytyhy uriõno wesele tamyreny diwahinyde. Mobo jiarÿ raremy wahe tuu Deuxu dee aõmy ararybekemy.

¹⁸ Iribi Pedro rybe-ò roholareu tahe timyhe tamy irybekõna. Tule Deuxu riwowydynyrenyre: —Inatyhy wa rare Deuxu heka judeukõdu mahãdu-ò heka umytuedeõna riwahinyre. Inyõ rityhynykeki, ixirahikeki, tarasana rimyrenykre.

¹⁹ Iu tahe Estevaõ rurureu, ityhydÿÿdu aõhõkÿmy rotÿÿnyreu tahe, ityhydÿÿdu mahãdu Jerusalẽ-ribi ròhònyre. Tii heka relyymyhÿre Rybewihikÿmy judeu mahãduòle kÿny wahe, iwitxira witxira-ò aõkõre. Tahe ibutu bedè-ò ritelenymy ròirenyre. Senisia-ki relyyre. Xibri bedebute-ki tule relyyre, Atxiòkia hãwã-ki tule

relyyre.

²⁰ Ijõ ityhydÿÿdu mahãdu Jesuisi Rybewihikÿ tÿmyra rarybere. Tiiboho Xibri bedebute-ribi røhønyre, Sireni-ribi ijõ rybedu røhønyre Atxiøkia-ò. Tiiboho relyyre judeukõdu mahãdu-ò tule.

²¹ Deuxu riwiøhenanyre søwemy iny rityhynyre, Jesuisi ryò ralørenyre.

²² Jerusalẽ ityhydÿÿdu mahãdu kiamy roholare. Tai tahe Banabe riteønyrenyre Atxiøkia-ò.

²³ Banabe rehemynyreu tahe, tuu robire aõbo Deuxu kowa riwinyrerimy. Tai tahe reysare. Tahe ityhydÿÿdu tÿmyra-ò dohodÿÿmy, riwiøhenanykremy: –Iøhøtyhymy Deuxu-ribi atximahãbenyke, aworibityhy Deuxu bityhynybenyke.

²⁴ Banabe heka hãbu wihikÿ rare. Tÿxihikÿlemy Deuxu Tyytybytyhy-di ratximyhÿre. Ibutumy ratximyhÿre tyhydÿÿna-di. Søwemy iny rexirøtenyre Inynyrÿ mahãdu-ò.

²⁵ Idi tahe Banabe rare Tarso hãwã-ò Salu ijesemy.

²⁶ Tai rahareu tahe, didymyhe døkøsemy nade Atxiøkia-ò. Sohoji beøramy idi bede rierenyre. Søwemy iny ribedeerynymyhÿrenyre. Atxiøkia hãwã-ki ityhydÿÿdu mahãdumy raninira Kristu wese mahãdumy. Kiani tamyreny riwahinyre.

²⁷ Aøutxu tahe dehemynyde Deuxu rybedu mahãduø Jerusalẽ-ribi Atxiøkia-ò.

²⁸ Ijõ Abusi inire. Iribi tahe tii rarybere Deuxu Tyytybytyhy rybemy. Ramamy rubu nihikÿ kanakremy raxireri, ibutu suò. Laujiu iøkømy raremyhÿu, kiamy rotÿÿmyhÿre.

29 Tai tahe ityhydÿÿdu mahãdu he nieru riwahinykremy rÿire Judeia bede sÿdu ityhydÿÿdu riwiòhenanykremy. Tahe nieru riwahinyre tiwe-sebo idi ratximyhÿre wesemy tamy riwahinyre.

30 Tahe nieru riteònyre, moma-wana Banabe Salu-wana Jerusalẽ dohodÿÿna heto matuari mahãdu-ò riwyre.

12

1 Kia bededÿÿnanamy heka Herodi judeu iòlòmý raremyhÿ. Iribi tahe rexidelenomy riwinyre heka ityhydÿÿdu mahãdu kia òludumy risÿnykre myhÿ. Tii riteònyre aõna aõnamy risÿnykemy ityhydÿÿdu mahãdu-ò.

2 Tii mayrehe-di rubudÿÿmy riteònyre Joaõ seriòre wahe, Txiau wahe.

3 Tai tahe judeu wedu mahãdu heka tamy wi-hikÿlemy tuu rotÿÿnyre. Herodi rierymy raremyhÿ idi Pedro rimyre. Tahe worana bedehesi rÿire. Paõ taurina ihoõ inire. Kia ibutumy rotÿÿnyre kia bedehesi rÿireu.

4 Tahe Pedro riròtenyre, ròtenawomy wirutyre. Aõmamy soldado mahãdu inaubiòwamy iitxeredumy rÿimyhÿre. Pascoa kia worana bedehesi konana txu rexihumy rÿireu tahe, judeu mahãdu-ò riwahinykre. Kia Herodi rexinohõtíðÿÿnyre.

5 Ròtenawo-ki tahe Pedro ratximyhÿre. Ityhydÿÿdu mahãdu tahe Deuxu-ò rexitòenyhyymyhÿre Pedro tòenamy.

6 Txubiòwamy tahe itxu riywinyrenyre iny sòwehekÿ-ò Pedro riwahinykemy. Kiamy Herodi ròhõtínyre. Ruu tahe Pedro ròròmý roimyhÿ. Inatxi soldado heka idile ratximyhÿre. Pedro

womati reroti inatxi-di ratisamy roimyhÿre. Ijõ soldado rotena ijò-ki ratximyhÿre.

⁷ Inynyrÿ ÿju heka Pedro weribi rihetenyre ri-ixixanykemy. Loosòna itÿnyhÿkÿlemy ròtena ri-toosònyre. Tamy rarybere: —Wylemy wa rex-iukÿnyke. Tahe aõwesele Pedro axiò-ribi womati rerotihikÿ rejuxunyre.

⁸ Tahe ÿju tamy rarybere: —Awamy birutyke, bexitynyke. Kiamy riwinyra. Ijõ arahana birutyke tahe biwaheludunyeke.

⁹ Iribi ròhònrya he tai ròròreri-ribi wahe. Kia ibutumy heka rasi weselemy Pedro ròhòtinyre ri-eryõre inatyhy aõbo ada rasi aõbo.

¹⁰ Juhu heka ikoludu soldado mahādumy reare idi ihewoludumy reare iribi rehemynomy rÿire ahana ijòtyhy-ò. Womatilere heka iijòtòbònare. Ixiwanale heka rarayre ijòtòbòna. Iribi tahe roirenyre hāwāry-di ririranyrenyre. Idi tahe ÿjuhe iõre iribi.

¹¹ Tahe Pedro ròhòtinyre, rieryre heka aõhebo rotÿÿnyraò. Wanyrÿ ÿju riteònyre riwatara Herodi-ribi judeu mahādu-ribi. Katahe wadee aõhe rotÿÿnyrenyõtyhy.

¹² Ròhòtinomy rÿire juhūu urihimyo idi tahe rare Marie heto-ò. Joaõ Markuse heka tii rare. Tai ityhydÿÿdu mahādu rÿimyhÿ tahe rexitòenyre reriò Pedro tamy rehemynyre.

¹³ Tahe ijò he rihetenyre. Ijòtàbòna-ò nade mobo raremy rierykemy ijadòma deòdu. Rode inire.

¹⁴ Tahe Pedro rybe rieryra. Reysamy rai-jaranyre iwo-ò. Pedro tahe ralòõlemy rÿire. Tahe relyyre Pedro heto ijò-ki rÿimyhÿmy.

¹⁵ Tiiboho raryberenyre: —Kai tabinamy atxi-

teri. Ixityre rarybere: –Aõkõre tii taile naderi. Tahe raryberenyre: –Pedro aõkõ rare, taÿjulemy tahe rare.

¹⁶ Tahe Pedro riheterihetenymy rÿimyhÿre. Idi riraynyrenyre. Pedromy robirenyrau, bede riõtiinyrenyre.

¹⁷ Pedro tahe tamyreny tebò reara roholarenykemy. Tahe tamyreny relyyre timybo Inynyrÿ ròtena-ribi rexiòlòdÿÿnyramy. Tule tamy riteònyre: –Kiamy belyyke Txiau-ò tule inyseriòre-ò. Tahe rexitare, rare ijõsÿ-ò.

¹⁸ Txuu ratÿnyreu, soldado mahãdu ierysmy wii risÿnyre timybo Pedro aõhebo rotÿÿnyramy. Tahe jei jei aõnire.

¹⁹ Herodi ijjesemy riteònyre tai moõ tai rahaõhyylera. Tai soldado itxeredu sohoji sohoji dÿÿraximy riteònyra. Idi irubudÿÿmy riteònyra. Iribi tahe Herodi Judeia bede-ribi ròhònyra. Sesaria hãwã-ò bededÿÿnanaõ riwya.

²⁰ Tiro hãwã mahãdu Sidoma beà hãwã mahãdu-wana Herodi derarenyre. Tahe tiiboho ributunyrenyre tamy ròirenykemy rybe-di. Iòlò heto-di itxeredu Blastu inire. Tahe iny mahãdu Blastu ròtarenyre iwe-ribi mahãdureny. Tahe ròirenyre Herodi-ò tamy rexitòenyrenyre, tamy ykaraõmykemy. Tarÿsÿna dori diwyde iòlò bede-ribi, Herodi bede-ribi.

²¹ Herodi tahe itxu riywinyre. Kia txuu tahe ròhònyre tamy. Rexityynyre taiòlòtÿyrehe-di tahe tarynana tyre-ò ronyre, tamy Rybewihikÿmy rarybere. Tai tahe iny rirajuare: –Katahe hãbu aõkõ rarybereri, Deuxu wahe.

22-23 Aõwesele Deuxu ÿju heka Herodi rirubunyre, tii Deuxutyhymy reàlàõreki. Woudò rubudÿÿnamy rurure.

24 Deuxu rybe tahe ibutumy roholare. Sõwemy iny tahe rityhynyre.

25 Banabe Salu-wana nieru riwahinymy rahudi tahe, diòòsede Jerusalẽ-ribi Atxiòkia-ò. Juaõ Marku tii-wana ridyre.

13

1 Atxiòkia dohodÿÿna heto mahãdu-ki rybe tÿnydÿÿdu mahãduõ, bede erydÿÿdu mahãduõ rÿimyhÿre. Kaheka inireny rare: Banabe, Simaõ, iniraròsòna Nike rare. Lusu ijõre, tii Sireni hãwã ludu rare. Manaï ijõre, tii Herodisÿ-ki ratibienyre, Salu ijõre.

2 Ibutumy tahe Inynyrÿmy reàlàre, riroxiõhyy heka bede riemyhÿ. Tahe Deuxu Tyytybytyhy tamyreny rarybere: —Jiarÿ waaõmysÿdÿÿna dire Banabe-ò, Salu-ò. Kaiboho heka biteònybenykre kia riwinykremy.

3 Tahe roxiõhyy my bede riemy, rexitòenyrenyre. Tebòreny iratytyre ritidirenymy, idi riteònyrenyre tabede tÿina-ò.

4 Deuxu Tyytybytyhy tahe tiiboho riteònyrenyre. Selusia hãwã-ò tamy riberenyre. Tahe hãwõò rimyrenyre Xibri bedebute-ò.

5 Tahe rehemynyrenyre Salamina hãwã-ò. Tai judeu dohodÿÿna heto-ki Deuxu rybemy raryberenyre. Tule Juaõ Marku rare tii-wana wiòhedÿÿdu wese heka rare.

6 Tahe ibutumy bedebutemy rekoarenyre. Ritehemynyrenyre hãwãõ-ò Pafumy ninadu-ò. Tai

tahe judeu mahãdu witxi deade, Bajesuisi heka inire.

⁷Tii Deuxu rybeduõmy raremyhÿmy iximy rarybere tahe aõkõre, raruire, riitxenanyre. Tii bedebute hãwã dinodu-wana rare. Kadinoduni tahe Sergio-Paulo inire. Tii hãbu bedeery nihikÿ rare. Tii Deuxu rybe-ò roholakemy ratxireri. Tahe didyde Salu, Banabe-wana tamy roholakemy.

⁸Bajesuisi, Elimasi ijõ ini rare. Tahe tii bedebute dinodu-ò rarybere uritere Salu rybe-ò, Banabe rybe-ò ijohonakõmykemy. Wanyrÿ tyhydÿkõmykemy dori tuu risÿnyre.

⁹Salu tahe, Paulo ijõ ini rare. Deuxu Tyytybytyhy heka itykymy ralòmÿ rÿimyhÿre. Tahe Paulo retehere Elimasi-ò tamy rarybere:

¹⁰—Kai Satanasi riõre tate. Kai heka ibutu itxenadÿÿ-di tÿxihikÿlemÿ ahãte. Kai heka awihikÿ òludu tate. Tiubo heka bexihukre Inynyrÿ-ribi iny riixãwididÿÿnyre.

¹¹Deuxu heka wiji araòwynykre, aõhõkÿmy arasÿnykre, aruetàmÿ bonykre. Txu bobiõkre bedebiwÿke. Iule tahe aõwesele bedebetorohokÿlemÿ reare. Robiõhyymÿ reare. Urile riemy ratximyhÿre, iny riwiõhenanykemy, ryy tamy ritÿnynykykemy.

¹²Tahe kia bedebute dinodu tuu robire aõhebo rotÿÿnyramÿ, tai bedebetoriinymÿ ronymyhÿ tahe tii Inynyrÿ rityhynyre.

¹³Iribi tahe Paulo rònõnyra tajoi-wana Pafu hãwã-ribi. Rakremÿ riberenyra hãwã nihikÿ-ki Panfilia bedebetorohokÿ, Peke hãwã-ò. Juaõ Marku iribireny rexitara, dòòsede Jerusalẽ-ò.

¹⁴Tahe Paulo Banabe-wana roirenyre.

Peke-ribi riòlònyre tahe rekoarenyre Atxiòkia-ò. Kaa iwitxira Atxiòkia hãwã rare, Pisidia bedeki ratxireri. Tahe rirònyrenyrene judeu mahãdu dohodÏÏna heto-ò. Sabado txu rÏire. RonymyhÏre ijohonamy.

¹⁵ Kia hãbu mahãdu heka Moisesi bedeki ywina tyyriti-di, Deuxu rybemy rybedu mahãdu tyyriti-di rariamyhÏre. Tahe dohodÏÏna heto wedu Pauloboho-ò raryberenykemy rarybere: —Waseriòre, arybemy idi atxiteri-wana marybeke aõwaxiny bitÏnyke.

¹⁶ Tahe Paulo rÏire lamamy. Iwese rybedÏÏmy ròtèòsidÏÏmyhÏre wese rÏire. Tahe rexidelenyrene: —Hãbu, Israeli mahãdu, tule ibutumy Deuxu rityhynymy rÏira mahãdu, bodoholabedenyke kaa ijyy-ò.

¹⁷ Israeli mahãdu Egito-ki rasÏnyreu, taDeuxu iribi ritare, moma, inytybyreny Deuxu, Israeli mahãdu tybyreny wahe. Deuxu rasõwedÏÏnyrene. Iribi tahe Deuxu Egito-ribi ritarenyrene tebò ruteretyhy-di.

¹⁸ Tiiboho bederahy-ki 40 beòramy bedeki riereu, Deuxu taaõbina bina riòludunyrene.

¹⁹ Kanaã bedeki debò inatxi reuròmymy ixÏju ixÏju mahãdumy rahure. Idi tamyreny riwahinyrene bedeki, isÏhyymy rarekemy. Idi tahe rybe ywisidÏÏdu mahãdu tamy riwahinyrene. 450 beòra rahureu, tahe Samueli Deuxu rybeduõmy raremyhÏ.

²⁰ Idi tahe rybe ywisidÏÏdu mahãdu tamy riwahinyrene. Tahe 450 beòra rahureu, Samueli Deuxu rybeduõmy raremyhÏ.

²¹ Iribi iny Deuxu-ò rexitòdenyrene iòlòmymy tamy

kadiwahinykemy. Tahe Deuxu Salu tamy riwahinyre, iòlòmý. Salu tahe Kixi riòre rare. Benjami mahãdu rare. Tahe 40 beòramy iòlòmý ronyre.

²² Salu iribi ritareu, tahe Davi, Deuxu ritamadÿÿnyre iòlòmý. Deuxu Davimy rarybere: — Davi Ijese riòre rare. Jiarÿ iluure. Tii ibutu wadee wimy riwinykre.

²³ Tahe Davi riòkòre-ribi Jesuisi ròhònýre, Israeli tarasadumy rarekemy. Iwese juhú Deuxu rarybere wese.

²⁴ Jesuisi naõdeu, Juaõ ritÿÿnyre Israeli mahãdu-ò iòrarureny ririkemy idi raratisebenykemy.

²⁵ Juaõ rybe tÿnydÿÿna kõnanau, tamyreny rarebere: —Jiarÿ wa iwese tahõtinytenyteri wese aõkõ jiarÿ rare. Kaiboho tiwaraòðhyymahãtenyte. Betehebenyke, tii, wahewomy kanakre. Jiarÿ aõ aõkõ rare, iwatisana arieseõtyhy iwa ritakemy, tii dori waratyre wihikÿreki.

²⁶ Waseriòreboho, Abraõ riòre riòremy ibutumy inyboho roire, tule Deuxu reàlàmy rÿira mahãdu kaki ratximyhÿ. Deuxu inydeereny biu-ò hedu rybe diwahinyde.

²⁷ Jerusalẽ mahãdu, iwedureny-wana raeryõhyre tii tarasadu rare. Ibutumy sabado txu rybedu tyriti-di rariamyhÿre tohodÿÿna heto-ki, tahe aõbo rare rieryõhyre. Jesuisi rubudÿÿmy raryberenyreu, iwese rybeduõ rarybere wese, tiiboho rotÿÿnymyhÿre.

²⁸ Tiiboho aõbina bina-ki tai rahaõhyra, ihãrele irubudÿÿmy rexitòenyre Pilato-ò.

²⁹ Iwese ibutumy Jesuisimy riritinymy roireri wese, ibutumy tuu ròhònýre. Tahe itxeò nihikÿ

tyre-ribi ritarenyre. Tahe mana hãloo rawo-ò ritidirenyre.

³⁰ Tahe Deuxu rubu-ribi riixixadÿÿnyre.

³¹ Tii-wana iny mahãduõ roirenyre juhoo Kalileia-ribi Jerusalẽ-ò. Rexixamy rahudi tahe, tii mahãdule tuu robihyomy txuu widireny rÿire. Kia mahãdule inysõwey-ki relyymyhÿre.

³²⁻³³ Deuxu juhoo rarybere inytybyreny-ò aõhebo rotÿÿnykremy. Inydeereny tahe tii riwinyre Jesuisi riixixanyreki. Kia Rybewihikÿmy adeereny relyymahãreny. Iwese inatxi wiuna ritidÿÿna-ki roire wese:

—Kai waRiõre tate. Wiji tahe bomy watxiwãhãre.

³⁴ Kiamy heka Deuxu rarybere Jesuisimy: — Rubu-ribi ariixixanykemy, tiu rasunymyhÿre bede-ò ròðseõtyhy. Iwese Davi-ò jiarÿ rarybere wesemy ibutumy adee bede ariywinykre.

³⁵ Deuxu ijõ wiuna Ritidÿÿna-ki tule rarybere. Iwese Jesuisile rarybere wese, kiamy roire:

—Eòdutyhy umy rasÿnyõtyhy kai dori waumy-sudÿÿ-ò teijemahãte.

³⁶ Iu Davi Deuxu dee taijoi riwiðhenanymy rahudi tahe, rurure. Tybyreny-ò tii rara. Iumy tahe rasunyre.

³⁷ Jesuisi umy tahe rasunyõre Deuxu dori rubu-ribi riixixadÿÿnyreki.

³⁸⁻³⁹ Jesuisi bityhnybenykeki, aòraru riixãwidinyke. Kiamy Moisesi bede ywina ihoõhyre adeereny. Kia bierybenyke waseriõreboho, tiile, Jesuisi, adeereny relyywãhãreny.

⁴⁰ Bexiijebenyke, kiamy adeereny rotÿÿnyke lau iwese rybedu ritina-ki roire wese:

41 –Kaiboho inatyhy derare. Betehebentyke, burubentyke, bedede biòtiinybentyke, aõbo jiarÿ rewinyreriò. Inyõ adeereny ritÿnynyke ihãrele. Tiu heka bityhynybentyõtyhy.

42 Tahe Paulo irybe rexihura. Iribi ròhònyre Banabe-wana. Rexitòenyrenyre ijõ sabado biòwau tarybetybydile ixybyle relyykemy.

43 Iny ritobinymy rahudi, judeu mahãduõ, judeu bedede erydÿÿna ityhydÿÿdu mahãduõ tule Banabe Paulo-wana riheludunyre. Tahe tamyreny raryberenyre: –Deuxu ruxetòena-ki idi mari-ahyymyhykemy.

44 Ijõ sabado rehemynyreu, ibutu iny hãwã-ribi doimyhÿdenyde Deuxu rybe-ò ijohonamy.

45 Judeu mahãdu tahe inysòwemy robireu, tiiboho rexiwaritinyhyreny. Tiiboho raryberenyre aõbinahãkÿlemy Deuxuru-ò. Paulo riki inatyhymy aõkõ tii rarybemyhyre.

46 Paulo Banabe-wana ihãrele brebuõlemy raryberenyre: –Juhuu adeereny Deuxu rybe dobehede. Tahe kaiboho tetyhynyõteny, tai judeukõdu mahãdu-ò aroirenykre. Kaiboho Deuxu rybe terarenyreki, ixi sohojile tahe tetaõte adeereny aõ aõkõreki.

47 Kia Inynyryÿ bedede ywina wadeereny riwahinyre: –Kai loosòna wesemy atxikre judeukõdu mahãdu-ò. Kai tarasanary ritÿnynykre ibutu inyko-ò.

48 Judeukõdu mahãdu kia-ò roholareu, tahe reysarenyre. Deuxu rybe riwowydynyrenyre tai. Tahe rityhynyre, timybo Deuxu juhUU ritare wesele tamyreny umytuedeõna riwahinyremy.

49 Inynyrÿ rybemy kia bede-ki ibutumy relyyre.

50 Tahe judeu mahãdu rarybere hãwyywihikÿ ityhy-ò, tule hãwã wedu-ò. Tai tahe Paulo Banabe-ò òludu sówemy resere. Tahe isubede-ribi riteònyrenyre.

51 Paulo Banabe-wana tawa-ribi bryby riòhòwirenyre tamyreny tiiboho ibinareki. Tahe Ionio hãwã-ò roirenyre.

52 Atxiòkia ityhydÿÿdu mahãdu tahe reysamy rÿimyhÿre. Deuxu Tyytybytyhy-di tÿximy ihÿre.

14

1 Ionio hãwã-ò Paulo Banabe-wana rare. Judeu mahãdu dohodÿÿna heto-ò. Tahe rybe ritÿnyrenyre, tarurumy he relyyrenyre. Sówemy judeu mahãdu, judeukòdu mahãdu-wana rityhynyrenyre ijyy.

2 Tahe ijò judeu mahãduò rityhynyòre. Ijyy deramy reamyhÿre, tule ijò-ò tule rarybere ityhynyòkemy. Tahe Paulomy, Banabemy aõ òta òtalemy rarybemyhÿrenyre.

3 Ihãrele tahe Paulo Banabe-wana bede nihikÿ riwyrenyre tai. Tamy rybe ritÿnyhyy roiremyhÿ ibrebuòlemy. Inynyrÿ taruxetòena rybetyhydÿÿnamy riwiòhenanyre tiiboho bedeòbyna widÿÿdu renyreki.

4 Hãwã mahãdu ritxuare. Ijò heka judeu wedu mahãdu rityhynymyhÿre, ijò tahe Paulo Banabeboho rityhynymyhÿre.

5 Judeukòdu mahãdu, judeu mahãdu, tawedureny-wana widee rarybere Paulo Banabe-wana riòkòròrenykemy tamy mana-di rehurenykremy.

⁶ Tahe tiiboho rexieryrenyre tahe rihenyrenyre. Tahe ròirenyre Lистра hãwã-ò, Debi hãwã-ò, kia Laonia hãwã hãwã-ò rare. Tule rariarenyre kowa bedewo-ki.

⁷ Tahe kowa tiemy ritÿnyhyy roiremyhÿ Rybe tÿmyra wihikÿ-di.

⁸ Lистра hãwã-ki heka hãbuõ-txi rekoarenyre, itierere heka. Taihyy heka ronymyhÿre. Tuuhyy heka ratohouãmy ijarananyre.

⁹ Tii tahe Paulo rybe-ò roholare. Paulo tamy retehere. Kia tahe Paulo rieryre hãbu teytetyhy-nadire Paulo riteytenykremy.

¹⁰ Tai tahe tamy rarybere tarybe riterenymy: – Mynyike, òbitimy. Ta hãbu rexiwatxinyre, rariare.

¹¹ Ijohona mahãdumy robireu, aõbo Paulo riwinyremy tahe rirajuare tarybe-di, Laonia rybe-di: –Ka hãbu mahãdu heka deuxu wesemy idi rexinohõtidÿÿnymyhÿre. Inydeereny deuxu wesemy dobehede. Iumyreny tahe hãbu wesemy rare.

¹² Banabe heka, Jupitemy tadeuxurenyniõmy rininire. Paulo tahe ijõnimy, Meuriumy rininirenyre irybe sõwetyhyreki, tii rybedureki.

¹³ Jupite xiwena wydydu horeru bederade-di dehemynyde. Tohodÿÿna heto hãwã ahana ube-ki rÿire. Broreni xiwe wesena tamyreny hãwã mahãdu riworynykemy, riwahinykemy.

¹⁴ Kiamy roholareu, Paulo Banabe-wana tatykyreny riykaranyre idi rihurenyre. Tahe ralõmy reare inysõwey-txi rarybekemy.

¹⁵ Tamy rryryre: –Aõhebo tatÿÿnytenyteri. Jiarÿboho hãbulemy watxirenryeri. Kialemy adeereny rarybewãhãre, Deuxu rybetÿmyra

wihikÿ. Adeuxureny-di nohõtirenyõmy. Bedewidÿÿdu ta mohõtinybenyke. Tii dori benihikÿ riwinyre, ibutumy biu-ki riwinyre, tahe Deuxutyhy-di mohõtinybenyke.

¹⁶ Ihetxiu Deuxu ibutumy bede bedemy sÿdu ririre ixidee wimy aõna aõnamy rotÿÿnykemy.

¹⁷ Urile tahe tamy rexideòsinyre tamy biu riwahinyre taoworumy raratynykemy. Tai tahe kaiboho arÿsÿna dire, Deuxu debò-ribi, awo-ki eysanadire.

¹⁸ Ihãrele iny tamy xiwe wesena tamy riwahinykemy ratxireri. Paulo tamyreny rarybere: –Aõkõ, inydeereny bidiwahinyõke.

¹⁹ Iribi tahe judeu mahãdu-ò Atxiòkia-ribi, Ionio-ribi tamyreny raryberenyre Paulo rubudÿÿmy. Hãwã òtityube-ò Paulo ridyreny. Mana-di tamy rehumyhÿ. Tahe rubu wesemy ririrenyre.

²⁰ Idi tahe ityhydÿÿduõ tamy wirotyre. Paulo tahe suribi rÿire tahe tii-wana nalòde hãwã-ò. IjõtXu biòwamy tahe Banabe-wana Paulo rexitare ijõ hãwã-ò, Debi hãwã-ò.

²¹ Ka hãwã-ki tahe Paulo rybe tÿmyra wihikÿ ritÿnynyre. Sõwemy tai rityhynyreu, Pauloboho ròòserenyre Listra hãwã-ò, Ionio hãwã-ò, Atxiòkia-ò.

²² Ibutumy hãwã-ki Pauloboho ityhydÿÿdu mahãdu riwiòhenanyreny, tiiboho rityhynyhyummy ratximyhÿkemy. Tamyreny rarybere: –Kaiboho aõhõkÿmy botÿÿnybenyke, ihãrele malòkemy titxibo Deuxu Iòlò ratximyhÿre-ò.

²³ Ibutu ityhydÿÿdu mahãduy ribi ritamy rÿimyhÿ rarekemy, idinodumy. Matuari

mahãdu-ribi tii ritare. Iu ritareu tahe, rexitòenyre Deuxu-ò tule byreõhyy txuõ riwyrenyre. Inynyrÿ-ò rexitòenyre: –Kia ibutumy aratyhynyereri, tai tahe biywinymy ahãke.

²⁴⁻²⁵ Pisidia bedeki rekoamyhÿrenyre Panfilia bedeki. Kowa-ò Rybewihikÿ tÿmyramy relyymy rahudi Peke-ki, Atalia hãwã-ò dobehede.

²⁶ Tai hãwò nihikÿ welòdi-dimyrrenyre. Tahe Atxiòkia-ò rorore. Kowa-ribi juhuule rybe tÿmyra wihikÿ ijyy-di dòhònyde. Kowa juhuu rexitòenyre tamyreny Deuxu ruxetòena-wana rarekemy.

²⁷ Atxiòkia-ò rehemynyreu, Paulo, ibutumy ityhydÿÿdu mahãdu ditotynyde. Tai heka tamyreny rarybere iwese Deuxu riwiòhenanyre wese ibutumy iaõmydÿÿnana-di. Iwese judeukõdu mahãdu rityhynykemy. Deuxu tamy ityhyna ijòtòbòna riraynyre wese.

²⁸ Idi bededÿÿnana riwynihikÿre ityhydÿÿdu mahãdu-wana.

15

¹ Hãbuõ Judeia mahãduõ ditehemynydenyde ta teòsamy ribedeerynyrenyre. Kawese ribedeerynyre: –Moisesi Tyyriti bedeki ywina, notykyresynamy, rityhynyòkeki, iny rataõtyhy.

² Iribi tahe Paulo Banabe-wana tamyreny rarybehyy rare. Tai tahe inyõ tamy rarybere Jerusalê matuari mahãdu-ò roirenykemy aõmydÿÿnana rexiòbitinyrenykykemy. Iny witzira-ò Jesuisi erydÿÿna mahãdu-ò rarybekemy heka tamy, Pauloboho iteòdÿÿmy rarybere. Tahe ijõ hãbu mahãduõ tule tiiboho-wana riteònyrenyre.

3 Dÿÿraximy heka tamy ròirenyre, aõ aõmydÿÿnabo ratxirerímy wahe. Sõwemy dohodÿÿna mahãdu ihemy roirenyre urihimyõ, tai tahe ririrenyre. Tahe Senisia bede bedemy, Samaria bede bedemy riòhòrerenyre. Relyyre judeukõdu mahãdu tule ityhydÿÿdu mahãdu-ki rÿirerimy. Tai ibutumy ityhydÿÿdu mahãdu reysare.

4 Tahe ritehemynyrenyre Jerusalẽ-ò. Wihe ritotynyrenyre ityhydÿÿdu dinodu-wana, tule matuari mahãdu-wana, Jesuisi erydÿÿdu mahãdu-wana. Tiiboho relyyrenyre aõmybo Deuxu rotÿÿnyre iyreny-ki, timybo riwiòhenanyré.

5 Tahe hãbu mahãduõ tai raremyhÿ heka. Juhuu heka fariseu mahãdumy ihÿre, idi tahe ityhydÿÿdumy ralore. Imahãdu-ribi ijõ rÿire ribedeerynykremy. Tahe rarybere: –Inydeereny kia wese rare. Judeukõdu tyhydÿÿdu ibutumy notyyresyna-di ròhònyke. Tule ibutumy Moisesi bede ywina ibutumy rityhynykemy. Kawesemy tamy ribedeerynyre òbitimy aõkõ watzireri.

6 Idi tahe Jesuisi erydÿÿna, matuari mahãdu-wana wii ributunyre rybe òbitidÿÿmy.

7 Rybe sõwemy rahude tahe, Pedro rÿire tamyreny rarybekemy: –Waseriòreboho, Deuxu juhu riwatare Rybewihikÿ rybedumy judeukõdu mahãdu-ò tuu aritÿnynykremy, tiiboho tule rityhynyrenykyre. Tai rarewãhã. Kaiboho kia ibutumy teerytenyete.

8 Iwese inydeereny riwahinyre wese, Deuxu Tyytybytyhy tamyreny tule riwahinyre. Judeukõdu mahãduõ tule ixidee rimykyre. Kia wese tuu riteòsinyre inydeereny.

⁹ Deuxu wiribi lahiximy aõkõ iny riwinyrenyre. Wiwesehyyle ihÿre. Tiiboho inywesele ihÿrenyre. Tiiboho rityhynyrenyreu, heka irayky rityranyrenykemy ritarennye.

¹⁰ Kia wese Deuxu teurihitenyteri. Kia bede ywina itxyynautxiehekÿ wesere ityhydÿÿdu mahãdu tyre-ki tetiditenyteri. Inytybyreny tiu retyyõre tule inyboho idi retyyõre.

¹¹ Inynyrÿ, ruxetõenale-di iny ritamyhÿre. Tule judeukõdu mahãdu kia weselere ritamyhÿre.

¹² Tahe aõmy rarybeõhyrenyre. Ibutumy he Paulo Banabeboho rarybereò, roholarennye. Tiiboho heka relyrennye tule bedeòby wihikÿ aõna aõna-wana Deuxu riwinyremy tadebò-di wahe.

¹³⁻¹⁴ Iribi tahe rexihurenyreu tasÿ, Txiau rÿire rarybekremy: –Waseriõreboho, bodoholabedenykre inihe warybe-ò: –Pedro kÿny adeereny rarybere, timybo Deuxu judeukõdu mahãdu roramy rare iny mahãduõ ixidee ritakremy tanityhy-ò.

¹⁵ Kiawesemy he tule ihetxiu Deuxu rybemy rybedu mahãdu riritinyre, kamy wahe:

¹⁶ –Wanyrÿ heka rarybera: –Adòòsekre, ixyby ariwinymy aritamadÿÿnykre aõdohodÿÿna heto Davi juhuu riwinyre. Idi tahe resere. Ixyby ariwinykre.

¹⁷ Tai tahe judeukõdu mahãdu-ribi iuhe riwaòrykre wamy rityhynykemy. Wanyrÿ, Deuxu, kiamy heka tiiboho rarybekre, ibutumy jiarÿ retarennye.

¹⁸ Kawesemy Wanyrÿ tuhyy rarybemy raremyhÿ, tule wiji ihÿre.

19 Tai heka kiawidÿÿõmy rakatximyhÿrenykre. Tamyreny rybeõmy rakatximyhÿrenyke. Judeukõdu mahãdu Deuxumy rityhynyrenyreu, iny bede ywina reny tyhydÿÿmy tamyreny rybeõmy.

20 Kialemy heka tamyreny rakaryberenykre: Suritxoo xiwe-ribi iròdude ròrenyõmy. Tule òta òta òraruna widÿÿõmy, iròdu hãlubu-dí ròrenyõmy, ihãlubu rejuxunyõmyhÿre-wana.

21 Kiamy heka rakatximyhÿrenyke. Moisesi bede ywina-dí dori ibutu hãwã-ki judeu dohodÿÿna heto-ki rariamy raremyhÿ. Sabadotxu ihyymy aõkõ kia ritÿÿnynymy raremyhÿ.

22 Tahe kiamy heka rahõtynyreny, Jesuisi erydÿÿna mahãdu, ibutumy dohodÿÿna mahãdu-wana, hãbuõ ayreny-ribi rikitakre. Tai Atxiòkia-ò riteònyrenykemy Paulo Banabe-wana. Tahe Judasi ritarenyre tule iniòrysyna Basaba rare. Ijõ tasÿ Sila inire. Ka hãbuboho ityhydÿÿdu mahãdu awimy tai raharenyre.

23 Katyyriti tiiboho-wana rakre. Kawesemy tyyriti rare: –Jiarÿboho, erydÿÿna, matuari, seriòre mahãdu adeereny rybe wehityhyna rewahinyreri. Ibutumy judeukõdu mahãdu ityhydÿÿdu-ò ka tyyriti rakre Atxiòkia hãwã-ò, Siria bede-ò, Silisia bede-ò.

24 Inyõ rare wayreny-ribi adeereny notykyresymy rybemy. Tai tahe araykyreny riwerydÿÿnyre. Jiarÿboho reteònyrenyõhyyre. Kia reerymy watxirenyreri.

25 Tahe wiwesele rahõtynyreny riki, hãbubohoõ Paulo Banabe inyluudu-wana reteònyreny reri.

26 Kia hãbu Paulo Banabe-wana hãwã bina-hakÿ-ò roimyhÿrenyre Jesuisi Kristu Inynyrÿni-di. Ixi-txi røhøtinyølere, brebumy.

27 Judasi-wana tule adee raryberenykre kia aõmydÿÿnanamy, katyyriti rewahinyrenyre wese.

28 Kawese inyboho røhøtinymyhÿre, Deuxu Tyytybytyhy dori inyrayky rewiohenanyre. Kia bede ywinalemy adeereny rarybereri biywinybenykemy.

29 Uritere, suritxoo xiwe-ribi irødude ròrenyõmy irødu, ihãlubu-di ròrenyõmy, ihãlubu rejuxunyõmyhÿre-wana. Tule òta òtana òraruna widÿÿõmy. Ka bede ywina biywinybenykeki, awimy boibeke. Deuxu deysana tahe adeereny kanakemy watxiwãhãre.

30 Tahe hãbuõ iny inaubiòwamy Atxiòkia hãwã-ò ròirenyre. Tahe Atxiòkia tyhydÿÿdu mahãdu ributunyre. Iu tahe tamyreny tyyriti riwahinyre.

31 Tahe idi rariarenyreu, ritÿÿnymy tamyreny. Ribedeerynyrenyre. Tai tahe reysarenyre.

32 Judasi Silaboho tule Deuxu dee rybeduwihikÿ roire. Sõwemy dohodÿÿna-ki seriøre mahãdu-wana rohonymyhÿre. Tai tahe rirurudÿÿnymyhÿre.

33 Aõtxumy raroorehenyre, tahe seriøre mahãdu tamyreny rarybere: —Bøibenyke he ateòdÿÿdu mahãdu-ò. Biøkeseke wowina-di Jerusalë hãwã-ò.

34 Tahe Sila røhøtinyre rarikremy Atxiòkia-ki.

35 Tahe Paulo Banabe-wana naride Atxiòkiakile. Inynyrÿ rybemy rierynanyrenyreri, ritÿÿnyrenyreri, ijø seriøreõ-wana.

36 Aõtxumy tahe Paulo rarybere Banabe-ò: —Røkòðekre kÿnyhe, ibutumy hãwã hãwã-di tai

juhuu Inynyrÿ rybemy ritÿnynymahãreò wahe, rikiwehityhynanykremy timybo ityhydÿÿdu mahãdu nyimyhÿde-ò.

³⁷ Tahe Banabe Joaõ-Marku ridykemy tamy reare.

³⁸ Paulo heka Joaõ-Marku ridyõkemy ratxireri, Panfilia hãwã-ki dori iribireny ròhõnyreki, ri-wiòhenanyõreki.

³⁹ Marku ridykemy wiwese wesemy aõkõ rõhõtynyrenyre teratyhylemy ratximyhÿ. Tai tahe wiribi rexihitxinyrenyre, Banabe Paulo-ribi. Banabe Marku ridyra Xibri bedebute-ò, hãwò-di ròira.

⁴⁰ Paulo tahe Sila ridyra. Seriòre mahãdu tahe Pauloboho riixitòedÿÿnyre, Inynyrÿ ruxetòena tamyreny kanakemy.

⁴¹ Tahe Siria bede werawo-di, Silisia bede werawo-di, ririranyre dohodÿÿna mahãdu riwiòhenanykemy, rirurudÿÿnymyhÿkemy.

16

¹ Pauloboho tahe Debi hãwã-ò rehemynyre. Ihyy tahe Listra hãwã-ò rare. Tai tahe Tximòtxi-wana witxi rekoare. Tximòtxise judea tyhydÿÿduõ rare. Tyby tahe grego mahãduõ rare.

² Listra, Ionio ityhydÿÿdu seriòre Tximòtxi luure. Tximòtximy widee rarybere: –Tii iny hãbu tyhy rare.

³ Tahe Paulo Tximòtxi-wana rakemy rexiywinymy raremyhÿ. Tahe rexitarenykre kotyreu, Paulo, Tximòtxi notykyresymy riteònyre, kowa judeu mahãdu òraru-ki wahe. Tyby dorihe ibutumy iny rieryre tii grego mahãdu raremy. No-

tykyresykõmy rake tahe judeu mahãdu dee kia ibinare.

⁴ Iribi tahe ròirenyre hãwã hãwã-di, ityhydÿÿdu seriõre mahãdu ribedeerydÿÿnykemy, timybo Jerusalẽ mahãdu rõhõtinyinmyhÿremy.

⁵ Tai tahe ibutumy dohodÿÿna heto mahãdu tii rirurudÿÿnymyhyre ityhydÿÿna-di. Tule ijõ rityhynymyhyre txuõ txuõlemy ralokemy ityhydÿÿduõmy rarekemy.

⁶ Pauloboho Asia bede-ò ròirenyõre rybe ritÿnynykemy, Deuxu Tyytybytyhy ritirÿreki. Tahe Frigia-Alatxia bedemy rekoamymyhyreny.

⁷ Misia bede-ò rehemynyreu, Bitinia bede-ò ròirenykemy riwisÿnyreny. Tahe Jesuisi Tyytyby tamy riteõnyõhyre, ritirÿmyhyre.

⁸ Tahe Misia bedemy rekoare, tahe Troaji hãwã-ò robehere.

⁹ Tahe Paulo hãbuõ wesemy robire rasina weselemy. Hãbu, Macedonia bede ludu lamamy rÿimyhÿò, tuu robire. Tahe hãbu ryrymyhÿ tamy: —Manake Macedonia-ò, biwawiõhenanykemy. Kia Paulo rasi-ki tuu robire wese.

¹⁰ Tahe tarasi rahureu, tamyhe wylemy aroikemy watxiwãhãreny. Jiarÿ, Luka, Paulo-wana. Deuxu dori inydeereny rarybereri Macedonia-ò ròkõirenykemy, Rybewehikÿ rikiubÿtÿnyreny. Kialemy rõkõhõtinyinreny.

¹¹ Tahe Troaji hãwã-ribi ròhõnyre hãwò yhywydynalaworo-ki. Samotrasia hãwã-ò imynahyy riõhõrere. Ijõ txu tahe Niapoli hãwã-ò riõhõreri.

¹² Iribi tahe Filiposi hãwã-ò roirenyre. Juhuludu hãwã rare Macedonia bede-ki. Roma hãwã

mahãduõ tule tai rasÿnymyhÿre. Tai txuõ rewyrenyre.

¹³ Sabadotxu tahe hãwã-ribi reòlònyrenyre bero ijà-ò. Rahõtinyrenyre tai ixitòedÿÿna-ò rÿimyhÿremy. Tai tahe hãwyyõ rexibutunymy rÿimyhÿ. Tahe rorokorenyre tamyreny raryberenykemy.

¹⁴ Hãwyyõ Lidia inire, inyrybe-ò tahe roholaty-hymyhÿre. Tii Txiatira hãwã luduõ rare. Tii tylÿre ijohodure, tule Deuxu tyhydÿÿdure. Inynyrÿ irayky riywinyre Paulo rybe rityhynykemy.

¹⁵ Tahe ibutumy isÿmahãdu-wana riraty-sebenyre. Tai tahe tamy Lidia rarybere: — Inaanokàbo ityhydÿÿkÿdumy watxiwãhãre-wana, wahetoku-kò manakre. Tai tahe iheto-ò ròirenyre irybe-ki.

¹⁶ Aõutxumy tahe riberenyre ixitòedÿÿna-ò. Itxi rekoarenyre ijadòmaõ-txi, deòdu rare. Iwo-ki tyytybybina ralòmy rÿire. Tai ijadòma relyyre inyko aõhebo iny-ò rotÿÿnykremy. Tai sõwemy nieru ritare tawedu-ò.

¹⁷ Tahe waherenymy dyrymy nade: —Deuxu ibuturatyre rare. Iteòdÿÿkÿna mahãdu kia mahãdu rare. Tikiboho rarybemyhÿre timybo iny taòraru-ribi ratakemy.

¹⁸ Tuheka rarybehyy raremyhÿ. Aõutxumy tahe Paulo tai rexirare, tamy ròòsemy reare. Rarybere tyytybybina tai ratxirerìò: —Jesuisi Kristu nimy iribi arateònykre. Bexitakre. Tahe aõwesele iribi ròhònymy reare.

¹⁹ Iwedu tahe rieryre nieru idi ritaõkre ta rymyrenyre Paulo Sila-wana. Retÿhimy rare ywisidÿÿdu-ò, hãwã elehyna ube-ò.

20 Tahe ijadòma wedu rarybere ywisidÿÿdu mahãdu-ò: —Kaa judeu mahãdu iny hãwãreny dib-inadÿÿnymyhÿde.

21 Tiiboho iny ribedeerynymyhÿre aõ iny bedeywinareny-di aõkõ. Inyboho Roma hãwã mahãdu rare. Tai kia-ki aõhe arotÿÿnyõtyhy.

22 Tai tahe sõwemy iny Paulo Sila radònyre. Ywisidÿÿdu mahãdu tahe ityy ibòrò-ribi ritxuahakÿre idi tahe rityhenymy tuu raòhòtere.

23 Tuu raòhòtere, tuu raòhòtere, idi tahe ròtenawo-ò idi rehurenyre. Ròtena-di itxeredu-ò rarybere: —Kaa rahenykre-wana, kaile budurukre.

24 Tai rirutere iraru-txi rarutxi-ò iwa ritidire òwòru iwodÿÿwomy raratyheny.

25 Ruetya tahe Paulo Sila-wana rexitòenymy roimyhÿ Deuxu dee. Ijõ ròtenawoludu mahãdu roholamy rÿimyhÿ tai.

26 Aõwese bedeyramytatare. Ròtena ijòtòbòna rirayre hãbu mynyna iribi rejuxunyre.

27 Tai tahe itxeredu ijò iraymy idi retehereu, rexirubunykemy tamaydese ritare. Ròtena woludu mahãdu rahenyramy tii rexinohòtinyra.

28 Paulo tahe tamy ryryre: —Ixirubudÿÿõmyke, kakile watzirenyreri, ibutuhukÿlemy.

29 Itxeredu ryryre loosòna kidiwykemy tahe ralore ramytatamy brebумы. Paulobohoko-ò resere tatiòhomy.

30 Tahe itxeredu diòlòdÿÿnyde irarutxira-ribi, tamyreny rarybere: —Wanyrÿboho timybohe aratamy arÿike. Aõhebohe arotÿÿnyke.

31 Tahe rirawyònyre: —Inynyrÿ Jesuisi bityhynykre-kile, tarasanamy myikre, asÿ

mahãdu-wana.

³² Tahe tamy Deuxu Rybe-di ritÿnydÿÿre ibutumy isÿ mahãdu-ò.

³³ Iruule tahe riwisinanyrenyra ibrò wotõmona risuhòra. Idi tahe itxeredu raratysebenyre tasÿ mahãdu-wana ibutumy.

³⁴ Iribi tahe itxeredu ridyrenyre taheto-ò riroxikemy tahe ibutumy reysanihakÿrenyre, Deuxu rityhnyrenyraki.

³⁵ Txu deadeu tahe ywisidÿÿna dinodu ijõ ywisidÿÿna mahãdu riteònyre, ròtena-ribi Pauloboho riteònykremy.

³⁶ Itxeredu tahe Pauloboho-ò rarybere: — Ywisidÿÿna mahãdu arateònykremy riwateònyreri. Bòibenye, wowina-di, biòlònybenye.

³⁷ Paulo tahe rirawyònyre: —Aõkõre, araõtyhy. Jiarÿboho Roma hãwãhãkÿ mahãdu kaa watxirenyreri. Tii riwayhytanyrenyra idi ròtenawo-ki riwasÿnyrenyra. Ywisidÿÿdu mahãdu wii rotykõhyre riwaròtenyrenyra. Wasimy ka tiu ariòlònyõtyhy. Tiibohe kodoikreule tahe ariòlònykre. Tii he riwaòlòdÿÿnykre.

³⁸ Tahe ywisidÿÿna mahãdu tawedu-ò rarybere. Tahe tiibohe ruberurenyre Pauloboho Roma hãwã mahãdu roireki wahe.

³⁹ Tai tahe dòidenyde tamyreny, aõwaxina riòlònykremy. Tahe làhàmÿ tamy rexitònyre. Tutyhy-ki aõkõ làhà ararutara. Tai riteònyrenyre, hãwã-ribi rexitarenykemy tamy rexitònyra.

⁴⁰ Rexitarenyreu, Pauloboho tahe Lidia heto-ò ròsere. Ibutumy ityhydÿÿdu tahe wii ritotynyre, wii riwiòhenanykemy. Idi tahe riòlònyre kia hãwã-ribi.

17

1-2 Tiiboho rekoarenyre Afipoli hãwãmy, Apòlonia hãwãmy tahe rehemynyre Tesalonia hãwã-ò. Judeu dohodÿÿna hetoõ tai rÿimyhÿreò. Paulo, iwese aõu riwinymyhÿre wesele rare tamy. Ralore rybe-di rarybekemy. Inataõ sabadomy tai riraynyre tyyriti ritidÿÿna tamy ritÿnynykemy.

3 Rybe hitxina rurukremy tuu relyyre. Tahe Paulo tamyreny ritÿnynyre iwese Kristu durudemy idi dexiixixanyde rubu-ribi. Kia iny rityhynyra Jesuisi inatyhymy Deuxu deòdÿÿna rare.

4 Tahe ijohonadu mahãduõ rityhynyre. Tule ijõ judeukõdu mahãdu rityhynyre. Tule ijõ hãwyy wihikÿ mahãduõ rityhynyre sòwemy.

5 Tahe judeu mahãdu dinodu tuu ròhãrumyhÿre. Tiiboho tahe hãbu binahakÿ mahãduõ wii rotyre aõbina ritelenykremy. Tahe ròirenyre Ijasõ heto-ò Pauloboho rimyrenykremy, ywisidÿÿna-ò idi retÿhikremy.

6 Tai tahe rahaõhyyre tai. Tahe Ijasõ ritarenyre ijõ ityhydÿÿduõ-wana. Tahe ridyrenyre ywisidÿÿna-ò. Tahe raryberenyre ywisedÿÿdu mahãdu-ò: –Paulo, Silamy urile bede diòtanymyhÿdenyde, aõna aõna binahakÿlemy rotÿÿnymyhÿre.

7 Ijasõ tahe ritirÿmyhÿre taheto-ki. Tiiboho iny òludu roire. Iny iòlòreny rityhynyõtyhy. Jesuisi ka iòlòrenyre.

8-9 Ibutumy iny idi ròhõtinyre, tule ywisidÿÿna mahãdu rexitòenyre nieru ririkemy. Tai xiery tahe ròhònyke. Tai tahe ririrenyre nieruõ.

10 Kiaru tahe ityhydÿÿduõ Pauloboho

riwiòhenanymy iribi riòlònykemy Bereia hãwã-ò. Tahe rehemyhÿreu, dohodÿÿna-ò ròirenyre.

¹¹ Kia hãwã-ki judeu mahãdu iny awi rare, Tesalonia hãwã mahãdu wese aõkõre. Teysamy tamy roholarenyra. Idi heka rariara Tyyriti-di, òbitimy Paulo rybe aõbo roirerimy rierykemy.

¹² Tahe sõwemy judeu iny rityhynyre. Judeukõdu mahãduy-ribi sõwemy rityhynyrenyrene, hãwyy wi-hikÿ, hãbu-wana tule rityhynyrenyrene.

¹³ Bereia hãwã-ki Paulo Deuxu rybe ritÿÿnynymy raremy. Judeia mahãdu dinodu Tesalonia hãwã-ki roholareu, tahe doidenyde. Iny sõwe-ò raryberenyre: –Pauloboho bibinadÿÿnyke.

¹⁴ Tahe ityhydÿÿdu seriòre mahãdu aõwesele Paulo riteònyrenyrene ahohokÿry-di. Sila, Tximòtxi taile rarire.

¹⁵ Hãbuò rare Paulo-wana Atena hãwã-ò. Iribi tahe dòòsede hãbuò. Paulo tamy tarybe riwahinyra Tximòtxi Sila-ò, wylemy kanakremy.

¹⁶ Paulo Atena hãwã-ki riraòreu, tahe robire suritxoole rityhynymyhÿreò. Tai tahe tii rabedewore.

¹⁷ Idi tahe Paulo ralore dohodÿÿna mahãdu heto-ò judeu dee rarybekemy, tule judeukõdu ityhydÿÿdu dee rarybekemy. Tahe rarybemyhÿre txuõ txuõlemy. Tule hãwã ube-ki rarybemyhÿre hãwã-di reamyhÿre mahãdu-ò.

¹⁸ Aõutxumy tahe Epikuriu mahãdu Paulo-txi nade. Estòiku mahãdu ijõre. Tiiboho, aõbo rybe rare kia erydu roire. Tiiboho he Paulo raujõmorenyre: –Aõmy aõkõ, kiarybedu rarybereri. Ijõ tahe rarybere: –Tii Deuxu tÿmyramy rarybereri. Paulo dori juhoo Jesuisi ixixanamy

relyomy raremyhÿ. Tai kiamy raryberenyneri.

19 Paulo tahe ridyrenyre. Tai iny roholamy rÿimyhÿreò ridyrenyre: —Rybe tÿmyramy telyymahâtemy inihe bedelyyke wakoreny. Tamy kia rarybere.

20 Aõkõre inihe aõna aõnamy tarybemy atxiteri, aõwitxira witxiramy. Tai aroholarenykemy watzirenyneri.

21 Atena hãwã mahãdu, tule iwitxira bedeluduõ tai rasÿnymyhÿre, aõ tÿmyraõõle roholarenykemy ratxirenyneri.

22 Tahe Paulo rÿire rybenatya-ki. Rexiòrarunymy rarybere: —Atena hãwã mahãdu, kaiboho Deuxu rybe hyky tahõtinyinmahâtenyte.

23 Jiarÿ hãwãmy rariamy watzireriu, sõwemy xiwena-di retehera. Ijõ-di kiamy retehera iritina-di: Kaa Deuxu heka inyõ rieryõhyymyhÿre. Ka Deuxumy kÿny heka akoreny arelyyke, teerymahâtenyte-di aõkõ tuu tealàmahâtenyte.

24 Ka Deuxu ibutumy bedeluwinyre. Ibutumy tuu rÿira tii riwinyre. Tii heka biuwetyy wedu rare, su wedu rare. Aõ hãbu widÿÿna heto-ki aõkõ tii rasÿnymyhÿre.

25 Tiu heka tii aõmy reaõtyhy hãbu aõ tamy riwahinyõtyhy. Tule tahe inydee ibutumy aõna aõna riwahinymyhÿre, ele wesena, umy, ibutumy inydee riwahinyre.

26 Hãbu sohojiõ-ribi ibutumy iny ròhònyre iriòre riòremy bedeluwitxira witxiramy rasÿnymy rÿirakemy. Urile wiribi rihitxihitxinyre. Tiu tamy riteòsinyre, tikibo rasÿnymy rÿirakemy.

27 Ibutumy Deuxu rajemyhÿkemy, raerykemy.

Tii dori irehemy aõkõ ihÿre iny-ribi. Iny sohoji sohojiõ-ribi iòhòmÿ ratximyhÿre.

28 Deuxu òraru-ki inyboho ibutumÿ irumÿ ratximyhÿrenÿre, ririranymÿhÿre, ihoõkeki tahe aõ rikiwinyrenÿõtyhy. Atyyriti widÿÿduõ kiamÿ rarybere: –Inyboho heka Deuxu riòre.

29 Inyboho Deuxu riòre rareki, urile nohõtïòmÿ womati tÿrÿrÿÿ ritxoo wesemÿ, womatiura wesemÿ, manaritxoo wesemÿ Deuxu-di nohõtïomahãbenÿ. Hãbu rayky-ribi, hãbu debò Deuxu releremÿ nohõtïomahãbenÿ.

30 Ihetxiu tii Deuxu rieryõhyrenÿre. Tai tahe iòrarunarenÿ aõnihikÿmÿ aõkõ Deuxu dee ihÿre. Wiji bededÿÿnana tahe, ibutumÿ taòraru-txi ixi-txi nohõtï ijaranamÿ, tai tahe rabadewomÿhÿkemy. Kia tahe ibutu iny-ò rarybereri, iny taòraru ririkemÿ.

31 Deuxu Jesuisi riixixanÿre rubu-ribi. Tai tahe ibutumÿ tii rityhynÿrenÿkemy ihÿre. Aõtxumÿ tahe ibutumÿ iny ywisidÿÿdumÿ kanakremÿ ijÿre. Òbitina-di Jesuisi iny ritxuarenÿkre kia wiribi hitxi hitxina txuu.

32 Paulo Jesuisi ixixanamÿ rarybereu, inyõ tuu rirajuare. Ijõ tahe rarybere Paulo-ò: –Ijõ txuu arybe ini aroholatyhykemy watxireri.

33 Idi tahe Paulo rare iribirenÿ.

34 Ijõ iny tahe Jesuisi rityhynÿre, Paulo-ò tahe rixibutunÿre. Ijõ Dionisiu inire, Areòpolo heto ube-ki tii iny mahãduõ roholamÿhÿre. Ijõ, hãwÿyõ rityhynÿre, Damari inire, tule ijõ mahãduõ rityhynÿre.

18

¹ Paulo tahe Atena hãwã-ribi ròhònyre Oritxi hãwã-ò.

² Kia-ki tahe judeu mahãduõ-wana witxi reare. Ini heka Akila inire. Tii Ponto hãwã-ki raumynyre. Urihimyòle Italia bede-ribi dehemynyde. Prisila ihãwyynire. Iòlò Laujiu Roma hãwã-ribi ibutumy judeu mahãdu diteònyde. Tai heka nade kaw-eribi-ò.

³ Paulo iaõmysÿdÿÿna rierymyhÿre, tyyheto widÿÿ. Tai tahe tiiboho-wana rajoinymyhÿre wiwana raaõmysÿdÿÿrenykemy.

⁴ Sabado txuõ txuõlemy tamy reamyhÿre judeu mahãdu dohodÿÿna heto-ò. Tahe ritohonymyhÿre, judeu mahãdu judeukõdu mahãdu tule. Tamy rarybere tii Rybewihikÿ òbitimy rierykemy.

⁵ Sila tahe Macedonia bedewe-ribi rehemynyre, Tximòtxi-wana. Paulo tai rybe ritÿnynymyhÿhy raremyhÿ. Aõu Paulo rarybere: –Inatyhymy Jesu-isi Deuxu deòdÿÿna rare, Kristu rare.

⁶ Katahe judeu mahãdu tamy raykarananymy raremyhÿ. Aõbinahakÿlemy Jesusimy rarybere. Tahe Paulo taty riohowire iixãwidinykemy riteòsinykemy. Tahe tamyreny rarybere: –Jiarÿ aõkõ bede òrarure. Kai aòraruna-di burukre-wana, ahãlubureny waki aõkõ rare, adeereny dori Deuxu rybemy rarybere. Tahe judeukõdu mahãdu-ò sohojile tuu arelyykre.

⁷ Iribi tahe inyõ heto-ò Paulo rare. Txisiu Justu inire. Tii judeukõdu mahãduõ rare, tahe Deuxu rityhynymyhÿre. Judeu dohodÿÿna heto bire-ki iheto rÿire.

⁸ Krispu judeu dohodÿÿna heto weduni rare. Tii tasÿreny ibutumy Inynyrÿ rityhynymyhÿre. Tule sÿwemy Oritxi hãwã mahãdu rityhynymyhÿre. Paulo riratysebedÿÿrenyre.

⁹ Paulo tahe rummy rÿrÿmy roire. Tai tahe rasina wesemy robire. Inynyrÿ tamy narybede: — Brebuÿmy, Paulo. Marybeke aÿmybo rybemy adee rewahinyré. Rybe tÿnydÿÿ lau brebuÿmy.

¹⁰ Jiarÿ adi watxiwãhãre urenana. Inyÿ adee aÿhe rotÿÿnyÿtyhy. Sÿwemy iny rÿire kaki watyhydÿÿdu. Kia Jesuisi tamy rarybere.

¹¹ Tai he Paulo bede riijere sohoji beÿra weeremy tai bede riere. Ribedeerynymyhÿre Deuxu rybemy.

¹² Roma dinodu tÿmyraÿ ronyre Grecia bede-ki. Ini heka Kalio inire. Dinodummy ronyrau tahe, judeu mahãdu wii dotyde. Wii ritobinyre Paulo dee aÿbinabinahãkÿ riwinykremy. Tahe tiiboho Paulo rimyrenyre idi kanakremy ywisidÿÿdu dinodu-ÿ.

¹³ Kiamy raryberenyre: —Paulo, Deuxu deãlanamy iny dibedeerynymyhÿde. Tai bede ywina rityhynyÿhyymyhÿre.

¹⁴ Tahe Paulo ixideele rarybekemy ratxireri, tahe Kalio judeu mahãdu-ÿ rarybere: —Kia rubudÿÿdu ada aÿ ibinatyhymy ratxikeki, tai idi arohonykre, ariywisidÿÿnanyke.

¹⁵ Tahe aÿkÿre, urile abede ywina rybedile rarybemyhÿre, tai ywisidÿÿnamy idi araÿkre. Kai-bohole biywisidÿÿnanybenyke.

¹⁶ Tahe Kalio ibutumy diteÿnyde ywisidÿÿna hetoube-ribi.

17 Tai tahe judeu mahãdu dohodÿÿna heto wedu rimyrenyre. Sòteni inire. Tule raòhòterenyre ywisidÿÿna heto ube-ki. Kalio tahe kia òhòtena-ò aõhe rotÿÿnyõhyllere.

18 Oritxi hãwã-ki Paulo rare myhÿre sõwemy he tai txu riwyre. Idi tahe seriòre mahãdu-ò rarybere: —Arakre. Tahe hãwòò-di he rare, reuròkemy Siria bede-ò. Tahe Prisila Akila-wana tii-wana ròirenyre. Paulo Deuxu-ò rarybere aõmybo rotÿÿnykremy. Idi tahe rexihumy kia rÿire. Tai tahe tarade risyre nohòti ijerana wesemy. Sekrea hãwã-ki tarade risyre.

19 Tahe ritehemynyre Efesu bede-ò. Prisila Akila-wana ririre. Iribi tahe rare tyyriti ritÿÿnyremy judeu mahãdu dohodÿÿna heto-ò.

20 Tii mahãdu tahe Paulo rexitòenyre tai aõutxumy tai ratxunykemy. Tahe rarikòkemy ratxireri.

21 Karibi ròhònyreu, tamy rarybere: — Deuxudeewikeki, ixyby adòòsekre. Efesu-ribi ròhònyreu, yhydynamawòò rimyre.

22 Ritehemynyre Cesaria bede-ò. Iribi resereu, Jerusalẽ hãwã-ò rare. Tahe rarybere riwehityhynanyre dohodÿÿna mahãdu. Iribi tahe Atxiòkia hãwã-ò rare.

23 Tai bededÿÿnana riijere idi tahe rara. Rariamy rare hãwã hãwã-di, Alaxia bede-di, Frigia bede-di. Ibutu hãwã-ki ityhydÿÿdu rotohodÿÿnymyhyre, riwiòhenanmyhyre.

24 Iu tahe inyõ judeu mahãduõ dehemynyde Alexÿdria hãwã-ribi. Apòlo inire. Tii ribedeeryny wihikÿmyhyre tyyriti, tarybe-di rotohononymyhyre, Deuxu rybe rieryreki.

25 Inyõ Apòlo rierynanyre timybo Inynyrÿ Jesuisi aõmydÿÿnana raremy. Tai Jesuisimy ribedeerynyny raremyhÿ, deysanatyhy-di rarybemyhÿre. Tii tahe Joaõ ratysebenale rieryre.

26 Apòlo rexidelenyny relyyre judeu mahãdu dohodÿÿna heto-ki. Prisila Akila-wana tai roholamy ronomyhÿre. Idi tahe tiiboho Apòlo ridyrenyre ibutumy Jesuisi aõmydÿÿnanamy tamy ritÿnykemy.

27 Iribi tahe Apòlo ratÿinykemy rexiwonyre Grecia bedey-ki. Ityhydÿÿdu seriõre tamy rybe riwahinyre, Grecia ludu seriõre mahãdu-ò, aõma, riryludunyky, rehemynykeu. Tahe rehemynyreu, sõwemy riwiõhenanyre kia tyhydÿÿdu seriõre, Deuxu ruxetõena ityhydÿÿdu mahãdu.

28 Tii dori judeu mahãdu raykyrybe itxÿte riwitxiradÿÿnyre iny sõwe hekÿy-ki. Rybetyyriti ritina-di riurihimy rarybere iwese Kristu Jesuisi raremyhÿ wese, Deuxu deòdÿÿna wahe.

19

1 Apòlo, Oritxi hãwã-ki rareu, Paulo rabetÿinyre kabedey-ki idi rehemynyre Efesu hãwã-ò. Kowa ityhydÿÿdu mahãdu-ki he rahare.

2 Tamy Paulo ritÿÿraxinyre: –Tetyhynyteu, Deuxu Tyytybytyhy ixidee aõbo temytenyte. Tahe rirawyõnyre: –Aõkõre he, aõmybo tarybeteri. Deuxu Tyytybytyhy reeryõrenyre.

3 Paulo rÿÿraxire: –Taratysebetenyteu, mobohe tetyhynytenyte. Tahe rirawyõnyrenyre ixityre: –Retyhynyrenyre ibutumy Joaõ Sebedÿÿdu riwabe-deerynyremy.

4 Paulo tahe tamyreny ritÏÏnyre: –Joaõ sebedÏÏna urihimyõ iwitxi rare. Tii kiawese rybe ritÏÏnyre: iny taòraru-txi tõhõti reakemy. Tahe Jesuisi Juaõ hewo-ribi kanakreu, tii tahe inatyhymy kanatyhydÏÏkre. Paulo kia tamyreny rarybere.

5 Kia-ò roholareu tahe, raratysebenyre InynyrÏ Jesuisi nimy.

6 Paulo iratytyre tebò ritidire, tai Deuxu Tyytybytyhy tamyreny ralore. Tahe Deuxu rybemy raryberenyre, tule iwitxira rybemy raryberenyre.

7 Waòinatxi reurò hãbumy rÏiramy.

8 Inataõ ahãdumy Paulo reamy raremyhÏ judeu dohodÏÏna heto-ò. Tiiemy rarybehymyhyre, riòbitinymyhyre, Deuxu Iòlònamy ritÏÏnynymyhyre.

9 Paulo-ò ijohonaduõ rityhynyõhymyhyre, teramy reamyhyre. Deuxu aõmydÏÏnanamy ibinamy rarybemyhyrenyre iny sõwey-ki. Tai tahe Paulo rexihitxinyre judeu dohodÏÏna heto-ribi. Txirano kia tyyriti rybena heto-ò txuõ txuõlemy ralòmhyhyre taerydÏÏna-wana. Tahe rabedeerynymyhyre.

10 Tahe bedere inatxi beòramy. Tai tahe ibutumy iny Asia bedere ludu mahãdu InynyrÏ rybe-ò roholamyhyre, judeu mahãdu, tule judeukõdu mahãdu.

11 Deuxu aõna aõna wiwihikÏ riwinyre Paulo debò rihuòtere.

12 Paulo tykyyre riwyrenyre webinadutyre ritidirenykremy. Tyky òsuròna wesemy ijõmy riwyre. Tai tahe webinadu riteytenymyhyre. Tule tyytybybinahakÏ iny-ki raremyhÏu, aõwesele iribireny ròhònomy reare tykyyre òraru-ki.

13 Ijõ judeu mahãduõ ratÏÏnyre hãwã hãwã-di

inyõ ribi tyytybybina ritakemy. Tiiboho tyytybybina riteònykemy idi ratxireri. Tai tahe Inynyrÿ Jesusini-di riteònyre. Kia wesemy rarybere: — Paulo, Jesuisi rybe ritÿnynymyhÿre, tai Jesusini òraru-ki iribi bòhònykre.

14 Debòinatxi seriòre kia riwinyre. Sewa tybynire, judeu xiwena widÿÿdu kia wedu tii rare.

15 Tahe Jesuisi ni-di tyytybybina-ò rarybereu, tyytybybinaõ dirawyònyde: —Jesuisi reeryre, Paulo reeryre, tahe mobo atxiteri.

16 Tahe hãbu tyytybybina-di ratxirerí, ityrehékÿle dexiwatxinyde, rihetenyre, ibutumy riwotõmonyre ityky ritare tai hetowo-ribi hãbu mahãdu tadehekÿlemy rahenyre.

17 Ibutumy Efesu hãwã mahãdu kia rieryrenyre, judeu mahãdu, judeukõdu mahãdu. Tahe ibutumy ruberure, Jesuisi ni nityhydÿÿhÿkÿmy ini raremyhÿki.

18 Sõwemy ityhydÿÿdu taòrarureny riix-itòedÿÿnymyhÿre, dohodÿÿna mahãduy-ki.

19 Ijõ ityhydÿÿdu juhoo tyytybybina rierymyhÿrenyre, tiiboho tahe tatyriti diwyde itxenadÿÿmy rybetyriti, òwòruwidÿÿ kia tyyriti. Tahe iny rethemyhÿreruki kia tyyriti sõwemy ritoonyre. Idi ibutu tyyriti juhoo òwy wese inyõ riritinyre. Iòwy tahe 50 mil womati ura nieru juhoo iòwyre. Ihãrele tahe idi rahure.

20 Ibutumy kia bedè mahãdu Deuxu rybe-di rõhõtinihikÿrenyre.

21 Idi tahe Paulo tarayky-ki rõhõtinyre: — Judeukõdu mahãdu bedè-ò arakremy ixi-di watxiwãhãre. Juhoo Jerusalẽ-ò arakre Macedonia

bede-di Akaia bede-di arariamy arakre. Adòsekreu, tahe Roma hãwã-ò arakre.

²² Tai tahe tawiòhedÿÿdu Tximòtxi, Erasto-wana Macedonia bede-ò riteònyre. Tai Paulo Asia bede-ki naride. Bededÿÿnanaõ riwyre.

²³ Kia bededÿÿnanau aõbina nihikÿ rÿikemy riwisÿnyre Deuxury òbitina òraru-ki.

²⁴ Dimitiu heka womati tÿrÿrÿÿ ura ritxoo widÿÿdu rare. Hãwyy ritxoo ihãwãreny deuxu rare. Diana inire. Nieru sòwemy ritamy raremy idi riwinymyhÿreki.

²⁵ Dimitiu ributunyre ibutumy womati ritxoo widÿÿdu, tamahãdu-wana. Tamyreny rarybere: — Wanyrÿboho adeereny ararybekre. Inyboho nieru ritamyhÿrenyre kaa aõmysÿdÿÿ-ki. Kia tahe teerytenyte.

²⁶ Paulo rarybemyhÿre kaa inywidÿÿnareny deuxu aõkõ rare. Tai tahe sòwemy iny tamy nariade irybe-di. Efesu hãwã sohojile-ki aõkõ, ibutumy Asia bede-ki irybe rityhynymyhÿre.

²⁷ Iny aõmysÿdÿÿna òsana riixãwididÿÿnykre, ideuxu dohodÿÿna heto-wana, iny deuxu reny riixãwididÿÿnykre. Diana inyluure. Kaki sohojile aõkõ inyluure, ibutumy Asia bede-ki, tule bede bede ludu iluu inihikÿmy awireki. Paulo heka kia ibutumy rahukre.

²⁸ Kia roholareu tahe, raykarananyrenyre. Ryrerenyre: —Diana awi rare inydeereny. Tii Efesu hãwã deuxu rare.

²⁹ Rirajuamy rÿimyhÿ hãwã-ki. Hãwã mahãdu, Kaio Aristarku-wana rimyrenyre tahe ridyrenyre butunaube-ò. Tiiboho Paulo tÿimahãdu rare, Macedonia hãwã mahãdu rare.

30 Tahe Paulo ralòkemy rexiwonyre tatÿi mahãduhe-ki, iny sòwey-ki tahe taerydÿÿna ijoiririrÿre.

31 Tule ijò bededinoduò, Paulo wiòhedÿÿmy ratxireri. Tai tarybereny Paulo-ò riwahinyre ibutunaube-ò raòkemy, brebunamy roireriki.

32 Tiilemy ijò rarybemyhÿre. Ijò iwitxiramy rirajuamyhÿre. Urile wimy rauriurire. Aòherekibo ibutummy rÿirerí, iny rieryòhÿre.

33 Alexÿdre iny sòwey-ribi rimyrenyrene tahe, idi retÿhire, ritamadÿÿnyre iny rudera-ò. Alexÿdre debò riteòsinyre tamahãdumy rarybekemy.

34 Iny sòwemy idi retehereu, judeu mahãduò raremy rieryreu tahe rirajuatyhyre. Tahe inatxi òramy rirajuahÿy rÿimyhÿ: —Diana awi rare. Tii heka Efesu deuxu rare. Kiamy ryryrenyrene.

35 Idi tahe hãwã weduò riixãwididÿÿnyre. Tahe rarybere: —Hãbu, Efesu hãwã mahãdu. Ka hãwã Diana hãwã rare. Kaki tohodÿÿna heto reyrubuwãhãrenyrene. Kaki biu-ribi mana ritxoo desede. Ibutummy kia reeryrenyrene.

36 Kia inatyhy rare. Tai tahe rikiyrymy rokorokorenkyre. Aòwesele aòwidÿÿòmy.

37 Kaa hãbu tedytenyteri. Aòhe rotÿÿnyòreri. Aò-di rawasinyòhÿyteri dohodÿÿna heto-ribi. Aòbinahakÿ iny hãwÿy deuxumy raryberenyòhÿyteri.

38 Dimitiu tamahãdu-wana aòbo tai reny ibinamy ihÿrenykeki, ywisidÿÿdu-ò idi rakre. Tiibohe heka wii ributunymy rÿireri.

39 Ijò rybe tahe atxibenykeki, ijohonadu mahãdu adibutunykre arybe-ò aroholarenkyre.

Iwese inyboho rotÿÿnymyhÿre wese ari-eryrenykre.

⁴⁰ Roma hãwã dinodu òsana aõmybo inymyreny kanarybekre. Wiji inyboho aõhebo rotÿÿnyrenyrerimy. Aõ kÿnyhe iò-ki ka wiji jei jei rÿireri wahe. Roma hãwã dinodu tarybe kidiwahinykre-wana wahe, timyhe warybeõna.

⁴¹ Tahe riixãwididÿÿnyre. Ròsere ibutumy.

20

¹ Kia jei jei rybe rexihureu, Paulo tahe taerydÿÿna mahãdu-ò tarybe riteònyre tiiboho kanakemy. Tahe rakrekou tyremy tamyreny Deuxu rybe-di rotohonyreny Deuxudeewimy rierykemy. Idi tahe ritobinyreny. Rare heka Macedonia bede-ò.

² Ibutumy titxibo rexitomonymhÿ ritohodÿÿnymyhÿre ityhydÿÿdu mahãdu-ò.

³ Tahe Akaia bede-ki heka bede riijere inataõ ahãdu. Tahe rexiywinymyhÿre ratximyhÿ Siria bede-ò rakremy hãwò-di ridymyhÿredi heka rakremy rexiywinyre. Idi tahe judeu mahãduõ irubudÿÿmy rarybemy nyimyhÿ. Inyõ Paulo rierydÿÿmy, tai ta Macedonia bede-di ròsere Siria bede-ò rakemy.

⁴ Hãbuõ ramyhÿre tii-wana Jerusalẽ-ò, ta kamahãdu Asia bedeòle he roirenyre. Sopatu ijõnire, tii heka Bereia hãwã mahãdu rare, Biru heka Sopatu tybyni rare. Aristarku ijõre, adelahelÿÿna ijõni rare, tiiboho Tesalonia hãwã mahãdu rare. Ijõ Kaio inire, tii Debi hãwã mahãdu rare, Tximòtxi ijõ rare. Tule ijõ Asia bede ludu rare, Txitxiò ijõ, Trofimo ijõre. Rarekie.

⁵ Kiaboho juhutyhy rexiraòmy roirenyre. Paulo riraòmy Troaji hãwã-ki. Tule riwaraokre —Luka jiarÿ ka tyyrity widÿÿdure.

⁶ Worana bedehesi ituereu tahe, jiarÿ Paulo-wana roirenyre heka hãwò-di Filiposi hãwã-ribi. Iruyre txu rÿidi tahe rehemynyre. Troaji hãwã-ò. Taita sohoji semanamy rewyrenyre.

⁷ Tahe nobiutxu ityhydÿÿdu mahãdu iny wi ributunyre, Inynyrÿ mona, rÿsÿna-wana tuu ri-hitxinymy rirÿsÿkemy.

⁸ Tahe Paulo iu rybe ritÿnynyre itxu biòwamy rexywinymy rÿimyhÿ tahe rakremy. Urile tahe rarybereri hyky tahe ruetya he wihe ritotynymyhÿrenyre. Heteranoa-ki biu-ki rÿimyhÿre. Kanoõtyhy-ki rabuturenyre. Tiu Paulo rarybemy rarybemy rexihukõhyyre, biurasòmy rakreki. Tahe sòwemy heka lamparina rÿimyhÿre.

⁹ Ronymyhÿ, moma inire, Otxiu. Aõma-ki ronymyhÿ, heto janela tyre-ki biu-ki. Ta tõhõti rosare, rõrõmy resere. Iribi reare, biuribihikÿle resere suò. Rurure.

¹⁰ Tahe Paulo robehemy rare tamy. Tatiowotimy resere weryrybò rimykremy iwetya-ki. Paulo rarybere: —Bedeòiidÿÿõmyke irulemy roire. Deuxu ixyby iumy tamy riwahinyre.

¹¹⁻¹² Weryrybòmy irumy robirenyre tahe, ibutumy reysarenyre. Tai tahe Inynyrÿ bemona, rÿsÿna-wana tuu rirÿsÿrenyre biu-ki wahe. Paulo ixityre rarybere. Txu iòlò iòlòmy rareri-wana tahe rarybere. Tahe Paulo rare. Tatilemy rare Aso hãwã-ò. Tii tamy tarybe ririrehe: —Kowa ayhywy-

dyna lawò arimykre.

¹³ Tahe jiarÿ, Luka, wamahãdu-wana roirenyre yhywydynalawò-di Aso hãwã-ò Paulo-wana rekoarenykemy.

¹⁴ Rehemynyrenyreu tahe, Paulo ralòmy yhywydyna laworo-ki.

¹⁵ Imytxubiòwa tahe Kio hãwãko-txi rehemynyre. ijõ txu tahe Samosi hãwã-ki rehemynyre. Ijõ tahe rehemynyre Mitilene-ò.

¹⁶ Paulo ixitamadÿÿ deramy reare Efesu hãwã-ò. Raeleemy ratximyhÿ Jerusalê-ò rehemynykemy, aõma, Pentecoste kia judeu worana bedehesi-ò raeleelere.

¹⁷ Tahe Miletu hãwã-ki rehemynyreu, dohodÿÿna matuari mahãdu tamy he rarariòwyre tamy rarybekremy hãwò-ò kedehemynykemy. Tahe Efesu-ribi ditehemynydeu, kia tamy rarybere:

¹⁸⁻¹⁹ –Tahe tiemy Asia bedeki Inynyrÿ-ò raaõmysÿdÿÿhyy watxiwãhãre. Aõmy aõkõ ixidee rahõtinywãhãre. Rahinymahãre, Inynyrÿ dee rybe retÿnynymahãre. Warube resehyy watxiwãhãre. Tai ta brebuna nihĩkÿ waumy-di rarewãhã. Judeu mahãdu heka sõwemy wamy rarybemy riwarubunyky. Kia ibutumy aõmydÿÿnana teerytenye.

²⁰ Tiu raberuõhyywãhãre Inynyrÿ nimy rybemy. Ibutumy rarybewãhãre iny sõwey-ki tule heto hetowomy relymahãre.

²¹ Judeu mahãdu-ò retÿnynyre tule judeukõdu mahãdu-ò taòraru ririkemy Deuxu dee taòraru-txi tõhõti reakemy rabadewokemy. Tule Jesuisi Kristu rityhynykemy.

22-23 Katahe wiji arakre karibi Jerusalê hãwã-ò. Deuxu Tyytybytyhy heka wadee dyrymyhÿde. Aõhebo arotÿÿnykre, reerykõre. Kiale reerywãhãre, aõma, Deuxu Tyytybytyhy wadee rarybemyhÿre ibutu hãwã-ki, aõma, aõhõkÿmy arotÿÿnykre kowa. Rotenawo-ki aroikre. Myle reeryre.

24 Tiiemy tamy raaõmysÿdÿÿmahãre. Kiale wadee Inynyrÿ Jesuisi rewahinyre urenana. Kia ariwinyõkeki, aõ aõkõ heka jiarÿ waumy-ki. Tii arelyywãhãke inyko-ò rybe tÿmyra wihikÿ, timybo Deuxu inyluurenyre.

25 Araerynanywÿhÿrenyrene Deuxu Iòlònamy, wamy tahe bobibenyõtyhy ixityre. Kia reerywãhãre. Jiarÿ tule umyreny arobiõtyhy.

26 Tahe adeereny aõmybo ararybekre. Ryranomy heka watxiwãhãre ibutu hãlubu-ribi. Kaiboho aòraru-di burubenykeki, jiarÿ aõkõ tuure. Inyõ wamy rarybeõtyhy aõma Rybewihikÿ-di jiarÿ itÿnynyõmahãremy.

27 Tiiemy rarybehyy rarewãhã ibutumy Deuxu bede wwinamy.

28 Tai tahe ixidi awimy boibekre. Iwese bu-doeni itxeredu tamy rÿsÿna riwahinyre wese, kaiboho ityhydÿÿdu mahãdu-ò Deuxu rybe tamyreny biwahinybenykre. Deuxu dohodÿÿna mahãdu tii rare. Jesuisi tahãlubu-di tii riwyre. Tai tahe ityhydÿÿdu mahãdu wiõhedÿÿdumy kaiboho toite.

29 Karibi arohonykreu, aitxeredu mahãdu kanakre. K reeryre. Adeereny õbitimy aõkõ rierynanykre. Tiiboho aholawesemy ratximyhÿrenyrene. Iwese bu-doeni-ò imynymy ròsemymyhyÿre wese heka kedehemynykre.

³⁰ Inyõ heka aityhydÿÿdu seriðre yribi iwitxira aõna aõnamy kidierynananyhÿkre. Taijoi kidiðdymyÿkre tarybe-ò ijohonamy.

³¹ Tahe bijemy boibekre. Inataõ beðramy awana rarewãhã. Kiamy rarybereri, iribi nohõtilosarenyõmy. Txu-wana, ruwana adireny ròrenywãhãre. Rahinymy heka aðrarureny-ki watxiwãhãre.

³² Tahe ararirenykre Deuxu-wana ix-di he awimy renykre. Tii heka adireny rarekre. Tii tahe nohõtilosarenyõmy, boibekre Deuxu rybe-di. Tii heka riwiðhenanykre atyhyna raumynykremy. Deuxu riywinyre wahe adee reny aõna aõna wiwihikÿ riwahinykre òbiti mahãdu-wana kia bitabenykre.

³³ Tiu heka jiarÿ ijò hãbu-ribi nieru tarasamy rahõtinyõhyymahãre tyy wiwihikÿ tarasamy raruõhyymahãre.

³⁴ Tiiemy wadebò-ribi hyy hyy raaõmysÿdÿÿmy rarewãhã waaõmydÿÿnana òwydÿÿmy. Tule rewiðhenanywãhãre tii-wana watxiwãhãre mahãdu. Kaiboho teerytenyete kia.

³⁵ Ibutumy rewiðhenanywãhãre iaõkõ mahãdu kia heka tuu tabitenyete kia rewinymahãremy. Teerytenyete timybo Jesuisi rarybere: — Biwahinybenyke, kia dori iny-ribi ritamyhÿre ratyre awi rare.

³⁶ Tahe rybe-ribi rexihureu, tatiowotimy rotamanyrenyrene wiwana rexitðenyrenykre.

³⁷ Tahe rahinyrenyrene, rimirenyrene tamy wòrenyrene, aõna rakreki, kia-ki rexityhenyrenyrene tamyrenyrene.

³⁸ Tiiemy rabadeworenyrene tiu tuu

robirenyõkremy. Tahe hãworo-ò tiiboho-wana roirenyre.

21

¹ Iribi ròhònyreu tahe, òbitihyy rare Kòsi hãwã-ò. Ijõ txu tahe Rodesi hãwã-ò ritehemynyre. Iribi tahe Patara hãwã-ò ritehemynyrenyire.

² Tai tahe rahare hãwòõ-ki, Senisia hãwã-ò rakremy rexiywinyreri. Roirenyre kia yhywydynalawò-di tahe rorukurenymy ròirenyre tamy.

³ Xibri bedebute weribi-ò reurore, inyhywewawe-ribi Siria bede weribi-ò. Tahe ritehemynyre Tiro hãwã-ki. Tai tahe hãwò-ribi aõna aõna-di rekoarenyre.

⁴ Tamy roirenyreu tahe, rÿÿraxirenyre kahãwã ityhydÿÿdu mahãdumy. Tai raharenyre. Sohoji semanamy bede tiiboho-wana wadireny rÿire. Ki-aerydÿÿna mahãdu heka Paulo dee raryberenyre: —Aõma noõmykre Jerusalẽ-ò. Deuxu Tyytybytyhy tuu tamyreny rarybemyhÿre.

⁵ Tahe semana ituereu, diòòsedenyde ixyby hãworo-ò. Ibutumy diberenydenyde ityhydÿÿdu mahãdu tiiboho-wana ÿnyra-ò, hãwyy, uladu, ibutumy. Tahe rexitòenyrenyire.

⁶ Ritobinyrenyire tahe, riòòserenyre heto-ò ixyby.

⁷ Idi tahe Tiro hãwã-ribi rare. Tahe Tolimaida hãwã-ki ityhydÿÿdu mahãdu rerybewãhãrenyire txu sohojilemy bede reijerenyire tai.

⁸ Ijõ txu biòwamy tahe roirenyre Cesaria hãwã-ò. Tahe Filipisÿ-ki rasÿnyreny Rybewihikÿ-di tÿnydÿÿdusÿ-ki wahe. Tii juhuru aõma ityhydÿÿdu mahãdu wiòhedÿÿduõ juhutyhy rare.

⁹ Tii heka inaubiòwa iriòre rare. Tahe heridu aõkõ ijadòma mahãdu rare. Ijadòma mahãdu heka Rybewihikÿmy rybeduõle rare.

¹⁰ Tahe aõtxu taile watziwãhãrenyre. Tahe hãbuõ dehemynyde Judeia bedè-ribi, moma inire Abusi. Tii tule Deuxu rybe-di rarybemyhÿre.

¹¹ Idi tahe nade inyorarenymy. Tahe rimyre tii Paulo wereysana. Tawahe idile rimyre rexitaare tebò-wana. Idi tahe rarybere: —Deuxu Tyytybytyhy wa kiamy rarybere: —Kia wereysana wedu heka iwese rataataamy rãire wesele heka tule rataataamy rÿikre Jerusalẽ-ki judeu mahãdu heka kia riwinykre ta riwahinykre judeukõdu mahãdu-ò.

¹² Tamy raholarenyreu tahe, raryberenyre Paulo dee raõkremy Jerusalẽ-ò. Jiarÿboho raryberenyre tamy tule ijõ tule tamy raryberenyre.

¹³ Tahe Paulo rarybere: —Hirenyõmyke, ti-wabedewodÿÿnytenyteri. Rexiywinymy watzireri Jerusalẽ ròtena-ò aralòkemy. Tamy sohojile aõkõ kÿny, tule Deuxu dee wikeki tahe arurukre Innyrÿni òraru-ki.

¹⁴ Timy heka Paulo nohõti rareadÿÿrenyõke tiemy tanonanamy rara. Tahe rarybemy rahudi kiamy tarybe-ò resere Deuxudewilemy rotÿÿnymy ratxike.

¹⁵⁻¹⁶ Iribi tahe iny aõna aõna rexiywinymy Jerusalẽ-ò roirenykemy. Ijõ ityhydÿÿduõ Cèsaria-ribi iny-wana roirenyre. Tahe retehemynyrenyreu, Menasõ heto-ki rasÿnyrenykemy ityhydÿÿdu riwadyrenyre. Menasõ heka juhutyhy ityhydÿÿdumy ralòmny raremyhÿ. Juhuu tii Xibri

bedebute-ki rasÿnymy raremyhÿ.

17-18 Jerusalē ityhydÿÿdu mahādu ibutumy awimy riwamyrenyre. Jiarÿ, Luka wahe, Paulo-wana, ijō ityhydÿÿdu-wana. Ijō txu biòwamy tahe Paulo riwadyrenyre Txiaumy robikremy. Tule ijō Jerusalē dohodÿÿna matuari mahāduō tai ronyre.

19 Wirirybenymy rahudi tahe, Paulo tamy re-lyyre aõhebo Deuxu tamy rotÿÿnyremy. Timybo judeukōdu mahādu Deuxu rityhynyremy.

20 Kiamy roholareu, Deuxumy reàlarenyre ibrò-kí. Tai tahe inyō rarybere: —Paulo, sōwemy judeu mahādu rityhynyre. Kai teeryte, inyseriòre, ibutumy judeu mahādu bedē ywina riywinymy ratximyhÿhy.

21 Inyō umy rarybere, raroimyhÿre kaki Jerusalē-ki. Judeu ityhydÿÿdu mahādu-ò rarybere: —Paulo he Moisesi bedē ywina-ribi nohōtirosakemy tii riteònyre. Paulo rierynanyreri judeu ityhydÿÿdu mahādu-ò kia judeukōduy-ki rasÿnyre mahādu-ò. Kia inyō riki rarybere, Paulo uladunotyky resyna riteòdÿÿõreki riki.

22 Tii kÿnyhe roholarenkyre kaò themynyter-imy.

23 Tai kiamy rikiwinyrenkyre. Inaubiòwa hābu katxi rare tarade riwysynkyremy. Deuxu-ò tarybetyhy riwahinyrenyre, tai tahe tarade riwysynkyremy.

24 Kai tule makre iwesele arade riwysynkyre Deuxu dohodÿÿna heto-ò. Tahe iradereny synaòwumy biòwynkyre. Tai tahe ibutumy aluukre judeu mahādu bedē ywina tetyhynymahāteki wahe.

25 Aõ inyboho ka judeukõdu mahãdu. Ka bede ywinaõ rityhynykemy aõkõ tuu iny ratxirenyre. Kaa adeereny tuu rarybewãhãrele rityhynyrenykemy: –Ka aõma rÿsÿna ritxoo rÿsÿnamy iwahidÿÿnalemy irÿsÿõmy, tule iròdude ihãlubu iijeradÿÿõreri, uritere irÿsÿõmy, tule òta òta òraru widÿÿõmy.

26 Tai tahe Paulo rarybere: –Hÿde, tii ariwinykre. Tahe Paulo rare Deuxu dohodÿÿna heto-ò kia hãbuõ-wana. Tahe ibutumy iny riryre xiwenaõ riwinykre wahe, tamy dori raryberenyre.

27 Tahe debòinatxi reurò txu-di riwinykremy. Idi ka debòinatxi reurò txu rexihudi tahe iòhòmy. Tahe Asia bede ludu judeu mahãduõ tuu robira. Tiiboho iny-ò rarybere Paulo rimykremy.

28 Sõwemy iny tamy wi rotyre Paulo òludumy. Tiiboho kiamy rirajuarennyre: –Haeli mahãdu, wylemy bodoike. Biwawiòhenanybenyke. Ka hãbu ratxireri iny bede ywinareny òludumy ritÿnynymy rÿimyhÿre. Iny dee narybemyhÿde judeu mahãdu bede ywina rityhynyõkemy, tule iny Deuxu dohodÿÿna hetomy, judeukõdu kawo-ò didyde tai tuu ribinadÿÿnyreri.

29 Juhuu tahe ijõmy robire hãbuõmy hãwãhãkÿ-ki Paulo-wana ratxirerimy. Trofimo inire. Tii heka Efesu hãwã mahãduõ ityhydÿÿduõ rare, judeukõdu mahãdu aõkõ tii ihÿre. Tahe judeu mahãdu rõhõtinyre Paulo dohodÿÿnahetowo-ò Trofimo ridyramy. Tahe Paulo ridyõlere.

30 Tahe sõwemy iny rakyarananyre tamy, aõma kia hãwã hãkÿludu mahãdu. Sõwemy iny

rarybemy rÿimyhÿ, rajeijeimy rÿimyhÿ. Paulo tahe retÿhirenyre dohodÿÿna hetowo-ribi, ijòtòbòna riratòbònyre.

³¹ Tahe rirubunykeny riteleny heka. Tahe soldado dinodu tyhy roholare aõma ibutumy Jerusalẽ hãwã-ki jei jei-di rÿireri.

³² Tai tahe soldado tawedu diteònyde kia tai jei jei mahãdu rÿireriò. Tahe soldado robirenyrau, riixãwidinyreny, Paulo òhòtedÿÿ-ribi.

³³ Kia soldado wedu tyhy Paulo mynomy riteònyre. Tahe ritaataareny womati reroti-di. Tahe rexitònyre kia inydee mobo he ratxireri. Aõhebo he tii rotÿÿnyrerimy.

³⁴ Ijõ heka iwitxiramy rarybemyhÿre, ijõ tilemy rarybere. Tai tahe soldado dinodu bede rieryõhyra timyrebomy, ibutumy iny rirajuareki. Tahe ridykemy riteònyre. Tahe soldado heto-ò Paulo-di roiremyre.

³⁵ Ryòwòna-di rotuòrau tahe, hãwã mahãdu aõkõre he reburera. Soldado mahãdu Paulo taaxiò tyre ritidimy idi rara iny rimyheny.

³⁶ Iny he rirajuamy rarybemyhÿre: — Bidybenyke, birubunybenyke wahe. Myhe soldado mahãdu hewomy rirahumyhyre.

³⁷ Tahe rirònykremy roirau tahe, Paulo soldado dinodu-ò rarybera: —Adee inihe wanyrÿ, ararybekemy watxireri. Tahe soldado dinodu ritÿÿraxinyre: —Kai aõbo kreku mahãdu rybe teeryte.

³⁸ Kai jiarÿ araeryre. Kai Egito mahãdu dinoduò tate, ibutudÿÿdu wedu tate. Kai 4000 iny aõbina widÿÿdu tedyte bederahy-ò.

³⁹ Aõkõre, Paulo dirawyònyde, tii aõkõ watxire.

Jiarÿ Roma hãwã mahãdu tyhyre jiarÿ rare. Wahãwã, Tarso hãwã rare, hãwã riòre aõkõ Silisia bedeki. Judeu mahãdu tule jiarÿ rare. Kaki iny mahãdu-ò ararybekemy watxiwãhãre.

⁴⁰ Tahe soldado Paulo -ò rarybere: — Tahe marybeke. Tahe lamamy rÿire inydee rarybekemy. Paulo tebò riteòsinyre riijohonadÿÿnykemy. Tai ibutumy iny riyrymy rÿirenyre. Judeu mahãdu rybe-di tamyreny rarybere.

22

¹ Kawese Paulo tamyreny rarybere: — Waseriòre, waluuboho, wabededÿÿnanamy adee arelyykre. Wamy bohولاتyhyke.

² Judeu mahãdu rybe-ò roholareu tahe, riyrytyhymy rorukurenyre. Tii heka rarybere: — Jiarÿ judeu mahãdu jiarÿ rare. Raumynyre Tarso hãwã-ki. Kia Silisia bedeki rare.

³ Kaki Jerusalẽ-ki ratyyritinymy rarewãhã, Kamalie ninadu tyryritina-ki. Ibutu Judeu mahãdu bedeki ywina bedeki reeryre Kamalie-wana. Ibutumy Moisesi bedeki ywina-di riwaerynanymyhÿre. Tii tahe reywinywãhãre, retyhynytyhywÿhÿre. Ibutumy Deuxu bedeki ywina ariwinykemy ixi-di rahõtinywãhãre iwese wiji iwidÿÿmy tarutenyteri wesele wahe.

⁴ Jiarÿ ka ityhydÿÿdu mahãdu aõhõkÿmy rotÿÿnymyhÿremy reteòwãhãre ihyyle ijõ rubudÿÿmy reteònywãhãre. Hãbu hãwyw-wana reròtenywãhãre ròtenawo-ò.

⁵ Waaõmydÿÿnanamy bierybenykre-wana, tamy marybeke dohodÿÿna wedu-ò, matuari mahãdu-ò.

Dohodÿÿna wedu tyyriti rewyre Damasu hãwã dohodÿÿna heto-ò. Tai tahe tyyriti-di risÿnyre ibutumy ityhydÿÿdu mahãdu aõhõkÿmy rotÿÿnykemy, tule womati reroti-di rataataakemy Jerusalẽ-ò ki-didykemy.

⁶⁻⁷ Iòhòmy txutyemy iijira-ò, Damasu hãwãry-ki watxiwãhã. Tahe loosòna itÿnyhÿkÿmy wadee dehemynyde. Bedetxile resere. Tahe rybeõ raholare: —Salu, Salu, aõherekiwexe aõbina binahakÿle wadee tadiwinymahãte.

⁸ Tahe jiarÿ rarybere. Mowexe wadee rarybereri, Wanyrÿ. Tii rarybere: —Jiarÿ Nazare ludu watrixeri, Jesuisi. Kai aõbina binale wadee tadiwinymahãte.

⁹ Hãbu wawana rÿimyhÿ, aõ rieryõhyre aõmybo wadee rarybemyhÿre tahe loosònamy he robirenyre.

¹⁰ Tai tahe rarybere jiarÿ: —Aõwexe ariwinykre, Wanyrÿ. Rarybere: —Myike wahe, make Damasu hãwã-ò. Tai tahe inyõ adee kanarybeke aõbo biwinykremy.

¹¹ Tai tahe rabiõmy rãiwãhã kia loosòna ritÿrÿrÿhÿkÿreki. Tai wabiõwa ryy wadee ritÿnyre wadebò-ki riwamymy Damasu-ò arehemynykemy.

¹² Tai tahe hãbuõ wadee rehemynyre, Ananiamy ninadu. Tii heka Deuxu tyhydÿÿduõ rare, bede ywina rityhynymyhÿre, ibutumy Judeia mahãdu, Damasu hãwã-ki heka tuure.

¹³ Tii tahe wadee rarybere: —Waseriõre, Salu, aruebimyke ixityre bobikemy. Aõwesele tahe rabimy reare. Ananiamy rabire.

¹⁴ Tahe ixityre wadee narybede: —Inytyby

Deuxu juhuu aratare, aõbo tamywimy bierykemy. Tule Jesusimy bobikemy, Deuxu òbiti hãbu. Tule boholakemy aõbo tii adee kanarybekeò.

¹⁵ Tai tahe biwykre irybewihikÿ tÿmyra ibutu bede bede iny-ò. Belyyke timybo taholatemy, tabitemy.

¹⁶ Tai tahe rooreheõmykre. Wijile makre maratysebekre. Aòraru-ribi yrahakÿlemy mabekre, Wanyrÿnimy tetyhynyte xiery.

¹⁷⁻¹⁸ Idi tahe Jerusalë-ò rehemynyreu wahe, aõutxumy ixitøenymy rarewÿhÿ Deuxu dohodÿÿna heto-ki. Tai raholarerasina wese-ki aõma Deuxu wadee rarybererimy: –Wylemy bõhõnykre Jerusalë-ribi. Warybemy tamy marybekreu, rityhynyrenyõtyhy.

¹⁹ Tahe Inynyryÿ-ò rarybere: –Ibutumy hãwã-ki aityhydÿÿdu mahãdu rehãtenyre, rewotomonyre, reròtedÿÿnyre. Ibutumy kaki kia rierymy roimyhÿre.

²⁰ Arybe tÿnydÿÿdu rirubunyreu, moma Este-vaõ, jiarÿ taile watxiwãhãre. Rewiøhenanywÿhÿ irubudÿÿdu mahãdu tyy reyruubunyre aõma mana-di rihurenyreu wahe.

²¹ Tahe Deuxu wadee rarybere: –Bõhõnyke wa Jerusalë-ribi. Irehetyhymy arateòkre judeukõdu mahãdu-ò. Kia Paulo tamyreny rarybere.

²² Tahe kia iny roholamy rÿimyhÿre kia Paulo iximy relyyreò. Tahe raykarananyryryre: –Bidyke karibi ahana-ò, birubunyke. Irumy rareòkre idi watxiwãhãrenyre.

²³ Tatyky riohowire, brybysi-di biu-txi rehure, ryrymyhÿrenyre.

24 Soldado dinodu tahe riteònyre iwo-ò ridyrenykemy awaru òhòtenahãkÿ-di tuu raòhòtekemy. Soldado dinodu rierykemy ratxireri aõherekibo iny tamy rakyarananyraki wahe. Tii rarybekre òsana tuu raòhòtekeki. Kia soldado dinodu ròhòtinyre.

25 Tahe Paulo ritaataarenyre. Imy rahudi tahe Paulo rarybere soldado dinodu-ò: — Jiarÿ Roma hãwã mahãduõ rare. Wamy maòhòtebenyòtyhy, aywisidÿÿna mahãdu wadee roholaõre tebutunyòteki. Kia riwadÿÿkòkemy roimy rare. Abede ywinareny adee rarybere kia widÿÿõmy.

26 Tai tahe kia soldado dinodu tadinodu-ò rare. Tahe tamy rarybere: —Kowa hãbu, Roma hãwã mahãduõ rare. Tai tahe aõbina bina tamy iwidÿÿõmy.

27 Kia roholareu, tii rara Paulo-ò tamy rÿÿraxikemy: —Inatyhybe Roma hãwã mahãduõ aõbo atxiteri. Paulo tahe narybede: —Kohe, jiarÿ, kia mahãduõ watxireri.

28 Tai tahe soldado dinodu narybede: —Jiarÿ tule watxireri. Nieru sòwe-di reòwynyrene tuu aronykemy. Tahe Paulo rirawyònyre: —Jiarÿ tiu kia watxireri. Waha dori Roma mahãduõ raremyhÿ.

29 Tai he soldado mahãdu iribi ròhònyre aõwesele tii Roma mahãdu ratxire riki. Soldado dinodu tule ruberure tii dori rataataamy riteònyreki.

30 Txu biòwamy ritare ròtena-ribi ròhònykemy. Judeu xiwewahidÿÿna dinodu inyõ ributunyrene ywisidÿÿdu mahãdu-wana. Tahe Paulo ridyre tamy. Tii dori rierykemy ratxireri aõherekibo

judeu mahãdu Paulo deramy rÿireri.

23

¹ Paulo tamyreny retehere, dinodu mahãdu-ò wahe. Tahe rarybere: –Waseriòreboho, Deuxudile watzimy ramahãre. Tiiemy aõbina binamy aõkõ watzireri, tamy iluuna-di tyhy watziwãhãre.

² Anania hãbu-ò rarybere, iòhòmý Paulo-ribi rÿireriò: –Iry-ò bihetenybenyke.

³ Paulo tahe tamy narybede: –Kai wa aõ aõkõ tate. Hetotira ura wese tate, awo arayky isuisure. Waywisidÿÿdu wesemy talòmý atxiteri, tahe wahetedÿÿmy tarybeta. Kia bede ywina rarybera wesemy aõkõ tewisÿnyteri.

⁴ Tahe iòhòmý Paulo-ribi rÿireri, tamy rarybere: –Kia wesemy rybeõmy Deuxu xiwe wahidÿÿdu wedu-ò.

⁵ Tahe Paulo rarybere: –Aõkõre, reeryõhyyre aõxiwe wedubo ratxirerí. Tyyriti kiamy rarybemÿhyre: Tiu riki wedumy aõmy rybebinamy aõkõke.

⁶ Idi tahe Paulo rexierymy resere. Tahe ixidee rõhõtinyre. Ka iny sõweyre fariseu mahãdu heka rare. Iyrejura tasÿ saduseu mahãdu rare. Tai tahe Paulo ryryre: –Waseriòre mahãdu, jiarÿ fariseu mahãduõ rare. Waha, wylabieboho ibutumy fariseu roire. Rubu-ribi ixixana retyhynywãhãre. Tai tyhy tahe kia-ò, ywisidÿÿdu-ò wiji diwadyde.

⁷ Imy rahudi tahe fariseu mahãdu saduseu mahãdu-wana wiribi rihitxinyre.

⁸ Saduseu dori rubu-ribi ixixana rityhynyõhyymÿhyrenyre, tule ÿju, tyytyby-wana

rityhynyõre. Fariseu mahãdu tahe, kia ibutumy rityhynymyhÿre.

⁹ Tai tahe sõwemy rajei jeimy rÿimyhÿ. Tahe fariseuõ rarybere Paulo òbitimy ratximyhÿ. Aõ teòsamy tai tuu arobirenyke kÿnyhe aõkõre. Ýjuõ òsana tamy rarybera ada tyytyby aõbo.

¹⁰ Tai ta tarurutyhymy ryryrenyre. Tai tahe soldado dinodu ruberure aõma Paulo riykaykaketxi roholare. Tai rarybere tamy: —Iribi bitake, idi boibenyke ixyby soldado heto-ò.

¹¹ Rummy tahe Paulo weribi Inynyrÿ tamy narybede: —Brebuõmy aõ-di nohõtiõmyke ixi-dí. Iwese kaki Jerusalê hãwã-ki wamy tarybete wesele heka Roma hãwã-ki wamy marybekre.

¹²⁻¹³ Tahe biurasòtxu he judeu mahãduõ wi dotyde Paulo rubudÿÿmy. Iny inatxiwa ituemy hãbu kia wese raryberenyre: Rikiroxirenyõtyhy bemy rikiõrenyõtyhy. Paulo rurukeki xiery ta rikiroxirenykre.

¹⁴ Tahe xiwe wedu mahãdu-ò tiiboho roirenyre. Judeu matuari mahãdu-ò tule kia ibutumy relyrenyre iwese Paulo rubudÿÿmy ratxireri wese.

¹⁵ Tule tamyreny rarybere: —Kaiboho ixityre marybebenyke soldado dinodu-ò manakremy Paulo-di ywisidÿÿdu-ò. Tamy dÿÿraximy idi ratxireri tiiboho rõhõtinkyre. Tai tahe ry kana-ò rearaki tahe ijoi rikirubunykre. Kia judeu mahãdu xiwe wedu-ò rarybere.

¹⁶ Tahe Paulo seriõre woludu, ilana rubudÿÿmy rarybereò roholare. Tahe ralore soldado heto-ò tahe tuu Pauloko relyykemy. Tahe relyyre.

17 Kia roholamy rahudi ta Paulo rariòwre soldado dinodu tamy kanalokremy. Kiamy rarybere: —Ka weryry bidykre adinodutyhy-ò, aõma, ijyy-di ratxirerimy tamy relyykremy.

18 Tahe ridyre soldado dinodu tyhy-ò tahe rarybere: —Paulo kÿny ka weryry-di riwateònyreri aõmybo ako relyykremy.

19 Tahe dinodu weryry axiò iyre ribi rimyre, tahe iny-ribi rirehenyre rarybekemy: —Aõbo wexe wako belyykre, weryry. Tahe relyyre:

20 —Wylana Paulo ridykremy judeu mahãdu adee rexitòenykremy ratxirenyre. Tiiboho adee raryberenykre: —Rikitÿÿraxinykre ijõ aõmydÿÿnana.

21 Uritere tamy boholaõkre, weryry rarybere, idyõmykre tamy. Hãwã mahãdu sõwere rexiwòmy rÿikre, iny inatxi wa itue hãbumy, wylana rubudÿÿmy. Tii ruruõkeki, riroxiõtyhy, bemy riõõtyhy. Kiawese ka hãbu mahãdu rarybemy ramyhÿre. Ahana òsana inyõ rÿireri wylana ridykremy adee kedexitòenykremy. Wylana òludu tahe ryjati-ki rexiwòmy rÿireri.

22 Tai soldado dinodutyhy weryry-ò rarybere: —Uritere inyõ ierysyõmykre wadee tuu telyyteri.

23 Tahe inatxi soldado dinodu rarariòwre, tahe tamy rarybere soldado dinodu tyhy: —Aõma, 200 soldado widotykre inataõ òra txu dòhòny-ribi, ijõ 70 soldado awarutyre-ki, ijõ 200 soldado tõnori-di.

24 Kia ibutu-wana Paulo bidybenykre awarutyre-ki Cesaria hãwã-ò. Biyrubunymy boibenyke Feli, kia bededinodu-ò.

25 Tahe tyyriti riwinyre kia wese:

26 –Jiarÿ Laujiu Lucio, warybe reritinyreri. Warybe wehityhyna rewahinyreri Feli-ò, Wanyrÿtyhy, bede dinodu-ò rewahinyre.

27 Hãbuõ adee reteònyreri. Tii judeu mahãdu rimyre tahe rirubudÿÿmy riwisÿnyre. Tahe soldado reteònyre ritakremy rubu-ribi, tii Roma hãwã mahãdumy rareki.

28 Redyra heka ywisidÿÿna mahãdu-ò. Aõherekibo rimyrenyremy arierykemy.

29 Tabede ywina òrarukile teramy tamy reare, kia reerymy rawãhãre. Iny bede ywina òraru-ki aõ aõkõ tii riwinyre. Tai rurukemy aõkõ idi rewisÿnyre.

30 Judeu mahãdu rarybemy ramyhÿre irubudÿÿmy. Kiamy raholareu tahe, adee reteònykemy resere. Tule irubudÿÿmy rõhõtinyra mahãdu adee rarybekemy reteònyre. Tiibohe aõbo raremy rarybekre. My kie warybe rewahinyre.

31 Idi tahe soldado mahãdu Paulo ridyre, iwese idinodu riteònyre wese. Rudile ridyre Atxipatxi hãwã-ò.

32 Tahe biurasòtxumy tahe tatilemy rare mahãdu ròsere soldado heto-ò. Ijõ soldado awarutyre ludu Paulo iridyre Sesaria-ò.

33 Tahe rehemynyre Cesaria hãwã-ki. Rare he bede dinodu-ò. Paulo tamy riwahinyre tyyriti-wana.

34 Kia tyyriti-di tii rariareu tahe, tamy ritÿÿraxinyre: –Tiribibo tate Paulo. Tahe Paulo dirawyònyde: –Jiarÿ, Silisia hãwã mahãdu rare.

35 Tahe bede dinodu narybede: –Kaa hãbu mahãdu wii kodotykreu, kedehemynykreu, aroholakre inihe arybe-ò. Tahe iyrubudÿÿ

idi risÿnyre Herodi ywisidÿÿna heto-ò, Pretòriu ninadu-ò.

24

¹ Iruyre txu reare rexihudi tahe, Anania, xiwena wedu tyhy, judeu mahãdu matuari-wana rehemynyre, ywisidÿÿna mahãduõ-wana rehemynyre, moma, Tertuliu inire. Paulomy aõbinabinahãkÿ rybemy rareri bedede dinodu-ò.

² Tahe Paulo didyde. Tertuliu rarybere Paulomy. Awiõmy rybe tahe ròhònyre. Juhuu Feli-ò rarybere: –Kai Wanyrÿ tyhy, awihyymy heka atximahãte wadeereny. Tiiemy bedede ywina inydee tewahinymahãte. Ibutumy iny bedede hãwã hãwã-ki iny tewiõhenanymahãte.

³ Tai tahe omy reâlãtyhymy he watxiwãhãre. Urihimyòle adee Paulo aõmydÿÿnanamy ararybekre.

⁴ Txioi inihe làhà, boholabeny.

⁵ Tiiemy jei jeihyy ratximyhÿre Paulo òraru-ki. Tiiemy judeu mahãdu, my heka rarybehyy ratximyhÿre. Tii Nazare hãwã dohodÿÿna mahãduõ rare, kia weduõ rare. Tii Jesuisi rityhynyre.

⁶⁻⁷ Aõkõre, iny Deuxu dohodÿÿna heto ribinadÿÿnyre, rebuna rÿirerimy ihÿre Paulo òraru-ki. Remyreny tahe, ywisidÿÿmy watxiwãhãre iny bedede ywinareny rarybere wesemy. Tahe aõkõre, Lisiu soldado dinodu tyhy ritare iny-ribi wotõmona-di.

⁸ Tahe inydee rarybere: –Boibenykre Feli-ò. Tii adee roholakre. Kia tahe Lisiu rarybere. Tahe jiarÿ tule rarybere. Boibenyke Paulo dÿÿraximy kia inatyhy aõbo ada aõkõre aõbo. Tertuliu kia ibutumy rarybere.

9 Ijõ judeu mahãduõ rarybere: —Kia inatyhy ibutummy inatyhyle ratxireri, aõmybo Tertuliu raryberemy.

10-11 Tahe bede dinodu Paulo-ò riteòsinyre rÿikemy, rarybekemy. Paulo tahe tamy rarybere: —Wanyrÿ bede dinodu tyhy, sõwe beòra aõmydÿÿnana-di ywisidÿÿna-di atximahãte. Jiarÿ kia reeryre. Tai reysawãhãre adee ararybekemy. Waò inatxi reuròtxummy heka Jerusalẽ-ò adehemynyde. Iny-ò bitÿÿraxinykeki, wylemy ka bieryke inatyhy raremy. Jiarÿ Deuxu dohodÿÿna heto-ò rehemynyre Deuxu realãkemy.

12 Tiu heka jei jei rewinyõhywãhãre dohodÿÿnaõ-ki aõkõ, hãwãy-ki aõkõ.

13 Aõmybo wamy rarybemy rÿireri heka, aõ inatyhy aõkõ.

14 Sohoji aõmydÿÿnanamy tahe akoreny arelyykre, inatyhy rare. Retyhynywãhãre heka aõbo Jesuisi rierynanymyhÿremy. Tiiboho watyhydÿÿna rininirenyre dohodÿÿna mahãdu iwitxira. Kia hãbu rityhynymyhÿre wesele jiarÿ tule Deuxu inytyby retyhynymyhÿre. Ibutummy bede ywina tyriti-ki riritinymy rÿimyhÿremy retyhynywãhãre.

15 Iny, òrarudu mahãdu, ityhydÿÿdu mahãdu kedeixixakremy rubu-ribi. Kia retyhynywãhãre.

16 Tiu ibutummy òbiti widÿÿmy raruwãhãre. Deuxu-txi tule ibutu hãbu rue-ki.

17 Jerusalẽ-ribi rarewãhãu, tiwese beòra rewyre tahe ixby dòsede Jerusalẽ-ò aõkõ mahãdu wahidÿÿna wesemy ariwahinykremy xiwena wese Deuxu-ò.

18 Deuxu dohodÿÿna heto-ki watxiwãhã, òbitimy

rãire, ibutu bede ywina reywinymy rawãhãre. Tahe waxiwena-di waòludu wamy robire. Iny sówemy weroramy watxiwãhã. Rybe jei jei rarybeòhyre. Tahe Asia bede judeu mahãdu tai rÿimyhÿ. Tiibohole rybe jei jei riwinymyhÿrenyre.

¹⁹ Wamy aõmydÿÿnana rarybekremy ijòdikeki, rokoholakre. Kaki aõkõ ratximyhÿrenyre.

²⁰ Aõbo waki teòsamy rahare ywisidÿÿna mahãdu-ko rãireu, tamy rokoholakre.

²¹ Sohoji aõmydÿÿnanalemy rarybere teòsamy. Kiamy rarybere: –Retyhynyre rubu ixbyby kedexixakre. Tai ywisidÿÿna mahãduko-ki watxiwãhã.

²² Feli bede dinodu rierymy ratxireri aõmybo ityhydÿÿdu mahãdu rityhynyre. Tai rarybere judeu mahãdu-ò: –Lisiu, aõma, soldado dinodu tyhy rehemyre, bede rikierydÿÿnanykre.

²³ Tahe Paulo ròtena heto wese-ò ratximyhÿreki, riòsedÿÿnyre. Ta rarybere he soldado dinoduò-ò: –Ywimy idi ratximyhÿkemy. Tule rarybere: –Iò ixinamy terina mahãdu iroramy kanakre. Ixinamy uriõnomy tamy kidiwahinykre awityhy roimyhÿkemy.

²⁴ Iribi nade Feli tahãwyy-wana Drusila. Ihãwyy heka judeu mahãduò rare. Riteònyre Paulo-ò tamy kanakremy, tamy kanarybekremy. Paulo rarybere tamy: –Jesuisi Kristu kia tyhydÿÿnamy. Tii òbiti-di iny ròhòtinykemy tule ywisidÿÿna txumy Deuxu kanakremy ritÿnyre.

²⁵ Tahe Feli ruberure. Makre, tamy rarybere, aõwaxiny tiubo wabededÿÿnana-di my kÿnyikreu, ixbyby adee ararãriòwykre.

²⁶ Tule Feli ijõ nieru Paulo-ribi ritakemy

ratxireri, tai rarariòwyre ijõtXu ijõtXu tii-wana rarybekremy.

²⁷ Inatxi beòramy bede idi rÿire. Iwitxira bede dinodu ralore Feli deròwy. Porsiu Festu inire. Feli tahe judeu mahãdu tuure tamyreny aõõ riwinykemy ratxireri tahe Paulo ririre ròtenawo-ki.

25

¹ Cesaria hãwã-ki bede dinodu tÿmyraõ ronyre. Festu inire. Inataõ txu-di tahe iribi ròhònyre Jerusalẽ-ò rakemy.

² Tahe xiwe dinoduõ, judeu mahãdu dinoduõ tamy rarybere Paulo aõmydÿÿnanamy.

³ Tamy rexitòenyre Paulo-di wylemy kanakremy. Kiamy heka rexinohõtidiÿÿnyre ryrowetya-ki rirubunyrenykremy.

⁴ Aõkõre, Paulo ratxirekre Sesaria-ki, Festu rarybere, jiarÿ tahe aròðekre ele elemy kowa-ò. Kai-boho adinodu mahãdu wadi roikre kowa-ò. Rokoholarenykremy ywisidÿÿna-ò.

⁵ Tule kaiboho aõrybedikeki, Paulomy, kowa-ò rarybekremy.

⁶ Iribi tahe debòwiò txu òsÿny txu idi rÿidi tahe ixyby Festu dòðsede Cesaria-ò. Irootxu tahe Paulo ywisidÿÿna ròhònyre. Tahe Paulo ridykemy riteònyre ywisidÿÿna butuna-ò.

⁷ Tahe judeu ywisidÿÿna mahãdu heka sòwemy tuu aõbina binahakÿmy Paulomy rarybemyhÿre, Jerusalẽ-ribi rehemynyreu. Aõ inatyhymy aõkõ.

⁸ Paulo tahe rexitxiònyre: –Jiarÿ kÿny kia-di aõkõ watxiwãhãre. Tii rarybere: –Tiu heka judeu mahãdu bede ywina ratyre aõna aõnamy ratÿÿkõre. Tiu heka Deuxu dohodÿÿna hetomy

rewinyõwãhãre, tiu Roma dinodu bede ywina ratyre aõhe ratÿÿnyõwãhãre.

⁹ Idi tahe Festu rÿÿraxire Paulo-ò: –Kawexe texiywinymy atxiteri Jerusalẽ-ò makremy. Kowa ywisidÿÿna ariwinykemy adee roholakremy. Ki-amy Festu rarybere aõwiwihikÿmy riwinykemy ratxireri judeu mahãdu dee.

¹⁰ Tahe Paulo rirawyònyre: –Aõkõre, arakre he Iòlò tyhyòhòkÿle arehemynykre. Tii wadee roholakre. –Jiarÿ dori ixiywinyhyy tamy arakre. Kai teeryte jiarÿ aõkõ tudÿÿduramy.

¹¹ Aõma aõbo waki binamy relera-wana heka arurukre. Aõkõkeki tahe aõbo awihykyle rewinyre-wana heka timy inihe warubudÿÿõmy. Iòlò tyhyle wadee roholakemy he ixide rahõtinyreri.

¹² Festu tawiòhedÿÿdu-ò rarybere. Idi ta dirawyònyde: –Awire, iòlò tyhy-ò atxiteri urenana kÿnyhe aõwaxiny makre.

¹³ Iribi tahe aõtxummy tahe iòlò Agripa dehemynyde, Benise tariòrese-wana. Festu roramy rareri.

¹⁴ Tahe tii-wana rarybemyhÿre aõtxu, Festu-wana. Idi tahe Paulo aõmydÿÿnanamy iòlò-ò rarybere: –Ròtenawoluduõ roireri ròtenawo-ki. Tai he Feli ririre jiarÿ iaõmydÿÿnana arierykremy.

¹⁵ Aõma Jerusalẽ-ki watxiwãhãu, dohodÿÿna wedu mahãduõ wadee heka rarybere: –Tii arirubunykemy heka wadee rityhenymyhÿre. Judeu mahãdu matuariõ tule kia rarybere.

¹⁶ Tahe tamy jiarÿ rarybere: –Aõkõre, aõma Roma mahãdu kia bede ywina dori tuu aõkõ

roimyhÿre. Juhu heka rakre ywisidÿÿna-ò tahe relyk्रे heka iximy, taòludu mahãduko-ki.

17 Kaò juhu ditehemynydenydeu, tamy rarybere. Ijõ txu he reyrubunyre ywisidÿÿna-ò roholakremy tahe Paulo ridykemy aditeònyde.

18 Tahe aõmybo tamy rarybere heka, iwese rahõtinyre wese aõkõ tii riwinyre.

19 Aõbo ityhynareki heka tuheka rÿire. Inyõ heka tii rarybemyhÿre Jesuisi rurulemy. Tahe Paulo rarybemyhÿre irulemy ihÿre. Tai kÿnyhe rimymy ramyhÿre. Riròtenymyhÿre.

20 Tai tahe tiemy rahõtinyre: Timy taheka aõhe arotÿÿnykre ka aõmydÿÿnana-di. Paulo-ò retÿÿraxire aõma Jerusalẽ-ò aõbo rakemy ywisidÿÿna-ò.

21 Tahe Paulo rarybere: –Iòlòle rakremy aõbo. Tii wamy roholakeki, teòdu waòrysymy ariraokre. Tai tahe ròtena-ò ixybyle rerutyre.

22 Tahe iòlò Agripa rarybere: –Jiarÿ aroholakre inihe kia hãbumy. Tahe Festu dirawyònyde: –Biurasòm y tamy bodoholakre.

23 Idi tahe itxu biòwamy dehemynyde, iòlò, Benise-wana, ywisidÿÿna heto-ò. Ibutumy he iny ralore, soldado wedu mahãdu, iny ityhymy rÿira mahãdu, ibutumy raloralore. Tai tahe Festu Paulo didyde. Tahe rarybere:

24 –Iòlò Agripa, ibutumy ka wadee ijohonadu-wana, ka hãbu heka ibutumy iny he irubudÿÿmy he idi rÿireri, judeu mahãdu kaki tule Jerusalẽ mahãdu.

25 Jiarÿ rahõtinyreri aõ heka riwinyõhyre tai rurukre wahe. Tai iòlòtyhy-ò rakremy heka

ratxireri. Ariteònykre nomy dori tii ratxireri.

²⁶ Aõbo tamy ariritinykre. Aõ heka wari-tidÿÿkõnare. Aõ dori riwinykõre. Tai redyneri adee iòlò Agripa. Tamy juhu boholakre. Iribi tahe wadee manarybekre aõbo ariritinykremy.

²⁷ Timy kÿny wateòdÿÿkõna uritere òhynaòhòkÿle Iòlòtyhy-ò ariteònyòtyhy.

26

¹ Tahe Agripa Paulo-ò rarybere: —Aõwaxiny be-lykre aijyymy. Paulo he tebò riukore he rary-bekremy.

² Wadeysamy he watxireri, Iòlò Agripa. Jiarÿ dori iximy arelyykre ako.

³ Tule kai dori ibutu judeu bede ywina teeryte. Ibutu lahi rybe teeryte. Bodoholakre inihe wadee, ywina-di.

⁴ Tiiemy uladule aratyryritinyde aõma judeu òbitina-di.

⁵ Judeu mahãdu kia rieryre. Txu rexide-lenyre juhu judeu mahãduy-ki, idi tahe Jerusalẽ-ki ratyryritinyre. Jiarÿ fariseu mahãduõ òbiti jiarÿ rare.

⁶ Kia rybe òraru-ki wiji ywisidÿÿna-ki rãire. Jiarÿ dori retyhynywãhãre aõbo Deuxu inytyby-ò rary-bere.

⁷ Jiarÿ Deuxu rybe òlòna reraòwãhãre. Tule judeu ijoi riraòmyhÿre, waòinatxi reurò ijoi mahãdu. Tiiboho Deuxumy reàlàmy raremyhÿ, rummy, txummy. Iòlò Agripa, kia raròsòna òraru-ki judeu mahãdu wadee aõbina binamy rarybemyhÿre.

8 Rubu-ribi ixixana jiarÿ retyhynymyhÿre. Araÿraxikre iòlò. Kia aõbohe wadeòsana raremy kaiboho tahòtinytenytere. Deuxu heka ixyby iny kidiòkesedÿÿnykre taumy tuedeòna-ò.

9 Jiarÿ heka juhuu awimy heka aõbina binahakÿ widÿÿ dee rahòtinyre, Jesuisi Nazare hãwã ludu dee.

10 Sõwemy ityhydÿÿdu mahãdu reròtenyre ròtenawo-ò Jerusalê-ki. Dohodÿÿna heto wedu rewawiòhenanyre tyyriti riwahinyreki. Kia irubudÿÿmy wi risÿnyrenyreu, jiarÿ rarybere: —Awire heka birubunybenyke.

11 Jiarÿ heka ityhydÿÿdu mahãdu aõhòkÿmy rotÿÿnykemy wi resÿnyre bede bede-ki. Aõbinabinahãkÿlemy ityhydÿÿdu rerybedÿÿnywãhãre. Jiarÿ aõnimy reburemy rawãhãre. Resÿbinanyre tahe tii rahenyre irehetyhytyhy-ò iwitxira hãwã-ò.

12 Rare heka Damasu hãwã-ò ityhydÿÿdu òrysmy. Jiarÿ tyyritidi rare, dohodÿÿna wedu ritina-di. Tule ibede ywina-di rare.

13 Tahe Damasu iòhòmy rareu, loosònaõ diwa-toosònyde, txu loosòna ratyre ihÿre.

14 Jiarÿboho rejuxunyrenyre tahe raholare rybeò-ò judeu mahãdu rybe-di rarybereri: —Salu, Salu, aõhereki wexe aõbina binahakÿ tadiwinymahãte wadee wimy aõkõ. Aõbina binahakÿle ixidee tadiwinymyhÿte.

15 Jiarÿ rarybere: —Mowe, Wanyrÿ tate. Tahe dirawyònyde: —Jiarÿ wa, Jesuisi rare. Wadi aõbina bina tewisÿnyte.

16 Katahe myikre. Adee rehemynyreri, aratara ixidee, wadeòdumy mabekremy. Warybeduõ

mabekre. Ibutumy wamy belyymy mabekre aõhebo adee wiji rotÏÏnyreri. Iribi tasÏ ixityre adee adehemynykre. Tule kia-di marybekre.

¹⁷ Ibutumy asÏ-wana arayrubunykre. Tai ta judeu mahãdu-ò arateònykremy watxireri, judeu mahãdu-ò tule.

¹⁸ Iwese iny ruetà-di rÏira wese tii ihÏre. Kai tamy bitÏnynykre Deuxu aõmydÏÏnana. Tai biruejuakre, rierykremy. Biòbitinykre tamyreny òrarudu roire aõma ìxi-txi tõhòti reakremy loosòna-ki rariakremy, Satanasi bedelorohokÏ-ki aõkõ, kia ryki aõkõ rariakremy. Deuxu uri bede ywina rimymyhÏkre ixidee. Ibutu bede bedemy rÏira wajioimykre. Tyramy taòraru-ribi rÏira, ritamy rÏira, riwatyhynymy rÏira.

¹⁹⁻²⁰ Tai, Iòlò Agripa, iwese warasina-ki riwateònyre wese, retyhynyhyre. Juhuu Damasu hãwã-ki jiarÏ ròhãletere, iribi Jerusalẽ-ò, tule Judeia bede-ki, ibutu judeukõdu mahãdu-ò ròhãletere. Tamy rarybere taòraru ririkemy Deuxu dee kòdòòsekemy. Ìxi-txi tõhòti reakremy inatyhymy aõna aõna wiwihikÏ riwinykemy Deuxu dee.

²¹ Tai judeu mahãdu riwamyre Deuxu dohodÏÏna heto-ki, warubudÏÏmy rõhòtinyre.

²² Deuxu tahe wawiòhedÏÏdu ratximyhÏre. Tai he rãire wiji ibutu-ò ararybekemy watxiwãhãre, aõma aõbo Deuxu rybedu mahãdu iwese Moisesi rarybere wese tamyreny rarybewãhãre kia ibutumy kanakremy. Kia sohojilemy rarybewãhãre.

²³ Juhutyhy rarybere: –Kristu, rurukremy iribi tahe kedexiakremy rybe loosòna kidiwykremy judeu mahãdu-ò, tule judeukõdu mahãdu-ò.

24 Tahe Paulo iximy rarybereu, Festu ryryre: —Paulo, kai wa itxÿtere. Aõnityhymy tatyritinymahâte. Tai arayky tebinanyta.

25 Tahe Paulo rirawyònyre: —Aõkõre wa, wanyrÿ Festu, bededinodu tyhy. Jiarÿ itxÿte aõkõre. Inatyhyrybemy rarybewãhãre. Warybe awi heka rare.

26 Tule Iòlò Agripa rieryre ibutumy tuu tamy rarybere. Aõ wasina aõkõ rarybere. Iòlò Agripa.

27 Aõbo Deuxu rybedu mahãdu riritinyre aõbo, kai tetyhynymahâte. Reeryre jiarÿ, kai tetyhynymahâte.

28 Tahe Agripa riixãwididÿÿnyre rybe-ribi: —Kai, aõbo, Paulo, aõwesele ityhydÿÿdumy aronykemy wadi tahõtinyte, wadee tarybeteki.

29 Paulo rirawyònyre: —Kohe, wadee awire, kai tulekemy. Ibutumy kaki wawesekemy adi rahõtinyre. Kai tule warybe sõwemy aõbo ada aõkõre aõbo Deuxu bityhynybenykemy watxiwãhãre tule waijohonana-wana. Aõna sohojidile taanamy aõkõ watxireri, wawomati reroti-di taanamy atxiteri.

30 Idi tahe bede dinodu, iòlò, Benise, ibutumy he rÿire rõirenyre.

31 Widee reny wiwesele rõhõtinyrenyrene. Ka hãbu timyhe rubudÿÿona he ròtena-ki irutusyõna he, tii dori aõhe rotÿÿnyõtyhy aõna aõnamy.

32 Tahe Agripa Festu-ò rarybere: — Rikiteònyrenyke idi watxireri, tahe tii inihe iòlòtyhyle rarybekemy ixidi ratxireri. Tai kÿnyhe, txioinihe, aõkõre.

27

¹ Tahe rexiywinymy rexihurennyre Italia bede-ò,

Roma hãwã-ò aroirenykremy hãwò-di. Tahe ròtenayrubudÿÿduõ tii-wana rakre, irubudÿÿdu renemy. Julio inire. Tii iòlò yrubudÿÿdu mahãdu dinoduõ rare. Ridyrenyre Paulo ròtena woludu mahãdu-wana. Jiarÿ, Luka tule ihemy rare.

² Tahe rerònyre yhywydyna lawò-ò. Adrÿmitxiludu tahe kia lawò rare. Tule hãbuõ wawana rare. Aristarku inire. Tii Macedonia bedede luduõ rare. Tesalonia ihãwã rare. Tahe hãwò rexihynyrenyre adòikemy Asia bedede-ò. Tahe ròirenyre. IjõtXu biòwa Sidoma beàbeà-ò rehemynyre.

³ Paulo taery mahãdu roramy rakemy ratx-imyhÿre. Tahe Julio Paulo-di itxeredu ririra. Tai tahe Julio awi heka rare Paulo dee. Julio Paulo riywiwinymy idi ratxirerimy ihÿre. Julio Paulo riteònyre titxibo rakelemy. Paulo ery mahãdu aõna aõna tamy riwahinyre.

⁴⁻⁵ Tahe iribi ròhònyrenyre. Xibri bedebute roosibymy ralore yhy dori tiribi tiribi reamyhÿreki. Tahe iribi riòlònyre. Tahe Silisia bedede-ribe riòlònyre, tule Panfilia bedede-ribe ijõ bedede-ò reronyre. Tahe Miha hãwã-ò ritehemynyre Lisia bedede-ki.

⁶ Tai soldado dinodu hãwò nihikÿ rijemyhÿu, ihe-ki roikemy, tahe ijõ-ki rahare Alexÿdria luduõ-ò. Hãwò tahe rexiywinymy hÿre rakremy Italia bedede-ò. Tahe wadeereny rarybere: — Borukubenyke yhywydyna lawòro-ò. Tahe ixityre roirenyre.

⁷ Sòwemy heka txuu wadireny rÿire. Urihimyòle rexihejiwãhãrenyre. Isirare heka Kinidu hãwã-ò dehemynysÿ. Ihãrele tahe retehemynyre Sa-

mona hãwã mynatyhyle raròrenyre. Iribi Kreta bedebute roosibymy ralore yhydori tiribi tiribi reamyhÿreki.

⁸ Tahe ywimy suò iòlò iòlò adoiwãhãdenyde ihyy tahe rethemynyre Rywihikÿmy ninadu-ò. Kia heka Laseia hãwã-ribi iòhòre.

⁹ Sõwetyhymy txuu wadireny rÿire yhynihikÿ bina òraru-ki. Inarehe lisina txu-ribi ròhònyre. Tai tahe bededÿÿnana ibutumy roimyhÿre. Tai brebunamy bede roimyhÿre.

¹⁰ Paulo tahe tamyreny rarybere: — Wanyrÿboho, ka tÿina isiratyhykre inydeereny. Inynonanareny iòhãrure aõna aõna ibutumy inyribireny ituekre, hãwò rabohokre ada ijõ aõbo rikururenykre.

¹¹ Tahe soldado dinodu Paulo rybe rityhynyõhyre. Yhylawò wedu tòruludu-wana tii rityhynyre.

¹² Yhylawò wedu, tòruludu-wana iwitxiramy rõhõtinyinmyhÿre, beòra tai riekõkemy beà dori ibinareki. Ijõ tule tahe roirenykemy ixide ihÿrenyre rehemynykemy Fenisia beà-ò. Kia heka Kreta bedebute beàõ rare. Biuweribitya-txi ròròmhyhÿre, tai awire kia beà, beòra bede riwykemy.

¹³ Ijõ rarybere: —Rikoirenyke, yhy dori rebonyreri, tamy rekehemynyrenyky. Tahe womatisana riukore. Roirenyre yhy-di. Tahe iòhòmý Kreta bedebute rotÿÿnyra.

¹⁴ Aõwesele heka yhy nihikÿ dehemynyde bedebrò-ribi. Kia yhy nihikÿ iraro bedebrò ludu inire.

¹⁵ Ka yhy nihikÿ taruru-di riwyre hãwò nihikÿ. Juhu yhynonana weribi-ò riwisÿnyre. Idi iwo rexieryre ixinamy riwyre yhyòkesena-ò.

16 Tahe rehemyhÿre Lauda bedebute-ò iroosi-bymy tahe ralore. Tai hãwò nihikÿwo-ki hãwòriðre riwyre.

17 Idi tahe røhøtinyre hãwò nihikÿ rabøhøke-txi roholarenyre, tai tahe ritaarenyre iwetya-txi. Tahe ruberurenyre, Libiamy ninadu beðlau, tahe weløhøkÿ ritare iribi rexitarenykemy.

18 Ijøtxu roirenyre yhynihikÿ tamy realemy iu, tai tahe aõna aõna-di rehure ibutemy rawe-tarikemy.

19 Tasÿ txuõ idireny reare. Idi rehurenyre aõmybo rekoakømyhÿrenyredi rawetarityhykemy.

20 Txu søwemy rewyrenyreny txumy, tainamy ribi renyøhyre. Yhynihikÿ reamyhÿ. Tai søwemy ruberumy rÿimyhÿ rubu lau.

21 Søwemy heka bededÿÿnana riwyre roxiøhyy. Tahe Paulo iyreny-ki rÿire, tahe tamyreny rarybere: –Wanyrÿboho, warybe-ø taholaøhytentyte Kreta-ribi røhønyrenyreu. Aratohonyrenyreny iribi inyboho kodoikøkemy. Boholabenybe-wana ta in-ihe aõna itueøhyre.

22 Ihãrele tahe deysana-di adeereny ararybekre. Inyø ruruøtyhy, hãwò nihikÿ sohojile rabohokre.

23 Jiarÿ dori Deuxu deødu rare. Kaurumy dori Deuxu ÿju wadee nade.

24 Tahe rarybere: –Paulo, brebuømy. Kai iøløko-ø makre. Deuxu dori ruxetøena kidi-wahinykre. Tiu heka aruburenyøna aijoi-wana.

25 Tahe wanyrÿboho, brebuømyreny. Jiarÿ dori Deuxu retyhynyreny, iwese wadee rarybere wese, rarekre.

26 Urile tahe inyboho kiditehemynydenykre bedebuteø-ø. Kia tahe Paulo rarybere.

27 Waðinaubiòwa rummy beronihikÿ tya-ki bede riijemy roiremyhÿ. Adria beronihikÿ-ki roirenyreu, tahe rutya-txi hãwò nihikÿ aõna hydÿÿdu su iòhòmy roholarenyre.

28 Tahe beõ urihixina-di riurihire, wawiò dera urihixinamy beõ riurihire. Idi iko-txi ixityre riurihire tai waiyre dera urihixinamy rimyre.

29 Tahe rahòtinyrenyre manale tai roimyhÿremy. Tai tahe manatisana-di inaubiòwa lòru ludu-ribi rehurenyre. Iribi rexitòenyre wylemy txuu kanatÿnykemy.

30 Hãwò aõna hydÿÿdu mahãdu hãwò riòre riwesere bera-ò. Idi risÿnyre ijõ manatisana ritidikremy hãwò jura-ribi. Úrile tahe rahenykremy ròhòtinyre.

31 Paulo tahe rierymyhÿ tahe soldado wedu-ò rarybere: –Soldado mahãdu tule roholare:

32 –Hãwò aõnahydÿÿdu mahãdu hãwò nihikÿkÿro-ki rariòrenykeki, kaiboho atuerenyke. Tai tahe soldado hãwò riòre reroti riàrore tahe resere bera-txi rahenyre.

33 Txuu iòhòmy natÿnyde, tahe Paulo tamy rarybere: –Wiji wað inaubiòwa txummy kaiboho teraòtenyete tabyretenyòhyy.

34 Ijõ birÿsÿbenyke, arurureny rexiòlònykemy, kaibohoò dori burubenyòtyhy. Aradeti sohojiò tiu iòòtyhy.

35 Rarybemy rahudi tahe, paõ sohoji Paulo rimyre. Ibutura-ò Deuxummy reàlàre. Idi tahe paõ riorore, riyre.

36 Ijõ reny reysarenyre, taita tule riyrenyre.

37 Tahe 276 iny hãworo-ki roirenyre.

38 Tahe ibutumy iwo rihyrenyre tahe

maixõmo wesena-di rehurenre hãwò nihikÿ rawetarinykemy.

³⁹ Bede ratÿnyreu, inyõ rieryõhyre titxiribibo nade. Tuu robirenre iworywo-ki ÿnyra tai roimyhÿremy tahe inyõ rieryõlemyhÿre. Widee raryberenre: –Rikirõnyrenre hãwò-di iwo-txi.

⁴⁰⁻⁴¹ Tahe manatisana riukõrenre tahe welò riderenra hãwojura-ò irarõsõna riesere. Tahe ritelenre ralõkemy. Urile esetere tiò tiòle hãwò ridymyhÿ beõ òhòkÿle idi rehure rorokõòhòkÿle, rimyre taile òbò hãwòlòru ribohonyre.

⁴² Soldado mahãdu rõhõtynre ròtena mahãdu rahenyketxi. Tai rirubunykemy rõhõtynre bede-ò robunyre lau.

⁴³ Soldado wedu tahe Paulo ritõdenre rubu lau, tai tahe riteõnyre rirubunyõhyre: –Tibo alobueryre, juhoo suò rakemy, soldado wedu kia rarybere.

⁴⁴ Tibo alobueryõke tahe òwòru àre hãwò-ribi rimymy idi rakre. Kiamy heka ibutumy retehemynre su-ò, inyõ ruruõhyre.

28

¹ Tai tahe taisÿdu mahãdu-txi rekoare. Tii bedebutenimy inydee relyre. Malta heka inire.

² Biu riwasebenyrenre yhyjutyty riwasarenre. Tai tahe tiiboho heòty riworynyrenre wahetõnarenmy. Tiiboho riwawisinanyrenre awimy wadireny roiremyhÿ.

³ Paulo hee ributunre heòtyworonamy. Idi rehureu, hemylala he wo-ribi heòty lau ròhõnyre, tai ruruare Paulo debò-ki.

4 Tusÿdu mahãdu tuu robire tahe rarybere: — Ka hãbu rubudÿÿdu òsÿny rare. Tii heka ruruoÿre bera-ò, ka tahe kidiòwynykre inyõ òsÿny rirubunyreki wahe, rurukre heka.

5 Paulo tahe hemylala tebò-ribi riatyre heòtyru-txi. Ta aõhõkÿmy rotÿÿnyõhyyre.

6 Tahe imahãdu idi retehemy rÿimyhÿ tarubulemy resekeò, ada tebò ratarinybohokeò aõbo. Sõwemy riraòre, aõhebo rotÿÿnyke, tahe aõkõhyyre. Tai tahe iwitxiramy rõhõtynyrenyre: —Tii deuxuõle òsÿny ratxireri. Tiiboho raryberenyre kia.

7-8 Hetoõ tai iòhòmy rÿire, Publio iwedure. Tii heka ityhy rare iwedu rare kabedebute-ki, tii bedeòtiidÿÿna rare. Tai taheto-ò riwadyrenyre. Awihyyle wadireny raremyhÿ. Publio tyby tahe rubunamy rurumyhÿ. Busu-di ratximyhÿ. Tai tahe Paulo iroramy rare. Tebò ityre ritidire, rex-itòenyre, tahe riteytenyre.

9 Tai tahe ibutumy bedebute ludu webinadu Paulo dee wii rotyre. Ibutumy reyterenyre.

10 Tai tahe uriiõno inydeereny riwahinyre aõna aõna. Sõwemy rÿsÿna hãworo-ò rahyre inydeereny. Kia hãwò beòra bede kia beà-ki riwyre.

11 Txuòkuro hãwò ni rare. Kia ni ihiju rare. Ideuxu ritxoo inatxi rare. Hãwò Alexÿdria hãwã ludu rare. Tahe rahònyrenyre. Inataõ ahãdumy bede wadireny rÿidi.

12 Sirausa hãwã-ò retehemynyre. Tai tahe inataõ txumy wadireny rÿire.

13 Iribi tahe Rejio hãwãmy rekoarenyre. IjõtXu tahe Pozuli-ò reòlònyre. Inatxi txu-di retehe-

mynyre yhy ibòò-ribi debonydeki.

14 Tai seriòreõ ratximyhÿ. Tiiboho rexitòenyrenyre tii-wana ratxikemy debòinatxi reurò txumy. Kiamy heka Roma hãwã-ò roirenyre.

15 Roma ityhydÿÿdu mahãdu roholare jiarÿboho retehemynyrerimy. Tai tahe doidenyde Apio hãwã ube-ò. Tule aõ-di ijohona Heto Inataõ hãwã-ò doidenyde. Paulo tiiboho robireu, Deuxu realàmÿhÿ, reysamÿhÿre.

16 Tahe Roma hãwã-ki Paulo ixideewimy rasÿnyre. Urile soldadoõ aõu aõu tii-wana ratximyhÿ.

17 Inataõ txumy bedede idi rÿidi, Paulo ributunyre judeu mahãdu dinodu. Wii ributunyreu, tamyreny rarybere: —Wanyrÿboho, waseriòreboho, jiarÿ aõ rewinykõre waijoi Judeu mahãdu dee. Tule lahirybe õnosõna ratyre aõ rewinyõhÿre. Ihãre judeu dinodu riwamyre. Tahe diwahinyde Roma dinodu mahãdu-ò.

18 Tiiboho heka riwatÿÿraxinyre ibutumy. aõ heka waki ibinamy rahaõhÿre. Tai tahe riwateònyrenykemy ratxirenyreri.

19 Waijoi tahe Judeu ijoi heka waòludureri. Tai tahe Iòlò-ò jiarÿ rarybere arakemy. Aõ dori waijoi dee waòraruõre.

20 Tai heka arabutunyrenyre, warybe-ò bohoolabenykemy, wadi retehekemy womati reroti-di riwataataara. Judeu mahãdu raròsòna òraru-ki kawesemy watxireri.

21 Tahe judeu dinodu mahãdu rirawyònyre: —Aõkõre, inyõ rehemynyõre Judeia bede-ribi. Ijyy-

binamy umy relyyõre. Inyseriõre mahãduõ kaò dehemynyõde.

²² Aroholarenykemy timybo tahõtïnymahãte-ò. Ityhydÿÿdu mahãdumy dori ibutumy aõbinahakÿlemy rarybereri. Kia judeu mahãdu dinodu raryberenyre.

²³ Tahe riywinyre itxu Paulo rybe-ò ijohonamy. Idi tahe Paulo heto-ò sõwemy iny doidenyde tamy roholakemy. Tii Deuxu ijyy ritÿnynyre rudiu rexidelenyde, txioromy rexihure Moisesi Tyyriti ritÿnynyre tule ijõ rybedu Tyyriti-di ritÿnynyre, iwese Jesuisi Iòlòtyhy kanatxikre wese kabede-ki. Kia Jesuisi aõmydÿÿnanamy ritÿnynyre.

²⁴ Ijõ roholare aõmybo Paulo rarybereò, Jesuisi rityhynyrenyde. Ijõ tahe aõkõre, rityhynyõre.

²⁵ Ijõ teramy reare. Rÿire, ròhònykremy. Tahe Paulo tamyreny rarybere: —Deuxu Tyytybytyhy booreny dee rarybere Isaia tyyriti-ki. Awimy rare. Kawese roire:

²⁶⁻²⁷ —Makre tamy marybekre: —Boholabenyke, ta tiu aerysyrenyõna. Betehekre arue-di, ihãre tahe aerysyrenyõna. Iruereny, iraykyreny, tõhõtireny ritòbònymahãrenyde. Tai tiu tiiboho robirenyõtyhy, rieryrenyõtyhy, roholarenyõtyhy. Tai diwatyhynyõhyymyhÿde. Tai heka iòraru-ribi ariteytenyõkre.

²⁸ Bierymy boibeke Deuxu tarasana judeukõdu mahãdu-ò rare. Tiiboho dori roholarenykre.

²⁹ Paulo tarybe rahudi tahe, judeu mahãdu ròhònyrenymy sõwemy widee rarybemyhÿrenyde.

³⁰ Roma hãwã-ki Paulo rasÿnyre inatxi beòramy tahetohuòtenawo-ki. Ibutumy heka dÿÿraximy

iheto-ò rehemynyrenyreu, Paulo ridyre tamy rarybekremy.

³¹ Deuxu Iòlònamy Paulo iruru-di relyyhyymyhÿre. Inynyrÿ Jesuisi Kristu aõna aõnamy rierynanymyhÿre. Tiu inyõ aõhõkÿmy risÿnyõmyhÿre Paulo rybe xãwikemy.

Deuxu Rybe Tyyriti New Testament in Karajá (BR:kpj:Karajá)

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 18 Apr 2025 from source files
dated 29 Jan 2022

55ce0bcd-101e-52a3-984e-847027efe150